

ПЕТӖ 1926 ВОСЯНЬ

ЛЭДЗӖНЫ: КОМИ РЕСПУБЛИКАСА ЮРАЛЫСЬЛӖН АДМИНИСТРАЦИЯ,
КОМИ РЕСПУБЛИКАСА ГИЖЫСЬ КОТЫР

ВОЙВЫВ КОДЗУВ



ISSN 0134-4323

БЫД ТӖЛЫССЯ ЛИТЕРАТУРНО-ХУДОЖЕСТВЕННОЙ ЖУРНАЛ

5

ОДА-КОРА (МАЙ)

2017

ТАЙӖ НОМЕРЫН:

Надежда ПАВЛОВА. «КоркӖ-й петас на, петалас шондӗ...»	
Кывбуръяс	3
Александр ШЕБЫРЕВ. ЗвездатӖм крест. ГӖрд галстук.	
Висьтъяс	8
Анжелика ЕЛФИМОВА. Танӗ толаас петӖны овны.	
Кывбуръяс	20

ЫДЖЫД ПОБЕДАЛЫ — 72

Александр УЛЬЯНОВ. МарковлӖн бӖръя туй... ..	25
Иван НОГИЕВ. Менам чожъяс	44

КОЛАНА УДЖ

Никон ХАТАНЗЕЙСКИЙ. Пыр лоан мян сӖлӖмын	48
--	----

Е.В.РОЧЕВЛЫ 80 ВО ТЫРИГКЕЖЛӖ

Егор Васильевич Рочев	52
Алексей ПОПОВ. Тундраса Ёгор	53
Егор РОЧЕВ. СӖмын милицияӖ эн сюрӖдчы. Пернапас чӖвтӖтӖг... Гыча юква. Висьтъяс	57

12+

Обложка вылын снимокыс Евгений КозловлӖн.

© «Войвыв кодзув» («Северная звезда»), 2017 г.

СЫКТЫВКАР

СЕВЕРНАЯ ЗВЕЗДА



**Ежемесячный
литературно-художественный
журнал**



Учредители:

АДМИНИСТРАЦИЯ ГЛАВЫ РЕСПУБЛИКИ КОМИ

**«СОЮЗ ПИСАТЕЛЕЙ РЕСПУБЛИКИ КОМИ» – РЕГИОНАЛЬНОЕ
ОТДЕЛЕНИЕ ОБЩЕРОССИЙСКОЙ ОБЩЕСТВЕННОЙ ОРГАНИЗАЦИИ
«СОЮЗ ПИСАТЕЛЕЙ РОССИИ»**



Издатель:

АУ РК «ИЗДАТЕЛЬСКИЙ ДОМ КОМИ»

ДИРЕКТОР ПЛЕТЦЕР Е.В.



РЕДАКЦИОННАЯ КОЛЛЕГИЯ:

Главный редактор

ПОЛУТРУДОВ А.В.

Ответственный
секретарь

КИЧИГИН И.Н.

УЛЬЯНОВ А.В.

УЛЯШЕВ О.И.

ЛИМЕРОВА В.А.



Надежда ПАВЛОВА



«Коркө-й петас на, петалас шонді...»

К Ы В Б У Р Ъ Я С

* * *

Рытъя шонділөн
медбөръя югөръясыс
вошйөдчөмаөсь,
нюжөдчөмаөсь
мена́м вольпасьö.
Ойбыралöны,
гашкө, инö, чөсмасьöны
мена́м шуда вöтьясөн,
медым кусöм бöраныс
кольны меным
налысь шоныдсö,
збыльмытöм на вöтьяслысь,
шуда вöтьяслысь шоныдсö.
Войковтас,
юр вывсянь кок улөдз
гаровтча налөн шоныднас,
нёровтча,
на пиын узьмөдча,
на пиын овмөдча.
Асьядор,
медводдза югөръяс чужсигөн,
син восьта, шемöсма,
збыльмытöм вöтьясöй,
медшуда вöтьясöй
ловзясны, пöртчасны вемöсö.

* * *

Гожом шөр. Югид вой.
Водыштөм водзвылас
мамукой лыддьö Буркыв.
Ме — Цветаевалысь
кывбур бöрся кывбур.
...Тöлысь
кокньыдик бордөн
плавъялö
алöйгöрд ты пöлөн.
Öтарö чуткылö сэтчö
ёсь борд помсö,
тэрмасьö кольны
выль пасйöдъяс
войся сöдз енэжас.
Эскöмөн, кодкö да эштöдчас,
сяммас жö лыддьыны,
сюркнявны вежöрас.

...Мамукöй чöсмасьö
дженъыдик ун юмөн.

...Бергöдi медбöръя лист бок
да чöвтi син енэжлань.
Катласиг, чатрасиг
пелькöдчысь кымöрыс
зэр ваён мыскалö
тöлысьлысь гижöдсö,
медбöръя кывъяссö.
Тöвру тшöтш отсасьö,
копрасьö, тöлöдö
медбöръя визьтуйсö.

...Он ставсö удит тай,
лэбö кад му вылад.
Регыд и шондiбан
серлöдлас югöрнас
матыстчысь лунсёвлысь
руалысь индöдъяс.
Удита, гашкö,
син чöвтлыны енэжлань,
локтысь выль тöлысьöдз
кöвтыштны шы и пас,
чöвтавны бур кывъяс,
шонтыны сьöлöмын,
кисьтны выль кывбуръяс
муывса дзоридзён.

* * *

Мöдлапöлас
кöдзыд ру пиас,
тыдалö, дзикöдз гегдöма
рытъя кыаыс.

Нюжөдчөма со таладорас,
писькөдчөма
Кузьнеч Анна тьотлөн
овтөм керка-короминаас,
өзтөма бисө.
Став өшиньыс югзьө,
быттьө сиптыштөмаось найөс
алөйгөрдөв ситечысь
вурыштөм занавесөн.
Дзик өд кызди
важ шуда кадас,
кор быд керка вежөс
йөз тыраөн
да челядь шыа-гораөн вөвлі...
Эз-ө нин, збыльвылө,
мойдын моз
бергөдчы кадыс?
...Эк-ма, мыйта көть
дзоргы да кывзысь,
шы ни ру, ни вуджөр.

...Өтнас сэн, төв саяс,
очсалө чөв-лөняс,
вугралө алөйгөрд кыа.

* * *

А кадыс тай,—
быттьө письтөма кыткө,—
шливгысь зэрөн
ведра дорысь моз
киссьө и киссьө.
Шорөн визувтө,
юөн кывтө,
му выв шорөн бузөдчө,
енэж юөн плавгө-шлывгө.
Кодөскө кылөдө
төдчытөм ва визьөд
войттор моз
енэжсянь муөдз.
Кодөскө катөдө
тыдавтөм туй пөлөн
енэжөдз
волялысь
руөн.

* * *

Папукөй, мывкыдөй, донаөй,
орт пельнад кылан-ө?
Папукөй, мусаөй, шань мортөй,
орт синнад аддзан-ө?

Быд пулөн, кодös тэ
ас кинад пуктылн,
быд веж кор кевмысьö
мулы и енэжлы
тэ вöсна.

Тэ вöсна раммöm тöv
копрасьö Енмыслы,
юрбитö тэ вöсна.

Енэжса лэбачыс
сьылöдö ловтö тай,
горзö да бöрдö öд тэ вöсна.

Тэ вöсна
быд турун сi öд со
радейтан муыдлөн синваөн
мысьö дай киськасьö
Тэ вöсна.

Чужан сикт морöсад
зэр — вежа ва войтөн,
пернапас чöвтöмөн,
уськöдчö-койыштчö,
шондiсö саявтöг...

Тэнадлөн, тэнадлөн
посводзын крестыд тай
эзысьөн ыпъялö
енэжлөн синвасьыс.

Тэнадлөн, тэнадлөн
быд шыпас ним-вичад,
шондiөн югзьöдöм,
лöсталö зарниөн.

Тэныдлы, тэныдлы
шондiлөн югөръяс
воливтöм вылö нин
кузь туй тай панöны.
Шондi-мам сьölöм пыр
ловтö мед сöдзöдны,
сотышттöг, дойдавтöг,
Ыджыд Ен ки вылö
шоныдös, югыдös
вийöдны, войтöдны.

Батьöй, мусаöй,
аддзан-ö, кылан-ö?
Колльöдö ловтö со
Енъюгыд ывлаыс.
Пыдöстöm енэжлань
лэбачьяс качисны,
гашкö, тэ на пövстын?

На пөвстын кыпөдчин...
Орөдчин ставсыныс...
Кокныдик бобулө
со тай нин бергөдчин...
Ылыстчин...
Син судзтөм ыліас
войттусьон сылыштін —
миянлөн синваон.

Мунін, кор лежнөг
веж му вылам дзордзалис,
шогос мед менсьым тадз
аскөдыд гуавны.
Шуд вөсна, дерт жө, тэ
мунөмнад вештысин.
Ме вөсна, ми вөсна —
муывса олөмнад.

* * *

Он, некытчө сыысь он дзебсьы,
Быть воас, он төд, сёр ли водз,
Он вештысь, көть кыз синва-н бөрддзы,
Он сёрнитчы, коми көть роч.
Со нуис нин кымынөс кортөг,—
Дерт, сьөкыд жө сылөн сьөд удж,—
Рөд мортөс, бур төдсаөс, ёртөс,
Он думыштны весигтө куж.

И воас кад... Крап пырас гортад,
Көть иган ни томан он восьт,
И нуодас медматыс морттө,
Дерт, нинөмсө сэсся оз босьт.

Ок! Дыр нин өд бергалө орчча,
Пыр топалө гөгралан кытш.
И, гашкө нин, сувтас син воча
Ли бара на бергөдлас мыш.

❖ ❖ ❖



Александр ШЕБЫРЕВ

Висьтъяс

Звездатом крест

Артип Иванос дзебисны колана ног, морт моз. Позьё шуны — шыён. А кыз нё модарёсё, кор сиктысь муніс вольтём вылё бөръя фронтёвик? Синва шорён, дерт, эз киссьы, но унаён азыма варовитісны восьса гу водзас. Квайтпалич моз трачкис сиктса юралысь — Гёгрёс Иван (тадз нимтісны). Лытём кывъя, велалёма нин. Сэсся некымынысь енэжас шковгисны автоматъясысь военкоматса погонаяс. Но эз дрөгнит Артип Иван татшом лыйём шыясысь, синнас эз лапнит. Сылён лолыс кытёнкё модлаын нин лэбаліс, тёдтёминын, и муыввса тёжд-могъясыс мортыслён помасисны. Висьёдчис бөръя кадас Артип Иван, жуяліс, ставсьыс мудзис...

Кодзувкот мында йёз гуасьны эз лок, и рёдвужлён торъя майшасян чужомъяс эз жё тыдавын. Кыдзкё кокниа ставыс муніс, шылыда. Некутшом дивё абу: Артип Иван өкмысдас вит нин тыртіс, а та дыратё гежд айлов гёгрёс мусё кокнас талявлё. Гётырыс со, Овер Анна, сизим во сайын нин модаръягыдас уйыштіс, коть торъя некор эз лябсьыв. Кыдзи выліас шуёма! Бөръя кадсё пёрысьысла нюкыртчём Артип Иван ыджыд ныв дорас оліс, и отарё мыйкё майшасис. Тыдаліс, мый ортсынас и пытшкёснас нёрпаліс. Тасаси пё тайё му вылас, некодлы ковтом, Енмыс весиг оз босьт. Мыжми али мый?

Томуловёс татшом мёвпъясыд чуймөдоны (олөмыс — помтөм!), пёрысь выживён на шуасны, а асьныс бадь кор моз нюкыртчасны да тадз жё «гудрасьны» модасны. Ставыс олөмас коркё дышөдө... Весиг ачыс олөмыс. Кад, кад! Тіч-точ, тіч-точ... Аслад кадө лок, асладө и мун. Эн тэрмась, но и эн нюжмась!

И борда китш-котшгяс, качва кодь катшаяс, тадз жё мөвпалёны. Со тай сюсь сингьяссё дувгөдомаось, кыйкъялөны пожом увъяс вывсьянь, бур корысьяс моз виччысьёны, кор и налы гу дорысь мыйкё пайкыштчас, дарөвөй чөскыдтор вомас сюрыштас. Но абу дзик-дзик дарөвөй! Ракаяскөд, мутивөйяскөд, бурпөт на

воча ныр ковмас тшетшкӧдчыны, мед нӧкъя шаньгатор либӧ югыд кыша кампеттор коркӧ гыркӧдзыс воас. Ӧтырышъя зыртчӧны! Став олӧмыс рака-катшалӧн — вензигмоз, зутшӧдчигмоз... Медводз — кынӧмпӧт шедӧдӧм. Костас — чужтысьӧм да быдтысьӧм...

...Степан син бӧжнас аддзис, кызди орчча гу вылысь кимӧс-титчысь том катша кватитӧс вомас да тӧв ныр моз пышӧдӧс шаньга джын. Сы бӧрся сӧд вуджӧрӧн лыйыштӧс сэтшӧм жӧ том рака. Энлы! Венсьӧма катшатӧ! Вомас кӧ сюрис, он нин мырдды! Олӧмыд — абу Крыловлӧн мойдыс!

«Басняд вот наян ручыд ракалысь сыртӧ кызкӧ-мыйкӧ мырддис...— мӧвпалӧ Степан.— Везитӧс рыжӧй гӧнлы, рака вылӧ люкасис. Катша кӧ вӧлі — эз сет...»

Степан волӧс жӧ Артип Иван гу дорӧ, кӧть шойна вылад сӧйӧс сира гезйӧн он кыскы. Но бӧръя туйӧ мӧдӧдны колӧ... Ас сиктса мортыс, абу бокӧвӧй. Артип Иванкӧд кутшӧмкӧ торъя матыслун, дерт, эз вӧв, весиг абу ӧти рӧдвужысь, но Степан пӧрысь мортыскӧд, кызди комияс шулӧны, лӧсяліс. Суседъясӧн олӧсны, орчча керкаясын, и гожа рытьясӧ, кор Артип Иван петавлӧс йӧрас, пуксыліс аслас радейтана лабич вылӧ, Степан сэтчӧ корсюрӧ сибӧдчывліс жӧ. Ӧтлаын шпуткисны (пӧрысь морт эз и шыбит чигаркасӧ), ӧдтор-мӧдтор йылысь варовитлісны. Иван важсӧ казътывлӧс, челядьдырсӧ, мырсьӧмсӧ, ӧнія гудыргадыр олӧм вылас шуасис... Броткис, нинӧм и шуны. Эз олӧмсӧ кулит, а гӧгӧрвотӧм йӧзсӧ, налысь вытьсӧ, этшсӧ. Татшӧм кокни олӧмыс пӧ некор эз сувтлы, а йӧзыс лажмисны, лӧдзчысисны... Удж бӧрся оз вӧтлысьны, мӧдарӧ, пышъялӧны сыысь, ставсӧ кикурӧда вӧчӧны, довъялӧны сикт шӧрын пӧрнӧй мужикъяс, янӧдчӧны, румка пыдӧсӧ уськӧдчӧны, вахта вылӧ мунны — дыш. Парпонь чукӧр, семья оз лӧсьӧдны, а кодлӧн эм — жугӧдӧны. Мыйся олӧм? Сьӧкыдсӧ эз аддзывлыны, лешак чукӧр, та вӧсна кутшӧмкӧ вуж мортыслӧн слабмӧма, а колӧкӧ, и сӧсьмӧма. Сьӧкыдыс мортлы сынӧд моз колӧ. Сӧйӧ зумыдмӧдӧ морттӧ, ӧнмӧдӧ...

Сӧмын война йылысь Артип Иван Степанкӧд некор эз сӧрнитлы. Быттӧ войнаыс эз и чишкавлы Иванӧс. Быттӧ «За отвагу» да Гӧрд Звездасӧ прӧстӧсьыс сетлісны. Мыйкӧ кутӧс фронтӧвикӧс, мыйкӧ быттӧ заворалӧс... А Степан торъя эз жӧ тӧрмӧшит пӧрысь мортсӧ. Мый морысь юасыны, кор мортыс сӧрнитны оз кӧсйы? Ачыс мыйсюрӧ тӧдыштӧ жӧ война йывсьыд, Афганистан пыр коркӧ мунӧс, вирсӧ, няйтсӧ да гудырсӧ аддзыліс. И оз жӧ быд пельӧсын казътыв та йылысь. Гӧгӧрвоӧ Артип Иванӧс. Войнаыдлӧн серпасыс ӧти: сэн морт олӧмыд куим ур дон оз сулав. Ловйӧн локтӧн — аттӧ шу...

...Степан гуасьӧмсӧ помӧдзыс эз виччысь, морт моз прӧщайтчис Иванкӧд, и, салюталӧм бӧрын, бокӧ вешйис, аслас рӧдвуж гуяслань кежис. Мыйтаӧн тан! Ӧти гу, мӧд... Мамыс, батыс... Мыйкӧ водз ставныс мунӧсны, олысьяс на вӧліны да... Эн скӧралаӧй, кристаради, прӧститӧй, гежӧда кӧ волам. Господи, и век жӧ кымынӧн нин мӧдаръяюгыдас! Ставныс коркӧ ловъя мортъясӧн вӧліны, олӧсны да вылісны, шогсӧ и нимкодсӧ тӧдлісны, ӧтамӧдсӧ радейтлісны, челядь быдтӧсны... Олан, он и думыштчыв...

Коркө и тэнө татчө иналасны. Местаыс тырмас, кос вöрыс тырмө. Локтысьясыс сэсся — ми, миян көлена... Оломтө он вермы ылөдны. Тіпкысь кадтө ылөдны оз артмы. И нинөмысь сы ылө дөзмыны, нинөм пинявны, нинөм ёрччыны. Став ловъя лолыс коркө вошө, а мыйон мортыс торъялө, шуам, сійө жө катшасьыс? Мыйон ыджыджык? Вежорнас? Гашкө. Но бурджык-ө мыйонкө сійө катшасьыс да ракасьыс? Вежорсө кө Енмыс морт пыдди кодзувкотлы сетіс, оломас мыйкө вежсис эз? Степанлы унаысь кажитчө, мый Енмыс öшыбитчөма. Мыйкө вывті нин чорыд да скөр кык кокаыс. Ас коддьомсө эськө оз сөй, оз вурваркерт, но вот тай кокнипырысь мөдлысь ловсө босьтө. Отторъя ас костаныс зыртчөны-воюйтөны, нөшасьөны-вачкасьөны. Мый морысь? Эз öтчыд Степан та йылысь думыштчыв, но вочакывйыс эз и сюр. Ачыс абу жө еджыд бордъя, Афганын душман-ыдлы лыйліс жө. Виис эз кодөскө? Оз төд. Но кытчө воштысян, кор тэнө виөны, да нөшта өрттө ранитөны-калечитөны? Пузьом вирнад, пөсьйивсьыд, мыйсө он вөч! И век жө вывтiasьны тан оз ков. Пыр на помнитө, кыдзи öти кось бөрын (Степанлысь куим өртөс сэк ранитісны, öтиөс виисны) кишлакысь кыскисны кык вируля «духөс». Буретш сійө здукас офицеръяс кытчөкө вошисны, эз тай тыдавны-а... Степан аддзис, кыдзи кык ярмөм салдат шошукөдыс шелөтитісны öти моджахедөс БТР-лань, паськөдісны сылысь вомсө да... йитісны уджалысь моторлөн глушител труба дорө. Степан сэк сержантөн вөлі, мурзан ош моз чеччыштіс БТР-лань, сю кольтаяс моз шыбаліс вывтiasьысь өртъяссө, нетшыштіс трубаө «пысалөм» ротсьөм көлуя пуштунөс. Дундөм, лөзөдөм чужөма, былик синма афганеч мешөк моз брукысис муө. Сідзи эськө и пагаліс чөрт кодь тошка мортыс, сөрмыштіс кө Степан.

Но ставыс помасис бура. Дзевисны лоөмторсө ас костаныс салдатъяс, особистъяс пельөдз нинөм эз во. Локтіс ротнөй, видзөдіс пленө босьтөмаяс ылө, да кыз гөлөснас рукөстіс: «Мыйла этия дундөм чужөма? Пачысь перйинныд али мый?»

— Кишлакысь татшөм сюри!— кирган гөлөсьясөн вочаалісны салдатъяс.— Кутшөм эм! Тшын пиысь, көнкө, петіс! Абу жалы! Бурджык лоис, пөдіс кө, падла! Колөкө, тайө гадыс Серёгаөс и виис?

...Степан пыркнитіс юрнас, быттө көсйис шыбитны өдөлитысь думъяссө. А вот и Данил дядьыслөн крестыс. «Но, чолөм ли, мый ли, Данил дядь, важөнкөд нин эг кежавлы...»

Степан ылө пу крестө öшөдөм снимоксянь видзөдіс батыслөн ыджыд вокыс, Данил. Том на, шылыд чужөма, юрас — будёновка пысалөма. Чужөмнас неуна муныштө Степан ылө. Батыс коркө сылы шуліс, тэ пө медся өна Данил вылас мунан, рөдас кыскөма. Да и Данил дядь корсюрө гажа юрнас шмонитліс: менам пийө пө, буди? А бать воча сераліс. Колө кө пө сэтшөма, мед тэнад лоө дай (Даниллөн челядь эз вөвны). Сөмын пө Степанөс вөчигөн тэнад руыд матіберегын эз тыдав!

...Данил дядь. Кыдз думышталас сы йылысь Степан, сідзи и пытшкөсса норлун босьтө. Коді тэ тайө му вылас вөлін, Данил дядь? Мыйла волін, мый ас бөрсаяд колин? Мый йылысь мөвпавлін, кодөс радейтлін? Мыйла жугыль синма мортөн олін?

Тодан, мый талун тэнсьыд Артип Иван ёрттö гуалöны? Салютон, бур кывъясөн, водзвыв дасьтöм памятникөн... А вот тэнад крест вылад гöрд звездаыс абу. Ачыд эн тшöкы пуктыны. Стрöжитин. Но тэ жö фронтöвик!

...Данил дядь. Пöгибнитöм воин. Концлагерса 1541 номера заключённöй. «Власовец». «Предатель». Коді тэ, Данил дядь? Ме тэ йылысь унатор тöда, но быттö нинöм ог тöд. Сідзи и мунін квайт пöв костö йи улö дзебöм думъясөн, тöжд-могъясөн, аслад раддунөн да шогөн. Но нюмъялöмөн мунін, ырзытöг, тырысь синватöг. Ме дырйи, ме водзын. Синъястö ачым тупки. Бөръяысь небыда ышловзин — и кусін. Öти здукөн. Скөрмытöг, олöм вылас зьвермытöг... Мортөн...

Но тэнö некор эз корлыны нимöдны Победа лун. Тэнад пиджак морöс вылад эз öшавны орденъяс да медальяс. Тэ вылö кöдзыда видзöдісны ловйöм кольöм фронтöвикъяс. А тэ öтарö мыйлакö нюмъялін. Мыйла? Гашкö, олöмас сэтшöмтор тöдін, мый прöстöй мортыс вежөрнас оз путымы гөгöрвоны? Кор тэнö вöчтöм мыжысь «весалисны», кутшöмкö правояс сетісны, тэ нинöм эн шу, некодöс эн аттьöав, а недыр мысти прöстö... унмовсин. Нэм кезлö. Диван вылад пукалігад, бара на нюмъялöмөн...

...Кор ставмирса вождь Сталин кулöм бöрын Илля Öдялы, Степанлөн пöчлы, кысянькö пошта пыр воис вель ыджыд сьöм вылö кабала, аныс чургöдöм бумага-квитанциятö эз босьт. Кинас и кокнас, кыз шуласны, йöткасис. Некусянь да некодсянь пö меным сьöмсö виччысьны, явö путайтисны. Босьтан, а сэсся кутузкаö шелöдасны. Код вылö сэк челядьсö коляс? Кöсьта да Данил пияныс война вылын русöй юръяссö пуктисны, кöдзыд мусыс найö оз нин чеччыны, а мукöдыс со ловъясь, сöмын тай татшöм деньгасö нырнас эз исавлыны. Да и син улынöсь найö ставныс, сідзи отсаласны, а пошта пыр ноксыны оз мöдны. Эз и босьт. Гордöй. Сöвестя. Но кад мысти бумагатö мöдысь вайисны! Почтальонкöд öтлаын сэк Öдя дорö тшöтш пырис сиктсöветса юралысь Лазар Кирилл. Босьт пö, Иллинична, деньгасö, кырымась бумагаас, челядь радиыд... Данилсяньыд пö тайö. Ловъя...

Керыштöм понöль моз уси сэк джоджö Илля Öдя. Поштальонкö эз чепöсйы, сьылдзирсö эськö чегис. Шемöсысла да кутшöмкö пытшкöс дойысла садсьö Öдя воштыліс. Мам öд...

...Илля Öдя аслас муoш кодь ён, зумыш верöсыскöд, Педөр Öнтипкöд, нэмöвöйся вöралыськöд, дас öти челядьöс удитисны чужтыны-быдтыны, кöкъямыс пиöс да куим нылöс. Кага вöчалан завод! Но тайөн водзті некодöс он чуймöд, быд семья — кага вöчан завод кодь. Мöдторйын дивöыс: ичөтсяныыс некод эз кувсьы, ставыс ловйөн колисны! Сиктсаяс шензисны. Кодсюрö — завидьтіс. Вөр Пöлыс да картаын баксысьясыс, буракö, аравасö помöдз кутисны. Семьяын Данил вöлі коймöд пиөн, 1911 воын чужліс. Педөр Öнтип, нималана вöралысьыд, гырысь пиянсö аскöдыс пармаад дугдывтöг кыскаліс. Мöдар Мыйын кöкъямыс вөр керка лэптылöмаось! Быд дивöас велöдіс пиянсö. Кöинъяс кодьöсь лоисны, збойöсь, тэрыбöсь да винёлось. Кодсюрö — бать кодьыс жö зумышось. А вот томджык пиянсö (тшöтш и Степанлысь батсьö, Митрейöс) кыскавны эз нин удит. Шуліс:

вöрас шöйтýсьыс натöг тырмö, мед шкетýяс школаын велöдчö-ны, тöдöмлун босътöны. Олöмас сгöдитчас.

Ачыс Öнтип сиктын нималіс сійön, мый роч кыв тöдіс. И... японскöйön матъкыны кужис. Царскöй армияын служитігас, 1905 воын, Япониякöд тышгъяс вылö веськалöма, торъя морскöй бригадаын пессöма. Порт-Артур дорын япошкаяслы аслас зыр кодъ тошка ёртъяскöд пленö веськалöма, рукопашнöй дырйи, куим тöлысь сэсся нянь пыдди ва вылын рис сёйöма! Таысь медся нин заведнö. Гренадёръясöс рисөн вердны?! Этатшöм муошгъяссö няньтöг кольны?

Куим тöлысь мысти пленысь лэдзöмаöсь, вежöмаöсь японечьяс вылö. Мунöй пö сэсся кытчö гажныд... Öнтип гортас и мöдöдчöма. Ылі Асывсянь ылі Войвылөдз куим тöлысь дзуртöма-мунöма. Воöма. И рочөн сёрнитны кужö! Нöшта японскöйön матъкö! Сиктсаяслы — дивö! А морöс вылас — Георгийлөн крест. Абу сідз-тадз! Дерт, невестапуыд татшöмыдлы сюрас... Öдйö и гöтрасис, кадыс тэрмöдліс, верстыö нин вöлі, нюжмасыны некытчö. И со тай кутшöм вынйöра котыр артмис! Овны да радлыны!

Но олöмыд аслас олöмön олö. Тадз. Аслас могъясөн, аслас кöсйöмгъясөн, аслас юрсигусьяса думъясөн... Мый юрас воас (эм кö юрыс), сійöс и вöчас, оз тай, небось, тэнсьыд юав. Оз тшöкмун. Шуис сывдыны-воштыны Педөр Öнтипöс, и воштіс. Война пансьöм бöрын (регыд мысти), колхоз амбар дорын ид пызь юклігөн, заведнöысла (тасыті тыр пызь татшöм арава вылö пайкөдісны!) швучковтіс веськыд пель бокас (Öнтип шуйгунөн вöлі) пышгъялысь синма, картупель ныра да гöрд шондіön ыгъялысь чужöма Микита Мöдестлы, бригадирлы, и шелöтитöдісны вöрса мортöс кытчöкö кар Човлань. Сэн и гантайтчис, гуалан местасö рöдвужыс öнöдз оз тöдны.

...А Ыджыд война вылö Данилöс босътісны 1941 вося август тöлысьын. Окотапырысь, колö шуны, мортыс муніс, тшебритіс на весиг кольöдчигас: час пö, вежон-мöдөн праквартам прицгъяс-тö, лы ни кучик наысь оз коль! Аддзöма-сь тай, код вылö зыртчыны! Сöветскöй Союз вылö, Сталин вылö?! Миян вылö?! Пуж петкöдлам.

Томлуныд! Ышö-башасьöмыд! Тöдны кö, мый морттö виччысьö... Данил бöрын Педөр Öнтип да Иляя Öдя позйысь фронт вылö чикышгъясөн лэбыштісны Кöсьта, Иван, Семён да Арсень. Вит пи, вит вок, вит пöрнöй мужик, вит чунь эновтісны муса чужан местасö, шувгысь пармасö, мед сувтöдны морöснас либö олöмнас вöвлытöм скöр да ён вöрöгöс. Быдöнöс на пиысь виччысис аслас Судьба. Олöмыс бара ворсіс мортлы гöгöрвотöм ворсöмön. Абу тай шегъясьöм. Водзвыв шуам: кыліс Енмыс Педөр Öнтип гöтырöс, сöмын чуньнас легöдыштіс жö: эз ставыс бöрсö локны... И эз тöд водзö олöмсö Педөр Öнтип, пиньяссö эз курчав, сьöлöмсö эз косявлы... Став сьöкыдыс, шогыс да дойыс пласыткысис Иляя Öдялөн пельпомгъяс вылö. Öти мөвпön оліс: сулавны, сулавны, кок йылысь не усыны! Овны, овны, овны... Челядьöс кыскыны, тшыгйысь мынтöдны... А дзoля пиыс, Елизар, война пансигас на сöмын чужис. Овны! Кöть кыдзи, но — овны. Быдтысьны... Кок вылын, кок вылын... Мöд ногыс оз позь!

...Данил письмояс кузя скуп вöлі, геждо фронт вывсянь гижасис. Тöлысь-мöдöн öти письмö гортсаяслы воліс. Главнöй — юöртліс, мый ловъя. А ошйысьны торъя нинöмөн. Вежон-мöднад, кызд мунігас квастайтчискöд, Данил немечтö эз пракварт. Öдйö тай гөгөрвоис, кутшöм сюра-тошка вөрöгкöд паныдасис. Öтчид ранитлісны нин, но кокниа. Ловнас дзикöдз эз жö усь. Гижис: фрицыс пö скөр, но помыс сылы воас. И водзö война йылысь нинöм. Сöмын öтарö юасис, кызди коми грездас олöм-вылöмыс, кызди бать (кувсьытöдзыс) да мам асьнысö кылöны, кызди чойяс да вокъяс, коді талун фронт вылын... Быд лун енув пельöсын, Богородича водзын, пидзöс вылас сулаліс Иляя Öдя да синва сорөн корис, мед пиянсö сьмертысь мынтас. Кöсьта, Иван, Семён, Данил, Арсень... Вит чунь, дзонь кабыр. Вир чутъяс, сёлöмшөръяс... Мамлы — пыр на кагаяс.

1942 вося декабр тöлысьын, öти мустöм сёд рытö, Иван Марья, сиктса поштальон, синва чышкалігмоз мыччис Иляя Öдялы «похоронка». Кöсьта пи вылас. Дыркодö полис керкаас пырны купайкаö тужуритчöм поштальон, но — бöрд да пыр! Кыз синва-өн и мыччис кабаласö. Топöдіс Öдяс ас бердас... «Похоронкаас» гижисны: геройөн пö усис немецко-фашистскöй вөрөгъяскöд тышын тiян пиныд — Константин Антипович. Помнитам пö сійöс, нöшта на ёнджыка вөрөгöс косявлыны мöдам. Пемдыліс сэк синмыс Иляя Öдялөн, пемдыліс... Ойзис бöрынджык турун сараяс, ырзöмөн бöрдіс, юрсисö нетшкис. Повзём чужöмөн видзöдісны мам вылас ичöтджык пияныс, тан жö чилзис медічөт нылыс...

1943 вося февраль тöлысьын Иляя Öдялы бара вайисны кутшöмкö кабала. Абу «похоронка», но сэтшöм жö шемöсмöдана, чуймöдана. Сэн вöлі пасйöма: «Ваш сын, Данил Антипович, пропал без вести в феврале 1943 года, во время боя возле деревни К.»

Иляя Öдялы сьылі вылас — нöшта öти из. Но сійö мам сёлöмнас тöдіс: кытöнкö окопъясын, снаряджяс улын, пыр на коп-расьöны Иван, Семён да Арсень. Вокъяс. Пиян. Енмыс кö эм, спаситас кöть найöс! А мый либö овны? Но колö овны... Колö быдтыны Öдялы сойборд улас кольöм челядсьö.

«Пропал без вести...» Кызд сідз? Кытчö мортыс вошö, кытчö сылö?

...Ёна дыр мысти нин Степан тöдмаліс, кытчö «сывлöма» Данил дядьыс. Генерал Власовлөн Мöдöд ударнöй армияын тышкасис, и дзонь армиянас öтлаын веськаліс немеч кытшö. Эз удит петны лэчсыс. Судьба. Но код шуис, мый армия сэк сдایتчис? Власов, колöкö, кисö лэптис, юрыс пыдын да, но эз жö армия?! Кызди вермисны, петалісны сэк кытшысь жуялöм салдатъяс да командиръяс. Öтияслы мойвиис, мöдъяслы — эз. Пельпомас ранитчöм да нöшта на кантузитчöм бöрын пленö веськаліс и Данил. А винтовкасö кисьыс эз лэдз.

Плен... Пывсянын öтлаын мыссигөн Степан аддзыліс Данил дядьлөн морöс вылысь донöдöм шомполөн «серпасалöм» звезда. Лагерысь пышгьялöмысь «метитлöмаöсь». Куимысь ёртъясыскöд ушымгайтліс Данил, да куимысь тай суöдлісны. Понгясөн косявлісны. Мыйла эз лыйлыны, кызд ловйөн коли — ачыс оз тöд.

Кутшөмкө вын вылас кутис, мыйкө дорйис. Эз-ө мамлөн кевмысьомыс да синваыс?

...Пленысь мынөмсö Данил омöля помнитис — сэтшөм нин слаб вöли. «Доходяга». Лы да кучик. Кор гөгөрвоис — сьölөмас ёнтыштис жö. Көть эз эскыссы, мый олөмас гудырыс-лөкыс помасис. Төдсьöма. Водзö вöлины СМЕРШ-лөн допросъяс. (Кытчö воштысян, кор тэ Мөдöд армияын служитин, а сідзкө, сдایتчин, а сэсся концлагерын олін? Мыйла ловъя?) И водзö вöли — Колыма. Чолөм, выль лагер! Сөмын öні — советскöй.

Водзö вöли — веж мороз да тильсьом-мырсьом. Даниллы — кокни удж. Рудник. Абу уран перъян, а зарни перъян. И Данил тайö «кокни» уджсö нажөвитис аслас кунас, аслас пегыртны позьтөм вöлянас. Эз сетчы сійö особистъяслы, эз кырымась допросъяс дырйи погонаяслы колана кывъяс бöрын.

Степан та йылысь төдö. Збылысь. Буретш сійö дыр мысти отсалис мездысьны мыжтөм мыжысь дядьыслы, гижасис, мед киритисны öшйөм «враг народа» нимсö. Районса военкоматö öти лун кезлө Мөскувасянь (фельдъегер самолётөн вайöма) мөдöдлісны шөр архивысь допрос кузя кадысла вижөдөм нин гумагаяс. Степан лыддис, и синваыс доршасис. Тыдалис, кыз гантайтөмаөсь дядьсö, но абу и чегөмаөсь. Медъёна «зильöма» кутшөмкө лейтенант Шубин. Заводитчö допросыс: кызди шуöны, көні чужин, көні служитин, кодъяс гортад колисны? Быд юалөм бöрын — Даниллөн кырымпас. Первойсö кырымпасъясыс зумыдось на, тыдаланаөсь. Көть Данил мыйлакө абу пасйöма ассыс ичөт вокъяссö (дзевис найөс, дзерөдөмысь полис?). А сэсся водзö мунöны юалөмъяс: кызди пленас веськалін, Гөрд Армияса салдат пленö оз сетчы, ачyd-ö сдایتчин, отсасин эн лагерад немечлы? И тан серпасыс вежсьö, гудырмө. Абу нин Даниллөн гижөмыс, кутшөмкө гөгөрвотөм шыпасъяс. Тыдалö, дубитöны мортсö, мырдөн тшөктöны ас вылас кутшөмкө мыж босьтны. А бöрас кырымпасъяс местаын — сөмын чукля-мукля визьяс. Некодз абу сöгласитчöма Данил, мый предайтис Советскöй рöдинасö. Сідзкө — ичөт чужан мусö, батьсö, мамсö, чой-воксö. Но особист аслас ордымысь некор оз кез. Гыжъяс кө веськалін — бурөн он мын. Лейтенант Шубин сюсь синнас век жö крукыштöма «мыжсö»: похороннöй командаын пö öти кадö вöлөмыд, кын шойяссö ас коддьөмъясыдкөд гуавлөмыд. Сідзкө — вөрөг! Лыйлам! Но лыйлөм пыдди гургисны Данилөс Европаысь Азияö. Скөтөс моз, скөт новлан вагонын.

Сталин кувтөдз Колымаад и «көлымайтис» сэсся. Концлагер бөрад Данилөс он нин повзьöд мөд лагернад, көть первой кадас татчөс охранникъяс прамöя жö лютуйтисны.

А коркө сэсся Данилөс лэдзисны. Дум ни вера, эз виччысь. Мун пö кытчö гажыд, сөмын гырысь каръясын мед матіберегын дукуд эз вөв! Аслад лымъя Комиад кө бөр синан, медбур лоö. Воліс чужан грездас Данил, юрсö мыччөдліс, и орчча сиктö овны вуджис. Гөтрасыны на удитліс, сөмын тай челядь мыйлакө эз чужны (лагерса мытаритчөмыс да кынмалөмыс, надейнö, уджсö вөчис, лөкысь имитис). Ки вежынь эз жö ов, пыр уджаліс. Но оліс кыздкө гусьöникөн, лөня, тэрмасьтөг, чеччавтөг, ызи-базитөг... Эз корлыны Данилөс Победа лун празднуйтны, эз нимөд-

лыны сиктын. Өтнас Артип Иван быд Победа лунö Данил дорö быть пыравліс, öти сулеятö кык вылад рективлісны. Важ олөмсö кык дзор мужичöй казътивлісны, а война йылысь — бара кыв ни джын.

Данилöс коркö «реабилитируйтисны». Фронтöвиклысь ним бөр öшöдісны. Боевöй медальяс весиг сетісны (архивысь награднöй листъяс серти). Но пöрысь морт мыйлакö эз радлы. Сöмын синваыс петыштис. Кыдз шуласны — тöлыс вазьöдіс. Эз нимкодъысла, кутшöмкö мöд помка вöсна. Тöлысь мысти мöдаръюгыдас и муніс. Мучитчътöг, ойзытöг. Унмовсис, и эз нин чеччы. А таöдз, во джын эз коль, гöтырыс кувсис. Гуалісны Данилöс лöня, этша йöзöн. Эз чардавны салютъяс, эз сяргы лытöм кывъя сиктса юралысь. Но таысь Даниллөн лолыс эз майшась. Степан тöдіс.

Паметь небöгыс Даниллөн кулöм бöрас нин петавліс. Пасйöма: «Данил Антипович К., чужліс 1911 воын, армияö босьтісны 1941 вося августын, радöвöй, десантник. Вошис 1943 вося февраль тöлысьын».

Курыд нюмөн гижöдсö сэк лыддис Степан. «Проквостъяс, гижысьяс! Кымын во тiянкöд орччөн мортыс оліс, эн и казавлöй...»,— сöмын тайöс думыштис.

«Сылөн нимыс абу тöдса»,— шулісны коркö усьöм салдатъяс-лөн öтувъя гуяс водзын.

«Тэнад нимыд тöдса...— шöпкис Данил дядьлөн гу дорын Степан.— Но кодлы таысь кокниджык? Мыйся олөм? Артип Иваныдкöд регыд паныдасян, эм кö выліас югыдыс, аддзан, мый йылысь сыкöд варовитны. Гашкö, буретш сэн шөр правдаыс эм? Ок-ок-ок... Шойччöй, бөръя курыд война тöдлысьяс... Сы пыр мунысьяс. Миянöс дорйысьяс. Миянöс чужтысьяс. Миянöс велöдысьяс. Прöститöй... Олігас нин мудзинныд...

Тэнад нимыд тöдса —
Тэнö ме ог тöд.
Йöзыслы тэ пöдса.
Йöзыслы тэ — мöд...»

Гöрд галстук

— Дед, видзöд!— горзö Матвейлөн ыджыд батыөн шуысьыс, дас арöса Данилка.— Меным со кутшöм гöрд дöра сюри! Жыт-ныкысь! Бабыд сэн пелькöдчö, лишнöй көлуй-мöлуй шыблалö, вот и кватиті. Век броткан, сиасьны пö пелысь оз тырмы. Вот тайö дöранас и сиасян! Юр жуглыны оз ков. Югыд рöма тай, тэд кажитчас, абу чусмöма, сьöла-тарыд ачыс лэчкад пырас!

Нюмъялö Матвей. Нукуыс вылö. Верстыö морт моз сёрнитö Данилка, быттö прамöй лэчкасысь. А ачыс — карын олысь. Öтчыд и нуліс маті лэч туй вылас сійöс Матвей, а вот тай... Бöрсаөн нин асьсö лыддьö. Мед... Рöдас кö кыскö, бур...

Данилка, варов мортыд, таргö:

— Дед, мыйся гöрд лестук? Знамялысь помсö ножичөн шöрыштöмаöсь!

— Галстук...— водзё нюмъялө Матвей.— Пионерскöй галстук...

— А-а-а...— шуё нукус.— Кывлі батьсянь да мамсянь. Тайö гөрד дöрасö водзын и новлісны сьылі вылас?

— Мыйла сьылі вылас?— чуймыштö Матвей.— Сьылі вылад сьöкыдтор новлöны. Стöча сёрнит. Голя гөгöрыд водзті галстуксö гартыштлісны. Шарп моз. Сöмын гөрöдөн.

— А тэ пионернас вöвлін жö?— сиргаг моз оз лэдзчысь, юасьö Данилка.

— А кыз нö?— вашгьялө Матвей.— Вöвлі, дерт. Öнöдз казь-тыла.

...Важ школаын на (öні öкöлыс нин абу) делöйс вöлі. Торжественнöй линейка. Став школа — öтарсянь. Дас вит морт — во-ча нырөн. На лыдын тшöтш Матвей. Тушанас — медся ичöтик. Квайт арöсөн мырдөн-сорөн, мам-батьсö пыкөмөн, пырис школа-ас, эз на удит суöдны «верстьöджык» ёртгьяссö. Та вöсна — медся бöрын. Тіпкöны сьölөмгьяс. Весиг быттö горшас тасасьö сынöдыс, оз тырмы... Вазьöны сингьяс... Менö примитöны пионерö!!! Ме талун лоа пионерөн! Ме пасьтала гөрд галстук! Ме — пионер!? Да! Да! М-ме тöда тайö котырлысь законгьяссö!

Пионер пыгди пуктö ассьыс Чужан мусö, партияös да коммунизм!

Пионер дасьтысьö лоны комсомолечөн.

Пионер видзöдö тышын да уджын геройяс вылө.

Пионер кутö аслас паметьын тышгьясын усьöм воингьясöс да дасьтысьö лоны Чужан му дорйысьөн.

Пионер зильö велöдчöмын, уджын да спортын.

Пионер — честнöй ёрт, пыр сулалө правда вöсна.

Пионер — октябрыталөн ыджыдджык ёрт да юрнуöдысь.

Пионер — пионергьяслөн да ставмирса уджалысь йöз челядь-лөн ёрт.

Пионер... Помнитö, помнитö Матвей, кызз топавліс пионерö пыртігөн сылөн лолыс! И нöшта помнитö вылысь пыртөм пионергьяслөн радын медводзён сулалысь Сажин Кириллös, öти парта сайын пукалысьös. Правофланговöй! Кирилл — тэчаса зонка, мыгөрнас да тушанас ставсьыс ыджыд. Та вöсна и веськыд флангын. Вылө лэптөм юр, банийштөм чужөм, юггьялысь сингьяс... Оз эськө веськыда аддзы Матвей (бөргьяөн сулалө) Кириллös, но — тöдö, мый буретш тадз. Вежон нин Кириллөн сöмын öти сёрни: пионерөн лоас! А водзё — комсомолечөн. А сэсся — коммунистөн. Батьыс, Иван Андреевич, вылө видзöдö Кирилл, сылөн туйöд көсйö мунны. Иван Андреевич — коммунист (армияс на пырлөма), совхозын парткомса секретар. Бокысь локтөм (совхозö зоотехникөн мөдөдлөмаös), но пыдди пуктана морт. Стрөг.

...Стрөг. Та вöсна и вошис Кирилл му вывсьыс. Арнас, öти пекнича луно, урокгьяс бöрын, ыджыд батыскöд дасьтысис Эжва сайö петавлыны. Каркапалич местаö сиасьöм ради. Пелысьтөм во жö сэк вöлі. Вомгорулас броткис пöрысь морт, бара пö нинөмөн самасьны. Вот и думыштіс дедыслы отсыштны Кирилл:

вундаліс ичотик торъяс выlö өти кумач галстук (сылөн гозмод на вöлі). И колö жö, батыс казяліс! Пажнайтны гортас пырöма, коть эскö луннас гежöда воывлö. Лёкыс горзіс пи вылас. Укöрайтіс. Тэ пö пионер нимтö няйтöсьтін! Öні пö тэ галстуктö ножичөн вундалан, а модыс — мортос виан, он дрөгнит! Кирилл дор сувтіс ыджыд батыс: мый пö вувзысин зонка вылас, гөрд лестукыс жаль? Унаөн пö гөрд дöранад самасöны. А татшöм галстуктö быд пу улыс позьö босытны, лавкаын тай вузалöны...

Öні пöрыс выlö воча вувзысис Иван Андреевич. Не сідз пö велöдан том мортсö овны, лөж туйöд нуан, важас кыскан. Пионер пö — сійö жö коммунистыс, сöмын томджык. Тэ пö ачыд фронт вылын вöлін, тöдан: знамятö вöрзöдны оз позь. Тшöтш и галстуктö. Галстук — ичотик знамя! А этійö зырымбеддыс вундалöма!

Чорзис фронтöвик. Горöдіс жö зять вылас:

— Тэ войнасö эн тöдлы, ланьт! Голя гөгөр öшöдöм гөрд лестукыд — абу на боевой знамя, лешакмашина! Знамяыд тай — паса, номера, öтчыд сетöны. Воштан — позор, и частьтö бырöдасны. А галстукыд — галстук и эм. Тэ серти кө, и кулöм мортлы гортсö эжны гөрд дöраөн оз позь? Эжöны тай, тэнсьыд оз юасыны! И некод оз дзурт тэ моз. Партейной лоин да, видзöдөмпырыс, тшыксьыны кутін. Корсюрö ныртö лэпталан йöз водзас. Полöны весиг тэыс. Коммунистыд — абу чин! Война кадö, помнита, радөвой коммунистлөн öти чин вöлі — медводз атакаö петны...

— Тэ сэтшöм жö! — некыз оз сетчы зятьыс. — Öлöдöм да велöдöм пыдди нуктö доръян? Мый сыыс петас, быдмас да? Рöдинасö предайтас? Партияös предайтас? Нинöм ог тöд! Татшöм пийд меным оз ков!

Кириллань чуньсö нюжöдö:

— Выхьлунö школаад мунан, став водзас пидзöс вылад сувтан да висьталан, кыз галстуктö сам выlö ножичөн вундалін! Прöща коран. Вöтласны кө пионерсьыд — мед вöтлöны! Лёк вöчöмсьыд колö вештысьны. Прöститасны кө — налөн делö. Он висьтав — ачим муна да янöда! Шуи кө — вöча! Тэ менсьым кывйös тöдан! И некутшöм вөрö тэ ыджыд батыдкөд он мун!

Кыз синваөн ойдіс сэк Кирилл. Шыльöдіс нукуслыс юрсисö ыджыд батыс. Юрнас довкйöдліс. Вот пö и морт... Кын...

...Аскинас Кириллос турун сарайыс аддзисны. Сёр выlö гезйөн öшöдчöма. Гижöдтор кольöма, ог пö вермы став водзас пидзöс выlö сувтны, сэтшöм ыджыд мыжсö эг вöч... Сиктсаяс дрөгмунісны, шемöсмисны: оз помнитны таöдз, мед дас арöса детинка öшöдчис! Мый тойыштіс? Мыйся сьод вын? Став сиктөн гуасисны, пöрыс и том бөрдіс: сэтшöм шань детинка вöлі! Кыз синваөн бөрдіс и Кириллөн батыс. А сэсса гижöдыд йöзасис... Иван Андреевич быттö стенö юрнас люкасис: пыр жö öтдортчисны сы дорыс сиктсаяс, таöдз видзöдыс шоньд синъясыс көдзалисны, йизисны. Эм тай сыланкыв, сиктад пö некытчö он воштыс, он саймовтчы... Сідзи и эм. Пыдди пуктöмыд кө быри — нэм кежлö... Парторгыс Иван Андреевич ас вöлясьыс петіс. Көсийс бокö сетчыны, но гөтырыс зэвтчис, мун пö

отнад, пилон тані гуыс, ог коль... А сэсса вөвлөм парторг юсис, и во мысти арся няйт гуранын, зэригөн, код юрнас пөдіс. Гуалисны пиыскөд орччөн. Йөзыс эськө волісны, но ёнасө эз бөрдны, эз жалитны. Татшөм олөмыс... Ставсьыс колө вештысьны.

А ичөт Матвей эз жө дыр пионерав. Коркө төвнас Эжва сажы вуджис, байдөг вылө пуктөм налькъяс видзөддыны. Ичөтик ноппй няньтор босьтис, штопө — юмов чай... И рөк вылад лямпасыс кок гартан кучик вөнъыс орис. Лымйыс небыд, вөйтө, а колө кызкө бөр гортө воөдчыны. Быттө бара жө рөк вылө, нописьыс пионерскөй галстук сэк сюри (кызди веськалөма?). Көрталіс сійөн гын сапөг подсө да вөляникысь таппис гортлань. Мир туй вуджигөн гөрд галстуктө Игутова Маша, Матвейкөд өти классын велөдчысь, юрсигусь кодъ визув нывка, казьяліс. И став сикт пасьта рака моз карзыны мөдіс:

— Изьдевайтчан галстук вылас? А ещө пионерөн шусян! Позор!

Пионер — честной да верной ёрт, пыр сулалө правда вөсна.

Мөд асывнас Матвейөс учительскөйө корисны, бун-бос пинялісны да пионер радъяссыд вөтлісны. Галстуксө нетшыштисны. Татшөмыдды пө пионерияын абу места. Матвей первойсө бөрдзыліс, а сэсса өдйөкодъ и бурасис. Сөмын Игутовалысь көсасө перемена дырйи вель ёна тракйис. Аслыс шуис: абу ставыс пионеръяс миян школаын, сідз жө тай велөдчөны. Бур, мый школаысь эз вөтлыны. Кирилл моз Матвей таысь оз өшөдчы. Кор вөтлөм йылысь кыліс батысь, пинь пырыс сөдзтіс: «Мый сэтшөм котырсьыс, көн быд нинөм абусыс вөтлөмөн грөзитчөны? А вөрас кө колин да кынмалін, бурджык лои? Олөмыд донджык. Мый лоны — лоис. Эн жалит!»

Эз и жалит сэсса Матвей. Но өти пөрийө век жө крукасьліс. Пионерысь вөтлөм бөрад сійөс комсомолад эз примитны. Оз позы! Лякөссис! А зонмыс ёна көсийс армияын пограничникөн служитны.

Но граница вылад комсомольскөй билеттөг оз нуны. Кевмысис на военкоматын, гашкө, кызкө позяс билетсө гусьөникөн босьтны? Вак-вак сералісны. Сёр нин пө боржомитө юны, гыркыд кө абу. Ковмис сэсса артиллерияын служитны. Матвей оз каитчы. Бура служитіс, отпускө лэдзлісны, гортас сержантөн локтіс.

Бөрас трактористө велөдчис да пенсияөдз совхозын и мырсис, нинөм вылө да некод вылө эз элясь. Бур нылөс на крукыштіс гөтыр вылө, Полинаөс, нель челядьөс кок йылас сувтөдісны. А со и нукъяс нин шегъяс моз кок улын гартласьөны, пөрысьяслы радыс.

...И вот өні гөрд галстуксө Матвей кинас малалө, нюмъялө, мыйкө мөвпалө... А Данилка пыр на таргө, весиг сойбордөдыс ыджыд батысь тшапкөма.

— Эй!— шуө.— Ыджыд баты! Вошин али мый? Он тай нө менө кывзы! Кытөнкө лэбалаң? Лөсялас тайө дөраыд гөрд сам вылад? Али оз? Эй, дед!

Матвей быттө сайкаліс. Виль синмөн видзөдліс Данилка вылө. Нюжөдөмөн вочавидзис:

— Э-э-э... Лөсялас эськө да... Сөмын вот галстук... Сэтшөм жө флаг... Со мый вөчам, Данилка: тэ тайө галстуксө ыджыд

мамьды сет, мед мыскалас да гладитас. Шуан, ме тшөкті. А сэсся сійос аскөдыд карад босьтан. Тіян школаад эм кутшөмкө музейтор? Вот сэтчө и козыналан. Мед видзөдөны сильөпиян. Оз позь тайос сам вылө... Оз позь паметьтө урсавны, грек... Галстук — чесьт... Коркө бур котырөн пионерия вөлі, нинөм и шуны, ас местаас. И челядыд талунъя серти шаньджыкось вөлісны. Кывкутысьсь. Комсомол да пионерия вот кисьтисны, а выльторсө эз чужтыны. Забеднө. Ставөн — ас кежысь, быдөн — торъя... Бөрыннас тайос гөгөрвоан, кад кольөм мысти... А кумачыд лэч вылад мянлы тэкөд сідзи на сюрас Жытникас этша важ гөрд дөраыс? Мун да корсь! Аддзан!

Данилка быттө жугыльпырысь видзөдліс Матвей вылө:

— Но-о-о... А ме радлі... Мися, лэчкө лөсялас...

А сэсся долыдджыка нин шуис:

— А мый? Карө и нуа! Музейө сета. И шуа, тайө галстукыс — менам деддөн на! Мед видзөдөны!

— Мед!— серөктіс Матвей.— Тадзи и шу!

Ачыс мөвпаліс: «Абу эськө менам да... Батьыдлөн, буди... Но нинөмтор, абу гижөма...»

И кызкө пөрысь мортлөн сьөлөм улас шондөдіс, мыйкө быттө личаліс... Быттө кутшөмкө буртор вөчис мөдаръяугыдын войлалысь Кирилл ёртыслы, коді нэм кежлө колис йөз паметьын том зонкаөн...

«Прөстит, Кирилл,— ас пытшкас сёрнитіс пөрысь Матвей.— Выліас аддзысям да, менө, пөрысь выжывөс, он и төд... А тэ пыр томөн колян, сөстөм да чукрыястөм чужөмаөн... Вот тадз, Кирилл...»





Анжелика ЕЛФИМОВА

Тані толаас петöны овны

КЫВБУРЪЯС

* * *

Миян йылысь гижа кывбур,
Кужа кö.
Кодкö лыддысьысь öд лоас,
Чужас öд!

Гөгөрвоас менсьым этша
Кывъясöс,
Кöнi аддзытöмöсь серъяс,
Шыясыс...

Со пö, шуас, кутшöм муслун
Вөлöма,
Кыдзи тöрлöмаöсь öта-мöдлөн
Сьөлöмас!..

И оз инась сэсся некыдз
Тулысас,
Кутас корсьны татшöм муслун
Му вылас...

* * *

А сэсся, Сашук, уяс лым
Да пукяс төв!..
Ми мудöг вылысь лэдзам дадь
И лызь на лэдзам.
Ме тэныд, Сашук,
Сэтшöм лымморт тэча,
Öд тэнад төлыс прамöясö
Эз на вöв!..

Ми кутам тэкөд собавны
Быд лун,
И туплясьны быд лун
Нелямын нельысь!
Ми тайö төвсö, Сашук, тэкөд,
Ок, и коллям!
И сійö мян сэсся
Некор нин оз вун!..

* * *

Вунлöма нин сиктса олöм.
Кысь оз вун!—
Бöра-водза татчö волі,
Сунлі дзум.

Пывсянö да паччөр вылö —
Кык кок туй.
Гöсьтö пöри,
Кöзьяйкаö — эг и туй!

Сідзкö, велöдчыны выльысь
Воис кад.
Чайта, Енмыс сәні, выліас,
Лоас рад!..

* * *

Кадыс — комын квайт да квайт,
Лымйыс енэж весьтас
Шлапкö.
Кыла: варовита аскөд,
Корся рифма: квайт, шайт, кайт...

Кывъясылöн шыыс — дон!
Сотчö кылöй!
Лолöй сотчö!
И тэ мекöд куйлан орччөн,
Сэтшöм мича,
Сэтшöм том!..

Идöг

Абу еджыд,
Ни абу бордъя.
Йöзö петас кö, он и тöдмав.
Сöмын менам тай! Сöмын ловъя!
Медся матысса рöдсьыс
Рöд на!

Öти Эжваысь
Öти войö
Миян öтвылысь

Юсьома васö.
И öтлайн öнi, кöть торйөн
Сыкöд вочаалам
Быд асыв...

Сикт

Г.Бутыревалы.

Танi лыддьöны лымсö
Оз чирьясөн.
Танi лыддьöны лымсö
Зырьясөн.

И оз горзыны:
«Ой, кутшöм мича!»
А шуöны:
«Сапкöма, видзöд».

Танi толаас
Петны оз повны,
Танi толаас
Петöны овны.

И сэтшöм
Эз босьтлы на курыд,
Мыйысь лымйыс тан
Эськö эз бурöд...

* * *

Бытьö Му вылас ме,
И бытьöкö ме вылын Муыс.
Бытьö восьлала ме,
А ме пытшті котöртö туйыс.

Бытьö тöда, мый ме,
Ме и эм тайö став
Вöльной светыс!
И кутла сэн кагаөн,
бытьöкö
Ачымöс
верстьö-Поэтöс...

* * *

Войбыд лимзалі,
Ачымöс жалиті:
Ок тэ, коньöрöй, шуалі,
Нылукой,
Ок тэ, виралысь сьöлөмöй,
Донай.
Мый нö тэкöд
Со вöчöны-керöны?!

Асъядорыс тай унмовси.
Видзöда:
Еджыд идöгыс меланьö
Лэбовтіс.
Чöвтис пернапас,
Муöдзыс копыртчис.
Шуис: ставыс тэд бур вылö,
Кагукöй...

* * *

Зэрыс пöтнысö некыдз оз вермы
Мусö окавны-любитны
Кöсйöмсьыс,
Кытчö воан он зэрөн,
А зэръясөн!
Кытчö воöмыс —
Ставнас и олöмыс,
Ставнас-ставнас,
Мый вежöрыд шымыртö.
Кытчö, гашкö,
Эз чайтлы да, уськөдчис,
Мыйла Енмыс со
Тадзикөн шуöма...
«Мед дырджык на тölөдзыс!» —
Кевмыся.
Öд и менö тшöтш
Татшöмыс топöдлö...

* * *

Петыр Апостол
Кор ва вывтi мöдöдчис,
Поліс öд! Кутшöма поліс!
Тырмас-ö лолас
Выль чепöсйöм-эскöмыс,
Тырмас-ö та вылö
Лолыс?!

Сідз жö и ме
Со нö — пола да тірала,
Мый кöть и му вывтi муна:
Тырмас-ö эскöмöй,
Жебиник эскöмöй,
Ставсö, мый сетöма, нуны...

* * *

Менам ставыс, ен сыкөдөн, артмö,
Менам ставыс, ен сыкөдөн, бур.
Кымын кок туй лөдöма —
Ог артав.
Водзö кок туйясысь
Кольмö юр.

Мусаясöй дзоньвидзаöсь,
Слабог!
Слабог, сьöлöм радейтöмөн
Тыр!
Мед кö ставсö вöча
Кыдзкö ас ног,
Но öд ставсö вöча
Енмыс пыр!..

* * *

Льöмйыс зэрсьыс дубалис,
Сідзкö, пелысь — юммис.
Коді мый эз шуавлы —
Быд кыв пöрис нюмö.

Коді мый эз тунавлы,
Бурыс сöмын иніс.
Паныд локтысь, сулавлы —
Колö шуд тэд сины!..

* * *

Ставсьыс, мый вöлі,
И ставсьыс, мый лоас,
Аттьö Тэд, Енукöй, аттьö!


Ме пытшкысь воясöс
Лун и вой разин кö,
Сы пыдди вежөрöс каттин.

Сы выйöдз лöсьыд,
Ок, сы выйöдз лöсьыд мем
Инасьны тöдöмад Тэнад.

Шуд, көнкö, менам кодъ
Кывзысьтöм лолыслы
Лоны пыр кывзысьысь Еннад?!.

❖ ❖ ❖

Александр УЛЬЯНОВ



Марковлөн бөръя туй...

О ЧЕРК

Водзкыв пыдди

Лыдтөм-тшөттөм мортлысь чегис-жугөдіс лад вылө пуксьөм олөмсö бөръя Ыджыд войнаыс. А лыдтөм-тшөттөм том зон да мича ань, аския мам-батъяс, эз воны гортаныс, пуктісны юрнысö лёк вөрөгкөд тышын, куйлөны ас мусьыныс бокин. Коді васөд нюрын, коді сук-пашкыр вöрын, коді кыддза раскын, а унасьыс-унаөн и суйөр сайын, Европа пасьтала. Кодкө юөртөг вошöма, кодкө сьöкыд дойясысь кувсьöма, кодкө немеч кытшö веськалöма да петнысö абу вермöма... Öтияс война пансигас юрнысö пуктöмаөсь, мөдъяс — сьöкыд тыш помас нин. Төв и гожөм, ар и тулыс — дзик быд лун апалöма-нылалöма йöзтö адгоршыд. Нель во чөж дорвыв...

Ыджыд войнаыд бокиті эз кытшовт и Коми муöс, татчöс сикт-грездъяс. Быд керкаö колис сійö ассьыс сьöд пассö, быд семьяысь нетшыштіс медся пöрнöй йöзсö, олөм пыкөд кутысьясöс — бать-мамсö, пи-нывъяссö, налысь рөдвужсö... Синваыд доршасьö таысь да сьöлөмыд бөрдö. И кысь нö сійö оз бөрд, кор аддзан: кымын морт лов, тшөтш и Коми муысь, апыштіс бөръя войнаыс. А эз кө сійö ыпнит-пансьы, кутшөм бура эськө ми öні олім! Да мыйтаөн эськө вöлім!

Кадтö некыдзи он сувтөд. Пыр ылыстчö и ылыстчö миянсянь тайö вир кисьтана Ыджыд тышыс. Но курыд война, быттьö бурдлытөм дой, дыр на кутас орсявны йöз сьöлөмъясын, казъ-тивны коркөя ылі да сьöкыд вояссö, виччысьтөг восьтыны-мыч-чөдлыны миянлы уна гусятор, код йылысь водзын эг и тöдлöй. А тöднытö быть колö, и оз сöмын том войтырлы, миян аския лунлы, но и став йöзыслы.

...Коми муын олысьяс пуктісны бур пай лёк вөрөгöс вермөмö. Ыджыд тыш вылө мунліс матö 170 сюрс морт. На пиысь быд

коймодыс бёрсö эз лок — ытшкыштiс пeж война. Дас куим сюр-сысь унджык мужичöй-аньлы вичмисны орден-медальяс. А медся-медся повтöм да збой войтырыслы вöли сетöма Сöветскöй Союзса Герой ним. Татшöмыс республика пасьта артавсьö талун кeжлö комын кöкъямыс морт. Геройяс петöмаöсь Коми мулөн быд пельöсысь. Эжва йылысь, Изьва вожысь, Койгорт да Чилимдiн районъясысь, Сыктывкарысь, уна мукöдлаысь... Ставнысö öмöй лыддьöдлан! Быдса куим геройöс страналы быдтöмаöсь Луза вожса сикт-грездъяс. Тайö Ношульысь Семён Алексеевич Сердитов, Спаспорубысь Виктор Иванович Лобанов да татысь жö Иван Петрович Марков. Öти сиктысь кык Герой! Гежö да овлö татшöмторйыд. И куимнанныс, кöть и комияс, торъялöны, дерт, ёрта-ёртсыыс. Но на пиысь быдөнлы лöсялö, быдөнöс матыстö öта-мöд дорас да бур ногөн öтувтö «медся» кыв...

Ношульса Семён Сердитов — куим пöвстсыыс медся олöма морт. Усигас сылы буретш тырöма комын öкмыс арöс. Сержант, взводса командир. Повтöмлун петкöдлöма Днепр вуджöм бöрын Казачий дi кутiгөн. Сысянь матын, 1943 во помын, и пунктöма юрсö. Дзeбöмаöсь Украина муö, Киев дорса Лютеж сиктын. Гортас кольöмаöсь мам-батыыс, гöтыр да посни челядь.

Виктор Лобанов — куим пиас медся том Герой. Тайö ыджыд нимсö сетiгкежлö зонлы муртса тырöма дас кöкъямыс арöс. Полкса разведчик. Старшина. Сёр арын куимысь дорвыв вартчылис Днепр ю вомөн, медым лöсьöдны ю мöдарас вуджöм десанткöд йитöд. Ловйөн воис чужанiнас, Коми муö. Уджалис «Вычегдалес» комбинатын, «Комилеспром» объединениеын. Кувсис 1996 воын. Геройöс дзeбисны Гёрд Затонса шойна вылö.

А Иван Марков — Коми муын медводдза морт, кодлы сетiсны Сöветскöй Союзса Герой ним (1940 вося апрель 11 лунö). Таöдз дзирдалис нин морöсас «За отвагу» медаль. Иван Петрович артиллерист, лейтенант, сэсса старшöй лейтенант. Повтöмлун да ыджыд сям петкöдлис белофиннъяскöд косясын, торйөн нин Выборг дорысь Туркин-Сари дi босьтигөн. Тайö сьöкыд тышсыыс и вичмис Марковлы страналөн медыджыд наградаыс — Ленин орден да «Золотая Звезда» медаль.

Луздор районса куим герой йылысь талун ми унатор нин тöдам, тöдам газет-журналъясын йöзöдöм статья-очеркъясысь, коркö петалöм да öнi петысь небöгъясысь, коми теле-



видение да радио передачаясысь. Тöдам, но, тыдалö, ог на ставсö. Торйөн нин тайö инмö-лöсялö И.П.Марковлы. Сылөн олан туйыс юксöма кык пельö: первой юкöныс, кузьджыкыс, мунö-тэчсьö немечкöд Ыджыд война пансытöдз, мöдыс, зэв

дженъидикыс — война сувтѳм бѳрас. Ётиас кѳ быттѳ ставыс ясыд, гѳгѳрвоана да тыдалана, повтѳм мортлѳн туй мѳд юкѳныс чужтѳ уна майшасяна юалѳм. Со мый, шуам, висътавсѳ Коми республикаса Паметь небѳгын (мѳд том) Герой йылыс (сетам рѳчѳн, кыдзи эм): *«Марков Иван Петрович1, 1913 г.р., уроженец с. Спаспоруб. Призван Прилузским РВК в 1935 году, ст. лейтенант, командир батареи. Служил в 58 АП 13 СД. Погиб в июне 1941 г. в Белоруссии. Герой Советского Союза»*. И став ловнад эскан гижѳмаыслы, кыс нѳ он эскы! Мыйта йѳз ѳд дасътисны тайѳ кыз книгасѳ, мыйта вын пуктисны, кымын во корсысисны... Сѳлѳмтѳ чепѳльтѳ коми зонлѳн олѳм помыс: сідзкѳ, усьѳма сійѳ, рѳкыд вылѳ, немечкѳд война нырас на, 1941 вося гѳжѳмын, кѳнкѳ Белоруссияын. И став юѳрыс. Босът да аддзы сы серти, кѳнѳ пуктѳма юрсѳ мян герой, кытчѳ дзебѳмаѳсь повтѳм салдатѳс, эм-ѳ сы гу вылын кѳтъ кутшѳмкѳ пас? А йѳткыштѳ менѳ тшѳтш корсыны вѳчакывсѳ тайѳ да мукѳд юалѳм вылѳ сыктывкарса олыс, война кадѳ юѳртѳг вошѳм салдатъясѳс туялыс, пѳсь сѳлѳма коми морт Виталий Степанович Трошев. Чужлѳма сійѳ Усинск районса Васькин грездын. Помавлѳма Ленинградын вылыс тшупѳда партийнѳй школа да Москваын видз-му овмѳс академия. Уна во зільѳма ас районас Сем Ѵндрей сиктсѳветса предѳн да «Севернѳй» совхозын парткомса секретарѳн. Сійѳ неважѳн волѳс «Войвыв кодзув» журнал редакцияѳ, да ми сыкѳд бурджыка тѳдмасим. Мортыд абу нин ѳна том, сизимдас арланъ матыстѳчѳ. Но вель на востер да зумыд тѳчаса, война йывсъыд висътавны мѳдас да ѳзйѳмѳн ѳзйѳ. Ѵдйѳ и казялан: абу веськодъ сылы ылѳ кольѳм порока-тшына кадыс, код пыр мунлѳма тшѳтш и корсысысьслѳн батъыс, Степан Степанович. Ловйѳн эськѳ бергѳдчѳма гортас, ѳнѳя Усинск районлѳн Васькин грездѳ, но сѳмын 33 арѳсѳдз и сетѳма Енмыд овны сылы вѳльнѳй сѳветас. Кык посни челядъ-ѳс, ныла-пияѳс, кольѳма ас бѳрсяыс. Тшыг нисѳ пѳт мамыс сѳсся быдтѳма найѳс, кок йыланыс сувтѳдны сяммѳма и, велѳдны на и... А усьѳм салдатъясѳс туялан уджѳ босътчѳма во кум сайын. Кыдзкѳ дзик виччысьтѳг. Гѳтыр пѳ бокѳ тувкѳдѳс, корис корсылыны аслас дядъ Артеев Демъян Яковлевичлыс туйпомсѳ, кодѳ юѳртѳг вошлѳма кольѳм война кадѳ. Вѳлѳма миномѳтчикѳн, взводса командирѳн, младшѳй лейтенант. Бура дыр лоѳма Виталий Степановичлы ноксыны-гижасыны, лук-йысыны интернетын. И шудыд ѳд абу бергѳдчѳма зиль мортыдлы мышкѳн. Тѳдмалѳма Трошев: вѳлѳмкѳ, Белоруссия му мездѳгѳн пуктѳма юрсѳ гѳтырыслѳн дядъыс, 1944 вося февраль 5 лунѳ. Дзебѳмаѳсь Петровичи грезд дорѳ. Овнас сорсыѳмаѳсь усьѳмаясѳс гижалысыс бѳа кадад — Артеев пыдди Артяев пасйѳмаѳсь. ди шыпас и вежсыѳма, а нокыс мыйта! Сѳсся пѳ ставыс лѳсяліс: и кодѳн служитѳс, и кѳнѳ да кор чужліс...

Та бѳрын Виталий Степанович, ловнас кыпалѳма да, нѳшта зільджыка мѳдѳма корсысыны, туявны кольѳм война дырйи вошѳм йѳзѳс. Некодлѳн велѳдтѳг, некодлѳн индавтѳг, ас вѳля сертиыс. Сѳлѳмѳй пѳ тадзи тшѳктѳ вѳчны, вежавидзана чѳвтѳс войнаса ветеранлѳн пи да небыдика содтѳс:— Ми усьѳмаяс водзас нѳм помѳдз уджѳѳзаѳсь...

Ёскѳй кѳтъ энѳй, а некымын воѳн Виталий Степанович сям-

мёма корсьны куим сюрс сайё вошлём салдатлысь туйпомсё. Коми мулөн уна пельёсысь: Сыктывкарысь, Изьва, Удора, Кёрткерёс, Усинск, Луздор да мукöд районысь. Позьё шуны, дзик öтнас туясьöма-ноксьöма, дзик öтнас бергöдöма тайö зэв кывкутана да олöма морттö мудзтысь уджсö. Абу тай, майбыр, повзöма, абу öвтыштчöма сы дорö шыöдчысьясось. Быдöнлы зильöма отсавны, быдöнлы сетны надея: гашкö, эз на дзикöдз вош налөн пиыс ли, верöсыс ли, гашкö, сюрас на коркö да кыськö лов помыс... Мед кöть и война кусöмсянь сы мында во нин төвзис-колис.



А недыр мысти, аснаукөн жö, Виталий Степанович босьтчöма тöдмасьны Коми муын чужлём, Коми муысь петлём Сöветскöй Союза Герöяслөн олан туйöн. На пöвстысь пö медся шензьöдiс Спаспоруб сиктын быдмылём И.П.Марков. Öтилаысь пö лыддя сы йылысь öтитор, мöдлаысь — дзик мöдтор, да нинём ог гөгöрво. А кор ачым босьтчи лукйысьны война кадся кабалаясас, унатор вылö синмöй воссис. Марков йывсьыд пö шуа...

— Мый нö выльыс сюри?— лов шыöс кутöмөн юала ме Виталий Степановичлысь.

— Паметь небöгад, ме думысь, Марков кузяыд пöръясяна юөр сетöмаöсь. Некутшöм 13 стрелковöй дивизияын сийö эз

служитлы. Немечкöд война пансигас...

— А кöнi нö, сiдзкö?— чепöсйис менам вомысь.

— Рытыввыв фронтлөн 121 дивизияын. Та йылысь висьталöны часьтыслөн документъяс. Найö меным неважөн сюрисны...

— А кызди нö Паметь книгаыс? Сэни öд веськыда гижöма, мый танiтö служитöма, сэкитö усьöма мортыс...

— Небөгсö дасьтысьясыд вермисны и сорсьыны. Либö мукöд, шуам, штабса службакаяс,— кыскис асланьыс Виталий Степанович.

— Вермас и тадзи лоны. Война пансян лунъясад ставыс гудрасис да,— гөгöрвоана вочавидзи ме сылы.

— Вай, сiдзкö, мöдам öтвылысь корсьысьны,— вöзйис чужан му туялысь.— Сэсся позьö и журналад Марков йывсьыс гижиштны. Очерк ли, кутшöмкö статья ли...

— Гижам, дерт, Виталий Степанович,— кокниа кутчыси ме сыён вöзйём мöвпö, кöть эськö ачым эг на тырвийö гөгöрво, мыйён помасяс И.П.Марков кузя мян öтувъя корсьысьöмыд да кодарö на сийö бергöдчас. Гашкö, нинём выльыс оз тыдовтчисюр, а гашкö, и мойвиас мянлы Трошев ёрткöд стöчмöдны, кöнi да кор-кызди ори повтöм И.П.Марковлөн олöмыс. Кöть нин ылöсавны туйпомсö. Öд та мында во кольём бöрад стöча шуны нинём он вермы...

— Герой, а огö тöдöй весиг, кöнi сiйö куйлö. Абу морт ног тайö... Юръяндзим,— пыдисянь ышловзиг чöвтiс Печать керкаса гöсьт, сэсся ставнымкöд киасис да лöня петiс редакция жыр-йысь. Тöдчис: öти дум сiйöс öнi йирис, Марковлысь туйпомсö корсян дум...

Сёрнитчим регыд мысти бара на аддзысьлыны, а таöдз чу-кöртны Марков кузя колана кабалаяс, лужысьны интернетын, йитчивны Спаспоруб школакöд, кодлы сетöма И.П.Марковлысь нимсö, сёрнитлыны сэтчöс велöдысьяскöд, тöдмавны, эмöсь-ö сиктас геройлөн рöдвужыс. А коркö, гашкö, и ветлыны Спаспорубас, пыравны татчöс краеведческой музейö, сатысь, вермас лоны, кутшöмкö да кутшöмкö содтöд юөр шедас-сюрас. Мöд кывйöн кö, колiс водзö на корсысьны, медым кутшöмакö разыны Ыджыд войналысь нöшта öти гөрöд. Тадзи жö мөвпалiс и миян выль ёртным, Виталий Степанович.

...А öнi вай, медым бурджыка тöдмавны геройöс, Спаспоруб сиктса зонлысь воськовъяссö да сямсö, бергöдчылам сы олан туйлөн кыкнан юкөнланыс. Первойяыс, мися тай, ёна кузьджык, а мöдыс вывтi дженьыд дай, некымын тöлысь сэтчö и тöрöма. Но кыкнан юкöныс, öтлаöдан да, бура-топыда тэчöны-артмöдöны Иван Марковлысь, повтöм мортлысь, чужöм-мыгöрсö, сылысь зумыд этшсö. Со мый висьталöма Спаспоруб сиктын быдмöм Иван Марков йылысь газет-журналын, небөгъясын да интернетын. Чужлöма зонка 1913 вося юль 11 лунö. Бать-мамыс, Петр Михеевич да Акулина Дмитриевна, уджалöмаöсь колкозын, быдтöмаöсь квайт пиöс да öти нылöс. Дерт, абу кокни вöлöма вердны-юктавны да кöмöдны-пасьтöдны та мында йылöмтö. Топöдлöма сы выйöдз, мый муртса абу ковмöма челядсьö корны мöдöдны. Отсалöмаöсь Сöвет власьт, рöдвужыс, сиктса войтыр. Но та йылысь сёрöнджык висьтыштам, батыслысь, Петр Михеевичлысь, кывъяссö вайöдöмөн...

Сиктса школалысь сизим класс помалöм бöрын зонка пырöма Коми пединститутлөн рабфакö, помалöма танi куим курс. Сэсянь том мортöс босьтöмаöсь армияö. Ыджыдджык вокыс вёлö видзöдöмөн, кодi лöма военнойöн, тöрытья салдат пырö велöдчыны да 1938 воын помалö Ленинградса первой номера артиллерийской училище, сылы сетöны «лейтенант» чин. Регыд мысти нин, 1939 вося арын, том лейтенантлөн часьтыс, командованиялөн индöд серти, вуджö Польшалысь граница. Пансьö сiдз шусяна польской поход. Кык вежонөн Сöветской Союз босьтö Украиналысь да Белоруссиялысь Рытыввыв обласьтъяссö аслас борд улö, зильö став вынсьыс ылыстны немечкöд ыджыд война. Том артиллерист, батареяса командир Иван Марков, татчöс тышъясын нин петкöдчö бур боксянь, торъялö мукöдысь. Аслас повтöмлунөн, сюсь вежөрөн, ылi пармаын босьтöм сямөн. И сiйö, дерт, оз на тöд, кутшöм ыджыд сьöкылдунъяс пыр сылы коvmас мунны, кутшöм уна шог да шуда здук виччысьö коми вөр-ва пöвстын быдмöм зонмöс...

Муртса на том лейтенант бергöдчö страналөн рытыввылысь, пансьö Финляндиякöд тыш-кось. Öти война вывсянь Иван Марков, позьö шуны, веськалö мöд война вёлö. Но финнъяскöд тайö тöвся войнаыс нöшта на ярджык, вир кисьтана да... кö-

дзыд. Ывла вылын төв шөр, пашляк лыйсьö, потласьöны изъяс, трачкакылö вөр-ва — гөгөр сулалöны веж морозъяс. А миян салдатъяслы быть колö мунны водзö, вöтлыны финнъясöс Ленинград бердысь, жугöдны налысь уна во чöжөн вöчöм-кыпöдöм Маннергейм линия, кöнi сярвидзис бетонысь лэптöм быдсяма ДОТ-ыс да ДЗОТ-ыс, куим-нель пöвста окопыс, рöвыс, гранит-изйыс, бытшласьысь сутугаыс. Вөрöг ошйысяна шулис, ми кийөн пö да ми вежөрөн тайö вöчöмторсö некод кисьтны оз вермы. Сийö кöргысь на ён. Но некымын тöлысьөн миян салдатъяс, ловнысь жалиттöг, вир кисьтиг, жугöдисны Маннергеймлысь ошйысяна мытшöдъяссö да вöтлисны финнъясöс Ленин нима кар дорысь Выборг сайö. 1940 вося кöдзыд тölö вөрöгкöд повтöма тышкасис танi и спаспорубса коми зон, лейтенант Иван Марков. Тышкасис бура, сьölöмсяньыс. Сылысь зильöмсö öдйö казялис 451 полкса начальство да индис том мортöс артиллерийскöй дивизионö разведка кузя начальникöн. Тайö полкыс пырис сәки Войвыв-Рытыв фронтса 7 армиялөн 113 дивизияö. Торйөн нин повтöмлунсö да ассьыс сямсö Комиын чужлöм разведчик петкöдлис 1940 вося март 8 да 9 лунъясö Туркин-Сари дi вöсна тыш дырйи. Миянлы сюрис «Подвиг народа» сайт вылысь И.П.Марковлы Сöветскöй Союзса Герой ним сетöм кузя кабалаыс, мöд кывйөн кö, награднöй листыс. Йöзöдам гижöмасö нинöм вежлавтöг, кыдзи эм, рочөн. *«Предан партии Ленина-Сталина и социалистической родине. За время боев проявил себя смелым, инициативным, находчивым командиром разведки. При стрельбе прямой наводкой из орудий 8.2.40 г. в районе Тайпало у выс. 38,2, когда было уничтожено несколько вражеских ДОТ-ов и пулемётных огневых точек, тов. Марков давал целеуказания, сам находясь на открытой огневой позиции около орудий под ураганным огнем противника.*

Вел разведку огневых точек противника в период наступления на остров Туркин-Сари. Наша пехота делала 4 попытки овладеть этим островом, но сильный пулемётно-миномётный огонь не давал возможности продвинуться к переднему краю острова. Была поставлена задача — подавить арт.огнем огневые точки противника, для чего необходимо было выдвинуть передовое НП и вести прицельный огонь в целях подавления укрепленных огневых точек противника. Эту задачу выполнил лейтенант Марков, который подполз к пристани под пулемётным огнем противника (пуля пробил ему шапку-ушанку), развернул рацию и вел артогонь всей группой. В результате чего 8 марта вечером пехота заняла левую сторону острова Туркин-Сари.

Ночью в 3 часа 9 марта противник пытался выбить нашу пехоту с острова, но имея связь с командиром батальона, тов. Марков быстро открыл арт. огонь и попытки белофиннов перейти в наступление были отражены с большими для них потерями.

Несмотря на это, финны продолжали оказывать упорное сопротивление — подтягивали резервы, устанавливали противотанковые пушки, но четкая связь тов. Маркова с пехотой в значительной степени обеспечила занятие нами острова Туркин-Сари. Сам тов. Марков сидел с рацией на танке и,

продвигаясь вперед, корректировал артогонь, подавляя огневые точки противника.

Противник заметил движущийся танк и сидящего на нем командира, открыл сильный огонь из противотанкового орудия, выпустив около 20 снарядов. Осколками одного из них тов. Марков был ранен в спину и руку, но он продолжал выполнять поставленную задачу: подавил 3 пулемётные точки, заставил замолчать противотанковые пушки, сам поднял пехоту и повел ее в атаку...

За героизм, проявленный в борьбе против белофиннов, достоин звания «Герой Советского Союза». Кырымалёмаось награда сетём могысь кабала-листё 451 артполкса командир, капитан

НАГРАДНОЙ ЛИСТ 84

начальника разведки 1 д-на 451 арт.полка 113 СД
(должность, наименование войсковой части, соединения, учреждения или заведения).

лейтенанта МАРКОВА Ивана Петровича
(военное звание, фамилия имя и отчество)

Звание "ГЕРОЙ СОВЕТСКОГО СОЮЗА"
(наименование награды)

1. Год рождения **1914**

2. Национальность **коми**

3. Социальное положение **колхозник**

4. Партийность **б/парт.**

5. С какого времени в РККА **1935**

6. Участие в гражданской войне **нет**

7. Ранения и контузы **ранен**

8. Представлялся ли ранее к награде, когда и за что **нет**

9. Какие имеет поощрения и награды и за что **имеет ряд благодарностей и поощрений.**

Белодворцев, да военком, батальонса комиссар Чекменев ёрт. Полкөн юрнуодысьяслысь вöйöмсö 1940 вося март 18 лунö ошкöма дивизияся начальство, на бöрын шыöдчöмсö вынсьöдö-маось и округса военной советö пырысь погона йöз. А недыр мысти, апрель 11 лунö, Спаспоруб сиктса повтём зонлы сетисны Советскöй Союза Герой ним. Иван Петровичлы сэки вöлі кызь квайт арöс...*

Финляндиякöд война бöрын, Крымын бурдöдчис да, 1941 вося январ тольсьö И.П.Марков воліс Коми муö; Сыктывкар-сянь кежаліс и чужанінас, Спаспорубö, аддзысьліс бать-мамыс-кöд, чой-вокыскöд, татчöс олысьяскöд, висътасис на водзын. Нималана коми гижысь Г.А.Фёдоров (Педь Гень) ветліс жö сэки Иван Петровичкöд сы чужан сиктö, мед бурджыка тöдмасьны тшына-порока война пыр мунöм морткöд, сы олöм-вылöмön, подвигön, а сэсся дасьтыны Марков йылысь ыджыд очерк да йöзöдны сійöс газет-журналын. Öд Коми муысь петём медводдза

* Наградной листас сорсьöмаось. Збыльвылас Марков И.П. чужлöма 1913 воö.

геройс сійо кадö некод на ёнасö эз тöд, да гижысь кöсйис петкöдлыны-восьтны Луза бердса зонлысь збыль чужöмбансö. Водзвыв шуа, мый Геннадий Александрович тыр-бура сяммис пöртны олöмö ас водзас пуктылöм могсö. Эз весьшөрö сійö воöдчыв-лэччыв карсянь Спаспуробöдз. Педь Генълöн очеркыс артмис сёлöмтö вöрзёдана, мича кывъя да бура петкöдліс Комиын быдмöм геройлысь этшсö. Тайö гижöдыс — «Сöветскöй Союза Герой лейтенант Марков» — первой петалис «Ударник» журналын (1941 во, март тöлысь), сэсся Сыктывкарын торъя небöгөн 1941 вося гожöм помö. Геннадий Фёдоровлысь И.П.Марков йылысь жö выльмöдыштöм нин «Рöдиналөн вернöй пи» нима очерксö йöзöдлісны тшöтш «Отечественной войнаса герой-яс» книгаын, сійös лэдзліс Коми Госиздат сёрöнджык, 1949 воö. Некымынысь мыччысьліс гижöдыс и роч кыв вылö вуджöдöмөн — «Сердца и звёзды» нима книгаысын, кодъясöс вöлі сиöма миян республикаса геройяслы. Таысь öтдор, шулі нин тай, петалисны И.П.Марковлы сиöм и мукöд гижöдъяс, радио да телепередачаяс. Но век жö меным окота бергöдчывны Геннадий Фёдоровлөн очерк дорö. Мыйла? Да сы вöсна, мый тайö вöлі Коми муөн быдтöм-пестöм Сöветскöй Союза медводдза Герой йылысь медводдза ыджыд гижöд. Мед кöть и аслыспölös кывъя, аслыспölös «кöра», но ылі кадыслы зэв лöсялысь да сійö пöрасö бура петкöдлысь-восьтысь очерк... Сетам сэтысь, дженьдöдöмөн, дерт, неыджыд юкөнъяс — авторыслысь гижаногсö да кывъяссö вежлавтöг.

«— Но, Ванюша, дона гöсьт, дыр нин виччысям тэнö, ёна нин окота вöлі аддзвыны,— шуис лейтенант Иван Петрович Марковлөн, Сöветскöй Союза Геройлөн батысь, кор гöсьтъяс пуксялісны еджыд дöраён вевтъём пызан сайö.

Сэні вöліны лейтенантлөн чой-вокыс, рöдвуж, колхозса председатель, тöдса колхозникъяс, кодъяс локтісны сёрнитыштны отпускö воём землякыскöд. Ачыс Иван Петрович, еджгов чужöма, лöсьыдика шырöм русöй юрсиа, збой синъяса кызь квайт арöса том морт, пукаліс пызан сайын медтыдаланаинын. Сылөн защитнöй цвета военнöй гимнастёрка морös вылын дзирдалисны Ленин орден, «Золотая Звезда» да «За отвагу» медальяс.

Тайö вöлі 1941 вося январ ытö, спаспурубса колхозник Пётр Михеевич Марков керкаын...

А геройлөн батысь, неыджыд ус-тошка, чукуръясөн визьласьöм чужöма олöма морт, сувтöмөн висьталіс, кутишöм сьöкыда олісны найö ыджыд семьяөн, кыдзи важөн суседъяс кайтлісны сылы, мый ковмас пö, тыдалö, вуравны мешöкъяс да мöдöдны челядсьö корны.

— Мый нö вöчан, эг вермылöй ми мамыдкöд тіянös кокниасö быдтыны да,— быттьö правдайтчиг, сійö шыасис лейтенант дорö.— Не кö сöветскöй власть, код тöдас, гашкö, и збыльысь ковмис мешöкасьмөн ветлöдлыны öшинь увъясті... А видзöдлöй öні менам семья вылö! Ыджыд пи — Краснöй Армияын командир, мöд пи — колхозын знатнöй тракторист-стахановец, коймöд пи велöдчö ФЗО школаын... А тэ йылысь, Ванюша, нинöм и сёрнитны. Поздравляйта ыджыд наградаөн! Любö миянлы мамыдкöд, вывті любö...»

Марковҗаслөн керкаын тыр йөз. Коді вермис, сійö и кежис тарыт Пётр Михеевич ордö. И кысь он волы, кор сылөн пиыс, төрытҗя колхозник Иван Марков, повтөг тышкасис финскöй война вылын да зонлы сетісны Сöветскöй Союзса Герой ыджыд ним. Локтісны, мед кывзыштны асьсö, юасьыштны сылысь, кызди да мый ставыс артмис... Но Финляндиякөд тышөдз на том лейтенантлөн пельпом сайын вöлі сідз шусяна польскöй поход, кор 1939 воын СССР босьтис аслас борд улö Украиналысь да Белоруссиялысь Рытыввыв муяс, а накод тшөтш и тані олысь йөзöс. Сэки том лейтенант Марков командуйтис артбата-реяөн да унаысь жö петкөдліс асьыс ёсь вежöрсö да повтöмлунсö. Коми зон быттьö чөжис сямсö водзын лобысь вир кистана тышҗяс кежлö, дасьтысис, виччысис найöс. А Геннадий Фёдоров, очерк гижысь, нöшта тöдчөдіс: Польскöй кампания лейтенант Марковлы лои боевöй опыт босьтан бур школаөн. Но та йылысь Иван Петрович дырсö эз висьтась... Эз висьтась медясö, тыдалö, сы понда, мый керкаын пукалысьяс мыйкö быттьö виччысисны. Виччысисны ыліысь воём гөсьтсян ыджыдджыктор на. Финнҗяскөд война йылысь висьт...

«Лейтенантлөн батҗыс... кыскис асьыс каллянсö да, куритчыны лөсьөдчиг, шыасис пиыс дорö:

— Вай инö висьталышт, бур пи, кызди ті Финляндияс воютінныд. Аددзан, ставыс важөн нин виччысьöны. Да и ми мамыдкөд кывзыштам.

Иван Петрович нуөдіс синнас керка пытикөсті: быдөн видзөдісны сы вылö, виччысисны. Сійö нюмдіс, сувтіс да петіс пызан сайысь. Зумыд военнöй походкаөн матыстчис шөр öшинь дорö да кутіс видзөдны ывла вылö. Лейтенант син водзö сувтіс ылі финскöй му — джуджыд да паськыд лымҗя эрдҗяснас, сьөд-пемыд вөрҗяснас, кыммөм нюрҗяснас да скалаяснас. Дум вылас воисны боевöй лунҗяс, ёртҗясыс, кодҗяскөд орччөн тышкасьліс да кодҗяскөд юкльвліс походнöй олөмлысь став сьöкыдлунсö. Ковмыліс син веравтөдз видзөдны стереотрубаö, корсьны вөрөглысь гуся огневöй точкаяс...

— Да, тайö вöлі бура дасьтысьөм, ён укрепленияяс вылö надейтчысь лөк вөрөгкөд тыш,— öшинь дорысь вешийгыр шуис Иван Петрович. Чөв олыштис да кутіс висьтавыны, кызди белофиннҗаслөн зыртчөм бöрын миян командованиелөн приказ серти 1939 вося декабр 31 лунö Краснöй Армиялөн часьтҗяс вуджисны Финляндиякөд граница да кутісны вөтлыны Ленинградсянь дзик орччөн сулалысь финнҗясöс. Пöшти оравлытөг трачкөдчисны веж морозҗяс, көдзыдлаыс потласьлісны изҗяс. Туйяс эз вөвны. Тшем сук вөрҗяс пыр, нюрҗяс, тыяс вомөн туйяс писькөдіг Краснöй Армиялөн часьтҗяс мунісны водзö и водзö. Шоча, зэв шоча паныдасьлісны керкаяс, көні эськө позис шонтысьыштны, бурджыка шойччыштны.

— Эз кокни вөв косясьны белофиннҗяскөд и сы вөсна тшөтш, мый налы сэн вöлі төдса быд трөпа, быд пу,— водзö өддзис том лейтенант.— Найö дзебсясисны сук вөрҗясын, скалая сайын, тыдавтөм засадаясын, зверҗяс моз кыйөдісны миянлысь быд воськов да заводитлісны лыйлыны сэк, кор медся он виччысь. Ёна радейтлісны найö асьыныс «көкҗясöс»-снайперҗясöс

пуяс йылö пуксьöдавны. Мыйла көкъясөн найöс кутісны шуны? А со мыйла. Мунö, шуам, вöрса трöпайö мян разведчик либö весиг быдса часът. И друг кыскö кылö: та-та-та... та-та-та... Тайö кутшöмкö пу йылö поздысьöм белофинскöй «көк» зільö босьтны мушка вылас мянлысь боецъясöс. Сійö автомата сэн пукалö... Öтчөд меным ловйөн кутны удайтчыліс сэтшöм «көксö»...

И повтöм разведчик нюмдыштіс татчö да висьталіс сы гөгөр пукалысьяслы, кызди сяммöма бөбйöдлыны пу йылын пукалысь финскöй салдатöс да весиг пленö босьтöма сійöс.

— Бöрынджык ми картөчөн кутім гылöдны татшöм «көкъяссö», — гөгөрвоидіс кывзысьяслы Марков. — Сувтöдам орудие, и туй öтар-мöдар боксыс вöрсö — картөчөн! Вöрыс рутшка-ратшкакылö, чагъяс да увъяс лэбöны, а увъяс сорыс и найö...

Иван Петровичлөн кывъяс серти, мöд серпас лои, кор мян салдатъяс матыстчисны сідз шусяна Маннергейм линия бердöдз, кодöс дыр кад чöж кыпöдисны-лэптисны белофиннъяс уна странаса военнöй специалистъяс отсöгөн. И мянлы коліс жугöдны став тайö лыдтöм-тшöттöм ДОТ-яссö да ДЗОТ-яссö да босьтны найöс ас киö. Кокни шуны — жугöдны Маннергейм линия. А мый сійö сэтшöмыс? Медым гөгөрвоисны сиктса войтыр, том лейтенант пызан вылын кутіс спички көрöбкаяс, папирос пачкаяс, паньяс пукталöмөн петкөдлыны вөрöглысь пушка-пулемётөн ёнмöдöм мыгöрсö.

— Вот видзöдöй, — корис кывзысьясöс матыстчыны пызан дорö Марков. — Тайö ю; берегъяссö минируйтöма сідз, мый тувччынытö некытчö, быд метр вылö мина. Уна пöвстөн нюжöдöма проволокаысь заграждениеяс, на пыр лэдзöма вына электрической ток. Ещö водзöджык сувтöдалöма гранитысь надолбаяс — метрөн-джынийөн судта кыз, гырысь изъяс. На сайö кодъялöма противотанкөвöй рөвъяс. Быд ветымын метр костын вöчалöма пулемёта траншеяяс, а на сайын ДОТ-яс да ДЗОТ-яс. Весь öд эз надейтчыны белофиннъяс, мый налөн Маннергейм линияыс жугöдны позьтöм ён. Но советскöй воинъяс докажитісны, мый абу сэтшöм крепость, кодöс эскö Краснöй Армия оз вермы жугöдны!

Бөръя кывъяссö лейтенант шуис ярскöба, гөлөссö чорзьöдöмөн. Сиктсаяс водзын öні сулаліс эз нин кыв-вора том морт, а тышъяс пыр мунöм боевöй командир. Буретиш сэтшöм, кодöс боецъяс не сöмын кывзöны, но и радейтöны...

А сэсся Иван Петрович лючки-ладөн висьталіс, кызди найö дасьтысисны жугöдны-босьтны Маннергейм линия. Öд водзвыв лөсьöдчытöг, разведка нуöдтöг, быд ДОТ да ДЗОТ явиттöг, а сы бöрын и найöс артиллерия биён пасьварттöг, эз позь водзö лэдзны пехотаöс. Та могысь ковмылöма разведчиклы аслас ёртъяскöд, медясö войяснас, кыссьывны финнъяс дорöдз да «гусявлыны» налысь салдатъясöс. Быд пленнöй пö, тöдчөдіс Марков, вөрöг йылысь колана юөр сетысь-юёртысь. Ачыс том коми зон финнъясладорысь некымын ловъя «языкөс» тшапнитлöма-вайлöма. Весиг офицер шедлöма сылы...

«Сёрнитігчöж Иван Петрович ветлөдліс джодж кузя, частö куритчис. Öти местаын сылөн эз пукавсьы. Сійö ичöтысянныс

татшомён и быдмыліс: инас öйшйтём, век мыйкё вöчысь, га-жа да спровор. Татшом йöзыд олöмaд некор оз йöрмывны, пикö оз воны, сьöкыдлун улын оз кусыньтчыны», — гижö Марков йылысь Геннадий Фёдоров. Та бöрын очеркас вайöдö том лейтенантлысь кывъяссö, кызди мян салдатъяс заводитöмаöсь босьтны-жуглыны финнъяслысь Маннергейм линия, стöчджыка кö шуны, сылысь первой юкöнсö (визьсö). Но белофиннъяс став выннаныс водзсасьöмаöсь да абу сетöмаöсь мян пехоталы мунны водзö. Марковлөн батарея, водзвыв явитём мысти, бырöдöма ас туй вывсьыс вöрöглысь кöкъямыс ДОТ. Но нöшта кык ДОТ-ö дзебсьöм финнъяс пулемёт-автоматъясысь шерөн сизьдiсны мян салдатъяс кузя, да сiдзи, мый юртö он кыпöд. Кыдзи ланьтöдны тайö кык ДОТ-сö? И сюсь разведчик аддзис петан туйтö.

— И ме войын, лöня да гусьон, вуджöдi немын орудие выль огневöй позиция вылö, кыз позьö матöджык белофинскöй ДОТ-яс бердö, маскируйтi да кутi виччысьны асыв. Югдыны заводитiгөн гымыштiсны мян первойя залпъяс, — нюмсö дзебиг, юксис аслас мöвпъясөн Иван Петрович. — Ура! — кыліс тыш мунан эрд вылын. Боецъяс кыпöдчисны му бердысь да вына гыон уськöдчисны атакаö. Вöрöглысь медводдза укреплөннöй полоса вöлі орöдöма. Тайö операцияясысь — разведка бура нуöдöмысь, «языкöс» судзöдöмысь да аслам участок вылысь ДОТ-яс жугöдöмысь — наградитiсны менö «За отвагу» медальон, — кывкöрталіс повтём разведчик да недыр кeжлö ланьтыштліс.

Ланьтыштліс, быттьö чукöртiс думъяссö. Син водзас сувтöдліс, тыдалö, кызди венісны-жугöдiсны финнъяслысь мöд полосасö, а сэсся путкыльтiсны и коймöдсö. Кыкнанныс шедісны, дерт, сьöкыд тыштъясын. И бара ассыс сямсö да повтöмлунсö петкöдліс сьöкыд косяс том лейтенант Марков. Та йылысь эскöдана висьталö аслас очеркын Геннадий Фёдоров. Разведчик, медым стöча тöдмавны вöрöглысь ДОТ-яс да ДЗОТ-яс, босьтöма аскöдыс телефонистöс да гусьон кыссьöмаöсь дзик финнъяс дорöдз. Ичöтик гу сюрöма, да сэнi пукалöмаöсь дорвыв вит сутки, кыйöдöмаöсь враг бöрся, пасъялöмаöсь, кöні кутшöм пушка-пулемёт налөн сулалö. Сэсся став колан юöрсö телепон пыр сетöмаöсь мян артиллеристъяслы.

— Нель лун чöж менам батарея йиркöдiс-луйліс орудиеясысь, — орийöдліс проволокаа заграждениеяс, бырöдаліс враглысь огневöй точкаяс, быттьö путкыльтiс-бергöдiс ставсö. Но пехота бара на эз вермы кыпöдчыны атакаö. Враг аслас пулемётнöй бион бөр личкыліс сійöс му бердö, — вайöдö спаспöрубса геройлысь кывъяссö нималана коми гижысь. — Витöд луннас кыссис ме дiнö батальонса командир да висьталіс, мый финнъяс лыйсьöны матысса вöрсянь. И батареялысь би ме веськöдi индöм вөр вылö. Недыр мысти вöрыс лои кыссьöм рос кодь. Пехота вөрзис водзö. Тадзи белофиннъяслысь и мöд полоса лои босьтöма-орöдöма. Коли бөрзяыс, коймöд...

— Ми сувтлытöг мунім водзö, наступайтiм Выборгскöй залив дорö белофиннъясөн вöчöм коймöд укреплөннöй линия вылö. Мян водзын сулаліс мог — босьтны öти тöдчана дi,

петны Выборглань мунысь шоссе вылө да тупкыны вөрөглы бöрынтьчан туйсö. Миян полк петіс заливвывса йи вылө да кутіс водзö мунны. Белофиннъяс восьтісны полк кузя ураганнöй би, и салдатъяслы ковмис водны йи вылө. Гөгөрвоанныд положениесö?— Иван Петрович кытшовтіс видзöдласнас керкаын пукалысьясöс. Найö лов шысö кутöмөн кывзисны ассьыныс землякöс.— Водзö ни бөрö вөрзёдчыны. Коли лун дай мөд... Полк век куйлө йи вылын. Воис дивизияса командир, видзöдліс стереотрубаö, копрöдлыштіс юрнас да сетіс меным приказ: көть мый, а петкөдны йи вылын куйлысь полкöс. Салдатъяс кынмöны, тшыгöсь... А мөдарсянь — сувтöдöм мозгыс вывтісьöкыд.

Еджыд халатасьöмөн ме кысси заливса йи вылө, воді да лунтыр видзöді, тöдмалі местасö. Бара воис комдив. Көсйысис сетны менам команда улö танкъяс. Кык танк отсöгөн ми уськөдчим ділань. Кыпöдчис и полк. Тышыс муніс лунтыр. Рытланьыс ділөн юкöныс лои миян кыын. Но коліс на высота, код вылысь колö вöлі шыбитны белофиннъясöс, мед дзикöдз весавны дісö вөрöгысь. Тадзи коли вой, воис асыводз. Квайт час. Ме пукси командирскöй танкö, и машина уськөдчис водзö. Пансис высота вöсна тыш. Кось помланьыс нин командирскöй танкö инмис вражескöй снаряд, жугөдіс көрт броня да оскокъясөн ранитіс менö мышкö и сойö. Пöсьвылысь дой ог кыв, кок йылын сулала зумыда на. Юрын öти дум: пöртны олөмö командованиелысь боевöй задание — мездыны полкнымöс да босьтны ді. Кутшöмкө кад ме верми на командуйтны аслам батареяөн. Но, кор ді вöсна тышыс вöлі помасьö нин, ме куті чувствуйтны ачымöс ёна слабмөмөн — кок улысь муыс лайкмуніс, синмöй пемдіс, и ме уси... Палялі госпитальын нин, гөгөрбок бинтуйтöм. Меным висьталісны, мый менсьым аддзöмаöсь дас вит рана...

Геннадий Фёдоров, коді пукаліс Марковъяслөн керкаын да сюся кывзис Иван Петровичлысь висьтасьöмсö, мыйкö пасъяліс, мукöд моз виччысис жö, кор нö лейтенант-разведчик казътыштас Сöветскöй Союза Геройлысь нимсö сетöм йылысь. А мөдыд эз тэрмась. Гашкö, вежавидзис сиктсаяс водзын том мортыд, гашкö, эз көйы асьсö вылө лэптыны... Но коркö-некоркö быть лои висьтасьны. Со сылөн кывъясыс: «Воис апрель, тувсовъя тöлысь. Ньöжйöникөн менам содісны вынгъяс. Ме куті нин птавыны веранда вылө лолалыштны тувсовъя воздухнас. Öтчыд — тайö вöлі апрель шöрын — кызкö быттö торйөн нин мичаа ворсöдчис шонді. Ми, бурдöдчысьяс, пукалім веранда вылын. Кыкөн ворсісны биллиардөн, мукöдъяс кывзисны радио. Лыддисны Краснöй Армияса начальствующöй да радөвöй составöс орденъясөн да медальясөн наградитöм йылысь СССР Верховнöй Сöвет Президиумлысь Указ. Сэні висьтавсис: «Финскöй белогвардейщиналы паныд тышкасян фронт вылын командованиелысь боевöй задание образцовöя выполнитöмысь да сэки петкөдлөм отвагаысь да геройствоысь присвоитны Сöветскöй Союза Геройлысь звание, Ленин орден да «Золотая Звезда» медаль вручитöмөн»... И водзö кутісны лыддьöдлыны наградитöм боецъясöс да командиръясöс. Кывзам ми, пукалам. И друг

кылам: «...Лейтенант Иван Петрович Марков». Ме аслам пельлы ог верит. Нинём и сёрнитны, кутшём вёлі нимкодь меным».

Май төлысьё Иван Петровичёс корлөмаось Москва; Кремль-ын Марковлы да «финской» войнаса уна геройлы сеталөмаось ыджыд наградаяс. Вөлөма сәні тшөтш и М.И.Калинин.

— Но вот и ставыс,— помалис Иван Петрович.— А öнi вайö гажöдчыштамö...

Сявмунисны гудöклөн гажа переборҗяс. Лейтенант удада зымнитис кокнас, петис круг шөрö да кутис йöктыны. Эз вермы кутчысьны и мам. Сылы вёлі зэв любö пиыс вöсна...

А спаспурбса зон йылысь «Рöдиналөн верной пи» очерксö, чужанінсянь сылысь бөрҗя туйö петöмсö коми гижысь сигöртö со кызди: «Отпускö волём лейтенант Марков эз дыр ов гортас. Бать-мам ордас кымынкö лун гöститыштöм бöрын сійö прöщайтчис рöдвужыскöд да тöдсаяскöд, пуксис машинаö и мöдöдчис бөр аслас часьтö, кодi сулалис ылын, миян рытыввыв границаса öти кар дорын.

— Олышт ещё, гöститышт миян ордын, Иван Петрович,— колльöдисны сійöс ас сиктса колхозникҗяс.

Но лейтенант синкымсö зумыштöмөн вочавидзис налы:

— Аттьö тiянлы бур кыв вылад, ёртҗяс, но кузя гöститны некор. Ме должен лоны сәні, часьтын. Кадыс сәтшöм, колö дасьöн лоны.

И збыль, миян рытыввыв границаяс дорын кымөрҗяс сукмисны ёнджыка и ёнджыка. А ставлы памятной 1941 вося июнь 22 лунö, водз асывнас, советской границанымöс рöзбойяс моз вероломнöя вуджисны немецко-фашистской захватчикҗяслөн полчищяс. Заводитчис Великой Отечественной война...

Храбрöя тышкасис фашистской ордаяскöд и Советской Союзса Герой, старшöй лейтенант Марков. Рöдиналөн верной пи медбөрҗя лолыштöмöдз дорйис ассьыс советской отчизна... Но öти неравнöй тышын, 1941 во помын, сійö усис храбрöйяс смертьөн. Социалистической Рöдинанымöс сійö дорйис медбөрҗя вир войтöдз.

Советской Союза Герой, старшöй лейтенант Марков йылысь светлöй память нэм кeжлö коляс миян пöвстын...»

Öнi, дерт, сьöкыд шуны, мый йылысь мөвпалис гортсьыс мунигөн спаспурбса зон. Син водзас, тыдалö, сувтöдлiс мам-батьсö, чой-воксö, рöдвужсö, ас сиктсаясöс, кодҗяс колльöдисны гöсьтö волысьöс юж туй бокын. Сувтöдлiс син водзас ставнысö, да гимнастёрка улын гыпкысь сьöлöмыс бара на понавлiс: эз весьшөрö сійö волы гортас, эз весьшөрö вудж та кузя вöлөк. Код тöдас, кор на сэсса мойвиас кежавны муса Спаспурбас, топöдлыны морöс бердас ставнысö найöс, кодҗяскöд колис зон-лөн көмтöм кока челядьдырыс, кодҗяскöд уджавлiс колкозын, турунтö пуктылiс и вартлiс ыбҗяс дорын...

Менам чайтöм серти, том лейтенант сәки нин ловнас кылiс, мый СССР-лөн рытывылын пуксьöм чöв-лөнныс абу нэмöвöйся, мый воас кад, и Гитлерлөн Германия быть уськөдчас миян страна вылö. И кысь оз уськөдчы, босьтiс нин кө ас сьöд борд

улö Европа джынсö! И кысь оз мянлань сетчы, быд ногыс кö дасьтысьö та кезлö. Лöсьöдчö синсьыс би петмөн. Но и ми огö кинымöс кресталöмөн пукалöй, мыйкö вöчам жö. Гитлерлы воча воськовтiм, Украиналөн да Белоруссиялөн рытивыв пельöсьясö пырим, Прибалтикаын ёнмöдчам, Финляндиякöд ку-тшöм сьöкыд война помалiм, содтöд паськöдчим Ленинград дорын, а выль танк-самолётыс да пушка-пулемётыс часьтъясь мыйта воö...

Би пыр мунлöм морт, Иван Петрович, дерт, гөгөрвоис: чужанiнас тайö волöмыс да рöдвужыскöд адззысьлöмыс вермас лоны и бөръяөн. Войнаыд öд оз артась, оз юав, кодi тэ: герой али порок исыштлытöм морт, том али пöрысь. Ытшкö öтмоза, яра да йöзöс жалиттöг. Но коми пармаын быдмöм зон эз повзъы сыысь, эз шöйöвош. Марков зумыда воськовтiс локтысь Ыджыд войнаыслы воча. И во джын мысти нин найö паныдасысны öта-мöдныскöд...

Та бöрын Иван Петровичлөн фронтыввса олан туйыс виччысьтöг орö, саймовтчö мян син улысь. Мый нö лои спаспурубса збой зонкöд гортсьыс мунöм мысти, рытиввылас, Ыджыд война дырйи? Кодарö сiйöс шыбитiс олöмыс? Гашкö, юөртöг воши гудыр-гадыр кадад, 1941 волөн гожся лунъясьö, кор немеч вежонөн босьтiс Минск кар, Белоруссиялысь столица? Гашкö, уна-уна салдат да командир моз веськалiс вөрöг киö да пленö? Быдторйыс вермис лоны сэкитö, дзик быдторйыс... Öд талунöдз на ми огö тöдöй, кöни да кор пуктiс юрсö Спаспурубын чужлöм салдат, кытөн сылөн гуыс. Артмö öни, быттö И.П.Марков — юөртöг вошöм герой... Сiдз, Геннадий Фёдоров аслас очеркын пасйö, мый коми йöзлөн повтöм пи усис 1941 во помö, интернетын (Википедия) юөртсьö, мый Марков кувсис Белоруссия вöсна тышъясын 1941 вося юнь тöлысьö, мукöдлаас пырмунiгмоз шуыштöма дай: погиб в бою... А «Сердца и звезды» книгаын, кодi петалiс Коми небöг лэдзанiнын 1971 воö да кодöс вöли сиöма мян республикаын чужлöм Сöветскöй Союза Геройяслы, И.П.Марковлөн усьöм йылысь со мый гижöма (сетам рочөн, кызди эм): *«Пал смертью храбрых в боях с фашистскими захватчиками на Карельском фронте в конце 1941 года»*. Дивö да и сöмын! Кор да кызди веськавлöма ылi фронт вылас Иван Петрович, кытысь босьтöмаöсь тайö явö пöръясына юөрсö, книга дасьтысь-лэдзсысьяс кыв ни джын абу шуöмаöсь.

...Виталий Степанович Трошев, пöсь сьölöма мортыд, унаысь на сэсся кежавлiс журнал редакцияö да быд пöрйö ми ськöд мыйкö да мыйкö стöчмöдышталiм И.П.Марков кузя. Овлывлiс, дерт, мый и вензывлiм. Но эгö лёкысь, бур ногөн. Гөгөрвоим öд: öтувъя делö вöчам, сэсся ассьыд мöвштö висьтавтöг да дорйытöг нö кызди? Бөръяысьсö волiгөн Виталий Степановичкöд бура дыр пукалiм кыкөн, кызд шуласны, син на син, да варовитiм öттор-мöдтор йылысь, но регыд мысти нин сёрнинымлөн туйвизыс бара на Ыджыд войналань бергöдчис. Воча пукалысь жöдзыштiс пызан сайын. Сы чужöм серти тöдчис: мортыд мыйкö кöсйö шуны, да оз шу. Кöсйö мыйкö висьтавны, да оз висьтав. Быттö гусятор морöс пытшкас дзебöма. Гашкö, вежавидзö, гашкö, тэрмасьны оз кöсйы... Пыр и юрö воис: тшук, мися,

Марков йывсыд кыскö виль юör аддзöма. Мыйдыра нин корсысьö-лукйысьö да. Юалі ассыйс.

— Абу некутшöм виль юör... А виль мөвпъяс эмöсь,— шлапкис топыд кинас Виталий Степанович паскыд пызанö.— Марков кузяыд ме бөрҗяпом со кутшöм кывкөртöдö вои. Сы йылысь став юör-кабаланас тöдмасьöм бöрын... Эскöй көть энöй-а.

— Кутшöм кывкөртöдö нö?— пыр и вомöй воссис.

— А вот кутшöмö. Кывзышт вай, кадыд кө эм,— пыдисянь ышловзис Виталий Степанович, быттö дасьтысис чöвтны морöс вывсьыс сьöкыд из. Ме чöv ланьтi...

И чужан му туялысь, синмö видзöдiг, тöлкөн-ладөн да эскö-дана юксис аслас мөвпъясөн. Сылөн чайтöм серти, Спаспорубö волöм бöрын коми герой мунöма аслас часьтö, кодi сулалöма страналөн рытыввылын (та йылысь аслас очеркын казътыштö тшöтш и Геннадий Фёдоров). А Ыджыд война пуксигас вöлöма нин старшöй лейтенантөн, служитöма Рытыввыв фронтö пырысь 47 стрелковöй корпусса 121 стрелковöй дивизияын, сiйö сулалöма Белоруссияса Барановичи кар дорын; орччөн вöлöма-öсь корпуслөн 143 да 155 дивизияяс.

121 стрелковöй дивизияыс котыртчылöма 1939 вося сентябр тöлысьö Могилёвын (Белоруссия). А сулалöма медсясö Бобруйск карын. Сылысь 297 артиллерийскöй полкöс мөдöдлöмаöсь весиг Финляндиякöд «тöвсә» война вылö (гашкö, сэтчö ветлис и И.П.Марков да?) 1941 вося юнь 11 лунö дивизия вуджöма гоҗся лагерьясö, сэнi и суöма салдат-командирьясöс войналөн лёк рöкыс...

Юнь 22 лунö, асывсянныс, немец яра зырöдöма Рытыввыв фронтлөн куимнан армия вылас. 121 дивизия петöма вөрöглы паныд, но индöм местаöдз абу воöма. Войналөн витöд лунас, Барановичи кар дорын, сылы воча чепöсьöмаöсь немецкöй танкъяс, быдса дивизия. И пуртөн моз вундöмаöсь-жугöдöмаöсь часьттö кык пельö. Та бöрын дивизиялөн öти и мöд юкöныс торйөн тышкасьöмаöсь вөрöгкöд. Ичөтджык юкöныс бöрынтьчöма Бобруйсклань, мед сöлькнитчыны 47 стрелковöй корпусса командирөн котыртан отрядкöд, а сэсся нин лöсьöдны виль дивизия. 121 дивизиялөн жö ыджыджык юкöныс, кодөн веськöдлöма штабса начальник, вөрöглы водзсасиг петöма немец кытшысь да бöрынтьчöма Слуцклань. Август 6–10 луньясса ёсь косьясын дивизиялөн тайö юкöныс воштöма уна йöзöс: öтияс усьöмаöсь, мöдъяс веськалöмаöсь немец киö, коймöдъяс дзесьöмаöсь сук вөрҗясö да бöрынджык лоöмаöсь партизаньясөн. 1941 вося арын 121 стрелковöй дивизиясö шуисны бырöдны. Сы пыдди дивизияса немын офицер котыртісны немец кытшын партизаньяслысь 121 отряд, кодi вочасөн быдмис тыр вир-яя полкöдз.

— Виталий Степанович, а тэ збыль эскан, мый война пансигас Марковыд служитöма 121 стрелковöй дивизияын?— здук кежлö торки ме пызан сайын пукалысьöс.

Мöдыд сöмын нюммунис воча:

— Эска, дерт. Та йылысь висьталöны и сiйö кадся документьяс. Шуам, найö, кодъяс эмöсь «Мемориал» ОБД-ын.

И петкöдліс интернетысь перйöм кабалаяс. Сэнi кыккладын,

но пасья со мый. Войналөн медводдза лунъясыс пыр и петкөд-
лісны — ми абу дасьось ыджыд тыш кежлө. Торйөн нин тайö
тыдовтчис Рытиввыв фронт вылын. Тані сулаліс быдса куим
армия, вöлі немечьс унджык танк-самолёт, мукöд техника,
вöліны вежора да төлка командирьяс, а пеж вөрөг юнь 28 лу-
нө нин воөдчис Минскöдз, пырис тайö карас да уськөдчис Смо-
ленсклань. А сы сайын тыдаліс и Москва...

Абу дивö: Минск босьтөм мысти немечлөн кытшö веськаліс-
ны миян быдса дивизияс. На костын да весиг дорйысьсыс ар-
мияс костын йитөдьяс орины. Шöйöвошөм салдатьяс эз төд-
ны, кодарö мунны, кытчö сетчыны, көні миян йөз, а көні вö-
рөг чукөр. Падмөдчисны и миян паськөма диверсантьяс. Öти
кывйөн кө, төлка-лада водзасьсөм Рытиввыв фронтлөн абу
артмөма. А воштөмъясыс лоины ок ыджыдөсь. Куим вежонөн
Минск гөгöрын юрнысö пунктисны 341 сюрс салдат да командир.
Миянлысь нöшта 324 сюрс мортөс немечьяс босьтисны пленö.
На лыдын, вермас лоны, вöлі и Спаспуруб сиктса Иван Марков,
кодi буретш веськаліс война нырö...

И.В.Сталин, кор сылы юөртөмаөсь Минск дорын куим ар-
мияс пасьвартөм йылысь, дзикöдз шөгö усьлөма. Сэсся скö-
рысь шуөма партия Политбюроö пырысь ёртьясыслы (сетам
рочөн): «Ленин оставил нам великое наследие, а мы, его наслед-
ники, всё это просрали...»

Уска Ёсьö чорыда мыждөма Рытиввыв фронтөн веськөд-
лысьясөс. Унджык генералсö, на лыдын и фронтөн командуй-
тысь Д.Г.Павловсö, регыд мысти лыйлөмаөсь, а кодсюрö и
асьныс лыйсьөмаөсь. Повзьөмаөсь Ёсьöсьыд да. Көть мыжыс
сьöд лоөмторсьыс и Сталинлөн вöлі...

...Виталий Степанович бара на лукйысьыштiс ас водзас куй-
лысь кабалаясын, сэсся бөрйис коланасö.

— Со видзöдлы вай, он кө эскы плен йывсьыд,— мыччис
на пөвстысь гоз-мөдөс.— Ме тайö кадсö весь эг жö пукав, син
доймымөн корсьыси-лукйыси...

— И мыйкө сюри?— чуймыштсис менам. Кымын во öд
война пансьөмсянныс коли да...

— Корсян кө, мыйла нö оз сюр,— нюмсö дзебыштiс Виталий
Степанович, да юксис, кызди тшöкыда шулө, Марков кузя аслас
видзöдласөн.

Чужан му туялысь серти, Иван Петрович абу усьөма 41 во-
ся гожöмын, а войналөн гудыр-гадыр кадад, Белоруссияс, сюр-
рöма немеч киö. Мукöдкөд тшөтш сійөс нуөмаөсь Германияö.
Веськалөма Магдебург округыс (Саксония—Анхальт му) Ашерс-
лебен районлөн Нахтерштедт грездö. Татысь немечьяс перйөма-
өсь рудовгөрд из шом, уджөдөмаөсь миянлысь пленö сюрөм
салдатьясөс. Орччөн вөлөма найөс видзөм могысь лагер. Тшыг
нисьö пөт олөмысь, сьökыд нокысь унаөн кувсьөмаөсь, а кодi
босьтчылөма пышйыны, лыйлөмаөсь. Мый лоөма тані Иван
Марковкөд, öні сьökыд шуны. Но «Мемориал» ОБД сюрөм ка-
балаын со мый пасйөма: *Марков Иван, 13.07.1913 (сорсьыштö-
маөсь, чужліс 11.07), погиб в плену 25.01.1942. Место захоро-
нения — Германия, земля Саксония—Анхальт, Магдебург округ,
Ашерслебен район, н.п.Нахтерштедт, за железнодорожным пе-
реездом в районе карьера.*

Мод кабааын — тайо шойна йывсыс юор. Сетам дженъидика, рочон: советское воинское кладбище, захоронения 1941—1942 годов, 137 индивидуальных могилы, одна братская могила... Всего захоронено 139, известных 67, неизвестных 72. В центре кладбища находится обелиск прямоугольной формы с надписью на русском языке, увенчатый пятиконечной звездой...

Одиночные могилы равномерно расположены вокруг центрального памятника. Могилы... обложены камнем, каждая могила имеет каменное надгробие с данными о захороненных.



Торъя кабааын лыддьодлөма, кодъясөс сэтчө дзебөма. Марков Иван муно 92 мортон, 48 паса гу... Гуас абу отнас, ношта дас морт, немеч кио веськаломаяс. Тодчышто весиг гижодыс: Марков Иван.

— Но, мый татчө шуан, земляк?— ловзис быдсон Виталий Степанович, быттё помалис ыджыд удж.

— Тадзи кө, дерт, тэ дор сувта,— вочавидзи ме да топөдлі бур вöчысь мортлысь зумыд кисö.

Гашкө, и збыль сюрис Виталий Степановичлы коми герой Марковлөн туйпомыс да? Гашкө, Енмыс отсаліс сылы таын, аддзис мортыдлысь мырсьом-пессьомсö да? Ме ог тод... Но сёлөмөн кыла: бөръя кывйыс Марков йылысь, тыдалö, шутөм на. Олөмад öд уна вож да чукыль паныдасьлö...

Редакциясянь:

Уна во коли Великой Отечественной война заводитчöмсянь. Уна миллион морт сетіс олөмсö. На лыдын и Иван Петрович Марков. Кадыс вöлі сьöкыд, торъя нин война первойя вояссö, и эз артмы быд пöрйö колана ногон лöсьöдны документъяс. Но восьтöм да воссьысь архивъяс отсалöны корсьны усьöм геройяслысь олан туй помсö. Германиялысь юкөн босьтісны союзникъяс. Колөкө, и налөн архивъясын куйлöны миянлы сэтшöм колана документъяс. Уджыс вель на уна, и ми кутам лача, мый поисковикъяс водзö пондасны корсьысьны да восьтасны öнөдз тодтöмсö. Мед збыль некодöс да нинöм эг вунөдöй.



Снимокъяс вылын:

1. Сöветскöй Союзса Герой И.П.Марков.
 2. Вошöм салдатъясöс тужалысь В.С.Трошев.
 3. И.П.Марковлөн награднöй лист.
 - 4, 5. И.П.Марковлөн усьöм йылысь архивса кабалаяс.
 6. Нахтерштедтса (Германия) шойна вылын.
 7. Спаспурбса школа дорын Геройлы памятник.
- Снимокъясыс В.С.Трошевлөн гортса архивысь да интернетысь.



Менам чождьяс

Ёгор чож

Менам чож — Георгий Дмитриевич Чаланов (Парма Степан Митрей Ёгор) — чужліс 1914 воё Парма грездын. Документъясас гижлісны Георгийон, но гортас пыр шулісны Ёгорон. Ичотсянь мортыд тодліс сьокыд видз-му удж, велодчис чери кыйны да вöравны. Сійö аслыс лэч туйсö лöсьöдлöма сэтшöм кузьöс, мый кытшов пытшкас кык вöралысь на кыйсисны.

Ёгор чож, ыджыд тушаа, мича чужöма да шань, кужис матыстчыны нывъяс дорö, та кузя сійö вöлі зэв востер. Тöдмасис кулöмдінса Ирина Ивановна Липинакöд (Дормöдон Иван Иринь), и на костын артмис-тэчсис ыджыд любов. Но öттшöтш чожö да пожöгса Паладь нима ныв вольпасын гижисны ассъыныс дженъыдик «повесът». 1936 воё чожöös босьтисны армияö. Паладькöд «повесът» гижöмыд Ёгорлы вичмöдіс бур водзöс — служитигас нин, 1937 воё Паладьлөн чужис Геня пи, кодлы чожö 18 арös тыртöдзыс мынтіс алимент. А чожöлөн армияö мунöм бöрын Ириньös ылöдліс мöд зон, кодынь 1937 онас жö Ириньлөн чужис Галя ныв. Чожöлөн служитсис да сійö бара на аддзысьліс аслас муса Иринькöд, но эз кольччы ни Пармаö, ни Кулöмдінö, а муніс Княжпогостö да сэтчö овмöдчис. Ёгор чож вöлі Парма пиан пиысь медводдза мортон, коді эз кольччы ас деревняö. Нывъяс, дерт, разавлісны гөгöрбок, кытчö кораласны, сэтчö и мунны лоö налы. Чожöлөн да Ириньлөн аддзысьлöмыс, дерт, эз весьшöрö коль, налөн чужи Вова пи. Сэки Иринь эз повзы сьокыд туйысь да кыкнан кагаыскöд мöдöдчис Княжпогостö, чожö дорö. Воис, а видзöдö да, сәні найös ёнасö оз и виччысьны: пачводзас ноксьö, пусьö-пöжасьö чожöлы Света нима ань. Кодкö на пöвстысь лишнöй, кодлыкö колö мунны, кыкнад öти лэбулын дзескыд. Сэки Иринь чожинь став лёк вынсьыс гартыштіс Светöлысь кузь юрсисö кикар гөгöрыс да гурöдіс-кыскис шай-паймунöм аньös ывлаö. Горöдіс: мун пö тась кытчö гажыд, менам Ёгор тэд абу кутшöмкö султан, а кык челядя да гöтыра морт! Мöдыд весиг никöстнысö эз удит. И овмöдчисны чож да Иринь зэв лöсьыда, но ставсö торкис Ыджыд война...

1941 восянь Ёгор чож фронт вылын. Мунöм бöрас Иринь чожинь вайис пиös, но ёна тшыгъялöмысла морösас йöлыс эз вöв, пуліс рок, кытчö содтыліс вый пыдди чери гос (рыбий жир). Татшöм роктö кагаыд эз сөй да сәсся коркö и кувсис.

Чожö веськаліс служитны öтлаö шуриныскöд — Андрей Иванович Липинкöд (Дормöдон Иван Öндрейан), кодкöд война чöжыс эз и торйöдчывны. Кöні да кыдзи тышкасисны лёк вö-

рөгкөд, ме ог төд, лосьөдлыны ог жө кут, но, став сертиыс, воуйтөмаось бура. Эз өд прөстө кыкнаннысө мөдөдны 1945 онас Москваө, юнь 24 лунся Победа Парад вылө. Сөмын Андрей Ивановичөс ичөт туша вөснаыс колисны сідз шусяна резервө: кодкө кө друг висьмас ли мый ли, мед сійөс вежны. Но некод тай эз висьмы... А Ёгор чожлы мойвиис камгыны-вославны Красной площадь кузя парадной стройын.

Нулисны зятя-шуринаөс и Япониякөд война вылө, но косьясө найө эз нин веськавлыны. А воуйттөгыд мый найө вөчасны? Чожө ошйысьліс, мый сөмын спирт юисны да луннас куимысь-өдз гажа юрнад землянкасьыс пачсө кисьтлісны.

Уна во кольөм мысти аддзысясны зятя-шурина да первой топыда-ёна кутчысьласны, а стопка-мөд юасны, да Андрей Иванович кулаксө Ёгор чожлөн ныр дортіыс новлөдлыны мөдас: «Ме тэныд петкөдла...!»

Война кусөм бөрас чожө нуөдліс семьясө Печора вылө, но сэні олөмыс эз ладмы да бөр локтісны Княжпогостө. Емва ю



вомөн вуджысь пос дорө, дзик кыр йылас, кыпөдісны керка, көні и кургисны-олісны нэмсө. Гозъялөн чужи нөшта кык кага: Валя да Коля. Пенсия вылө петтөдзыс чожө пыр видзис орчча көрт туй поссө. Олісны гозъя зэв кыпыда, шмонитігтыр. Чожө тшөкыда дэльөдліс гөтырсө: «Менам тэөдз нылыд миллөн вөлі! И Польшаын, и Германияын челядыд менам быдмөны». Но некор эз вежөгтывлы чожинь-өс, эз кыскавлы, мый быдтө йөзлысь кагасө. И челядыс пөрысьмытөдзыс эз төдны, мый Ёгор чож Галялы абу бать. Сөмын ачыс Галя корсюрө чуймаліс: «Мыйла ті ставныд сьөдөсь, а ме еджыд юра?» Сылы пыр жө воча-

видзлісны: «Кодкө ылі рөдвужсьыд быть вөлі еджыд юра, со и кыскөны генъясьыд». Збыльвылас Галялөн батыс вөлі Елесь Олексан. И Галя лоө кувсьылөм нин Иван Иванович Напалковлы, кодөс йөзыс еджыд юр пондаыс нимтылісны Беляк Ваньон, воча чойон.

Война чөжыс Иринь чожинь видзис верөсыслы локтігкежлас водка доз, а бөръя кадас гозъя ёна пырөдчисны вина юөмө. Валя нылыс висьтавліс, мый быд лун ньөбліс налы курыдтортө. Ачыс на паня шуліс: «Мед юөны, мый сэсся вөчан?»

Кувсис Ёгор чож 88 арөсөн. Эз кө даръясь, гашкө, дырджык на оліс да... Оні налөн челядь пиысь ловъя сөмын Валя нылыс.

Миколай чож

Кулөмдінын Култура керка чойөд ләччигөн веськыдыв бокас шөр туй вылын сулалө кык судтаа ыджыд важ коромина. Стрөйтліс тайө керкасө Микита Пиля. Сылөн Ыльөксан пиыс гөтрасьліс менам ыджыд мам Марпа Наста вылө. 1915 воын налөн чужис пи — Миколай (Липин Николай Александрович). Но сійө эз аддзыв ассьыс батьсө, Ыльөксанөс босьтісны империа-листическөй война вылө, көні сійө усис. Ыджыд мамө коли дөвайн. Кызь квайт арөсөн ыджыд мамө мөдысь муніс верөс сайө, Пармаө ыджыд бать сайө, сәки сійө тшөтш дөвечаліс. Внуксө ас ордас кольөдіс да быдтіс пөльыс — Микита Пиля, йөзыс сәсся сідзи и шуисны чожөс Пиля Миколөн. Пармаө ыджыд мам дорө пиыс воывліс сөмын гөститны.

Миколай чожлөн олөмыс лои зөв сөкыд и интереснөй. 1937 воө чожөс босьтісны армияө. Сәки сійө вөлі нин гөтыра Ылюк Вась Анна вылын, налөн быдмисны кык пи: Пете да Коля. Ыти во чожө служитіс пехотаын, сы бөрын вуджөдісны морскөй флотө, плавайтіс мореясті, кытшовтіс, позьө шуны, му шарсө дзоньнас: Африка, Индия, ставсө аддзыліс. 1940 воө чожө воліс гортас отпускө. Куим вонад, дерт, пияныс прамөя быд-мөмаось нин вөлі, а гөты-рыс — рушкуа. Чожөос та-йө ёна жугыльтөдіс: кодлы нө татшөмторйыд кажит-час? Та вөсна кызвын кадсө зілис колльөдны ывлаын че-лядыскөд. Пиянсө пельпом вылас пуксьөдөмөн гуляйтіс туй кузя. Войнаөдзыс йөзыд зөв жө гөля олісны, бур паськөмыд некодлөн эз вөв, и морскөй формаа морт вы-лад сулалөмөн видзөдісны-любуйтчисны. А чожө чу-жөм вылас вөлі зөв мича, паськыд пельпомъяса, ён, статя. Отпуск помасьөм бө-рын чожөс пристаньөдз кол-льөдісны Анна чожиньө да пияныс, а сійө пароход вылө сөліс да эз и петавлы палу-ба вылас.

Служитіс Миколай чожө Ленинградын. 1941 воө ми-ян корабльяс дугдывтөг ну-исны Германияө нянь, а бөрсө немечьяс найөс эз нин лэдзны, арестуйталісны. Ленинградын и суис чожөс война. Война выв-сянь медводдза письмөсө ыстіс 1941 вося августын, көні мыйла-кө гижис, мый войнаыс заводитчис юнь 15 лунө. Блокада дырйи матросьясөс корабльяс вылысь вуджөдісны му вылө,



чождь воюйтис пехотаын. Висьтавліс, мый Ленинградын сэки став понсё да каньсё сёйсны, сёйсны и кулом йёзсё.

Блокадаысь мыном бёрын матросьясёс бөр модёдісны кораблясь вылө. 1944 вося декабрё чождьлысь корабльсё фашистьясь вёйтисны, экипажсьыс ловйон коли нель морт. Госпиталь бёрын чождь воліс отпускё. Сэки тайё вөлі нин дзик мод морт — чужомыс бумага кодъ еджыд, висьё, лолыс оз шед, курксё-кызё. Гортас олёны дзик бокёвёй йёз — квартирантьясь. Сылөн ветлігкості Анна гётырыс, коді, дерт, ёна жё майшасис-шогсис, кыліс асьсё грекаон верёс водзас, вайёма кага да виёма сійёс. Таысь сійёс пуксьёдісны 10 во кежлө, а пьянсё овмёдісны детдомё. Чождь гёститігмоз кайліс Пармаё видлыны мамсё. Стрөка сюрис, да Пеклаясын өти вой узьёма Миш Вась Машёкөд. Миш Вась, дерт, тайёс тёдлытөг эз ов, мод луннас жё чождьс да Машё нывсё вөлөн лэччөдіс Куломдіно да гижсьөдіс ЗАГС-ын. Тадзи Миколай чождь гётрасис модысь.

Война кусом бёрын 1945 воё воліс дженьыдик отпускё да бара на муніс служба вылө — весалісны минаясысь Финскөй залив да Балтійскөй море. Сёмын 1946 воё демобилизуйтчис дзикөдз, воис гортас да уджаліс леспромхозын. Миколай чождьлөн да Машё чожиньлөн чужисны челядь: Шурик, Борис да Нина.

Мыйон воддза гётырыс мыніс пукаломсьыс да воис гортас, чождь вуджис овны сы дорё, налөн нёшта чужис кык ныв: Лида да Маша. Во дас кымын олісны тадзи, а сёсся чождь бөр овмөдчис Машё гётырыскөд, кодкөд и оліс кувтөдзыс, 1995 воөдз. Тадзи чождьлөн лои кык гётыр, а менам кык чожинь.

Машё чожиньлөн керкаыс вөлі постоялөй двор кодьон. Коді Пармаысь локтас Куломдіно, сійё и пырө на ордө, быттё гортас. Век пармасаяс керка тырыс гиблитчисны. Миколай чождь да Машё чожиньё некор эз дёзмывлыны таысь, некор эз шулыны, мый налөн и сідз дзескыд. Анна чожиньё сідзжө вөлі зэв шань. Отчыд мамё аддзёма сылысь резина сапөг да шуёма, вот пё эськө Ваньёлы татшөм сапөгыд, да некысь тай оз сюр. Тайёс кылөм бёрын Анна чожиньё коксьыс пөрччөма сапөгсё да сетөма мамёлы, на пё, катөд пиыдлы.

Миколай чождьлөн воюйтөм йылысь стөчасё сідзи нинөм ог и төд, эз и лолы ськөд лёсьыда сёрнитомыс. Век нюждөдчи, думайті: сійё ён, дыр на олас, удита на. А со эг удит...

Снимокьяс вылын:

1. Ёгор чождь семьяыскөд. 1952 во.

2. Н.А.Липин флотын служитігөн. 1940 во.

Снимокьясыс И.И.Ногиевлөн гортса архивысь.





Пыр лоан миян сьӧлӧмын

1942 вося тӧвнас ме уджалі судоплотникӧн Няшабӧжса судо-верфын. Ноябр тӧлысь помланьыс Анна чой Кипиевосянь пись-мӧын гижис, мый фронт вывсянь воӧма шог юӧр — миян бать вошӧма косясы. Дыр эг вермы лӧньны, синвай сідзи и кис-сис.

Ыджыд войнаыс кыссис нӧль во. Косясы усис, ранитчис, веськаліс пленӧ помтӧм уна салдат да офицер. «Россиялӧн па-мечь книгаын», кодӧ петіс 1995 воын, пасйӧма, мый Сӧветскӧй Союзса армиялӧн косясы усисны да сьӧкыда ранитчӧм бӧрын кулісны госпитальясын 6329,6 сюрс военнӧй. Юӧртӧг вошисны косясы 5059 сюрс салдат да офицер. На пиысь, СССР-лӧн да Германиялӧн военнӧй архив документъяс серти, пленӧ веська-лісны 4559 сюрс военнӧй, мукӧдыс усисны косяын.

Ставыс жӧ СССР-лӧн Германиякӧд да Япониякӧд тышын бергӧдтӧм воштӧмъясыс нӧль онас артмӧ 11944100 морт, на лыдын 7922,5 сюрс мортис Россияса йӧз. Торйӧн нин бергӧд-тӧм воштӧмыс уна вӧліс 1941—1942 воасын.

Победалы 40 во тырӧм водзвылын странаын котыртысны сідз шусяна поисковӧй отрядъяс. Ӧткымыныс на пиысь ӧнӧдз вӧчӧны колана удж, корсьӧны тышын мунан эрдъясысь усьӧм салдат-офицерлысь шойяссӧ. Комын сайӧ онас война кадса салдатъяслысь аддзӧм шойяссӧ лои дзебӧма воинскӧй почестъяс-ӧн. Уна салдат-офицерлысь нимсӧ тӧдмалӧма косяс местаын аддзӧм орден-медаль номеръяс сертиис. Сідзкӧ, неуна чиныштіс вошӧм военнӧйяслӧн лыдыс. Уна йӧз и ӧні олӧны надеяӧн, мый вочасӧн лоӧ тӧдса, кӧні да кор усис налӧн батыс, дедыс, верӧсыс, пиыс. Шулӧны тай, надеяыд пӧ кулӧ медбӧрын. Да и войнаыс сэтчӧдз оз помась, кытчӧдз оз ло дзебӧма бӧръя салдатсӧ.

Чойяс да ме сідзжӧ олім надеяӧн, мый регыд тӧдмаласны, кӧні да кутшӧм косяын вошис миян бать. Но юӧрыс та йылысь воис дзик мӧдар боксянь. Кипиевоса шӧр школаысь велӧдысь Нина Александровна Канева интернет пыр тӧдмалӧма, мый 228 полкса 55 стрелковӧй дивизияысь радӧвӧй Хатанзейский Кондратий Ивановичӧс 1942 вося сентябр 20 луно сьӧкыда ра-нитчӧм бӧрын вайӧдӧмаӧсь 160 номера госпитальӧ. Кувтӧдзыс саяс абу и волӧма. 1942 воын тайӧ госпитальыс сулалӧма Ле-нинградскӧй обласьтса Крестовая грезд дорын. Но мыйла сал-дат кулӧм йылысь эз юӧртны семьялы? Тайӧ кадас Ленинградса фронт вылын мунісны чорыд косяс, уна ранитчӧм салдат-офицерсӧ вайӧдлісны госпиталяс, быдӧнлы пырысь-пыр колӧ

вөлі отсөг. И гижасьны, тыдалө, вөлі некор. А гашкө, госпиталь вылас вөрөг шыблаліс бомбаяс.

Менам бать Кондратий Иванович, кодөс чужан сиктсаяс шулісны Яран Конаөн, чужлөма Изьва районса Кипиево сиктын. Вөлі ыджыд тушаа, крепыд тэчаса, вына мортөн. Колхозъяс котырттөдз вөраліс да уджаліс гортгөгөрсә овмөсын. Гортса архивын вөлі справка, мый уна пушнина сдایتөмысь 1928 воын батьөс премируйтлөмаөсь кык ствола вөралан ружьеөн (справкаас гижөма — наградитөмаөсь). Колхоз котыртөм бөрас, мөд воас (1931 воын), батьөс бөрийлөмаөсь колхозса председателёс вежысьөн, уджавлөма сәні недыр. Колхоз котыртөмсянь медводдза воясас тшөкыда вежлалісны овмөсөн веськөдлысьяссө. Батьөй тулыс-арсө помся уджаліс колхозса стрөйтчан бригадаын. Ме унаысь аддзывлі, кыдзи сійө аслас ёрт Игнатий Иванович Дуркинкөд продольной пилаөн пилитіс тьөс-плака, черөн лөсәлісны керъяс. Гожөмнас пуктіс турун, любө вөлі видзөдлыны сыөн вөчөм зорөдъяс вылө.

Василий Иванович Рочев войнаөдз веськөдліс полеводческой бригадаөн. Ид да картопель озыр урожайяс быдтөмысь 1939 воын сійөс пыртөма ВСХВ-лөн Почёт книгаө. Аслас казтылөмъясын сійө гижліс, мый 1935 воын Изьваын муніс районса ударникъяслөн слёт. Сэтчө Кипиевоста «Путь Ленина» колхозысь мөдөдлісны вит мортөс, на лыдын и К.И.Хатанзейскийөс.

Лым усьөм бөрын 23–26 мортөс колхоз мөдөдліс леспромхозө пөрөдны да кыскавны вөр. Республикаса архивын уджалігөн син улө уси документ, көні сөрни мунө Изьва районысь вөрлөдзысь-стахановечьяс йылысь. Первойөн сәні пасйөма батылысь ним-овсө. 1939 воын лучкөвөй пилаөн сійө пөрөдөма 1500 кубометр вөр. (Госархив РК, ф. 629, оп. 1, ед. хр. 102).

1939 воын Кипиевоста «Путь Ленина» овмөссө вөлі наградитөма Трудөвөй Гөрд Знамя орденөн. Ёна уна водзмөстчысь колхозниклы, на лыдын и менам батылы, сетлісны премия.

Керкаыс, кодөс вөчліс батьөй, өні на мичаа видзөдсьө, сөмын кадыс пемдөдөма стенъяссө. Выхь керкаыскөд орччөн дыркодь сулаліс ичөтик керка, көні чужлөма батьөй. Керка джынсө кымын босьтіс ыджыд пач. Гортса көлуйсө бать вөчліс ачыс. Сервант вылас, помнита да, пыр никельөн дзирдаліс самөвар, батылөн премия, а васө пузьөдлісны ыджыд ыргөн самоварөн.

Войнаөдз миян семья оліс эз омөля, вөлі кык мөс, 5–7 ыж. Трудодень вылас идсө, капустасө, яйсө сетлісны тырмымөн. Мам, Фекла Исаевна, гожөмнас дасьтіс колхозлы турун, арнас вундіс ид, төвнас вөлөн новліс турун. Батылөн мамыс, Екатерина Васильевна, көр куысь вурліс шапка, төбөк. 1938 воын сыөн вурөм нывбаба пими нуисны Москваө ВСХВ-ө.

Бать кокныда артмыліс йөзкөд. Партияө эз пыравлы, көть эськө вөлі сөглас коммунистъяслөн видзөдласөн. Миян керкаө сиктсаяс тшөкыда пыравлісны. Бать радейтіс сөрнитны Тимофей да Герасим Каневъяскөд. Сөрнитісны чери кыйөм, вөралөм, странаын да мирын лөөмторъяс йылысь. Кыкнанныс усисны вөрөгкөд тышын. Пыравліс тшөтш колхозса механик Василий Абрамович Вокуев. Зэв сяма морт, кужис дзоньтавны часі, вурсян машинкаяс... Вөлі ёна шмонитысьөн, кадысь кадө пырт-



ліс газетъяс, корис, медым бать лыддис сійö либö тайö статьясö. Ачыс ёна интересуйтчис политикаөн. Война-öдзыс Степан Рочев йöзöдліс уна гижöд колхозникъяс йылысь Печора округса «Социалистическöй Войвыв» газетын. Торйөн нин, кор колхозсö наградитісны орденнас. Пыравлывліс Павел Васильевич Хозяинов. Сійö кужöмөн висътавліс странаын да Коми муын ыджыд вежсьöмъяс йылысь. Чорыда эскис, мый Сталин веськöдлöм улын СССР лоас медся озыр, медся вына государствоөн, медым сöмын эз торкавны ортсыса да пытшкöсса врагъяс.

Кольöм нәмся комынöд воясын Печора ю бердса сиктъяс пыр Уса районö нуöдлісны политическойясöс.

Öти рытö миян керкаö пыртісны дас кымын мортöс. Мам дасьтіс налы сёян, бать кыпöдіс пызан вылö туес квас. Изъваын сурсö шуöны квасөн. Бать синнас юаліс конвоирлысь: позьö-ö налы? Конвоир вочавидзис, позьö пö. Сійö рытнас миян керкаын дыр юргисны тöдтöм кыв вылын сыланкывъяс. Мöд луннас «гöсьтъяс» мунöм бöрын юалі батылысь: кодъяс найö? Дыр чöв олöм бöрын бать вочавидзис: политической прöтивникъяс. Ещö мыйкö кöсйис шуны, но тшöкмуніс, гöрдöдыштіс.

Войнаöдзыс Кипиевоын вöлі сöмын начальнöй школа, сійöс помалысьяс пиысь öткымынөн, на лыдын и ме, водзö велöдчим Брыкаланскса школаын. И колö жö, сизимöд классын öти четверть велöдчöм бöрын менам друг Александр Хозяиновкöд (война бöрас лоис зэв нималана бурöвöй мастерөн) эновтім школасö да локтім гортö. Батылы тайö ёна эз кажитчы, меным шуаліс: «Мужичöй, збыльысь кö мужичöй, сьöкыдсьыс оз пышъяв, а венö сьöкыдсö. Кутшöм синмөн ме видзöдла сиктса олысьяслы чужöмас, кутшöм мортöс быдта. Сиктын уджтöг весь ньöти лун он ов». Батылөн кывъясыс öні на сотöны сьöлöмöс...

Война вылас кыкысь ранитчылі. Локті гортö «За отвагу» медальөн да коймöд тшупöда Слава орденөн. Победалы 40 во пасйигөн наградитісны первой тшупöда Отечественнöй война орденөн. Война бöрас уджавлі кочегарөн, монтёрөн, плановик-экономистөн, матö кык во — сельпоса председателёс вежысьөн, сэсса 34 во — районса да республикаса газетъясын. Помавлі партшкола, заочнöя — пединститут. Уна во общественнöй подувъяс вылын веськöдлі районса музейөн.

Менам чойяс сідзжө эз янөдны батынысö. Анна чой Печора карса ыджыд предприятиеын веськөдліс бухгалтерияөн, ракуыс водз кувсис. Мария чой 41 во велөдіс, сы лыдын 32 во пединститутын. Сійö вöлі педагогикаса кандидатөн, доцентөн. Медічö-тыс, Катя, матö 25 во уджаліс Печора карса милицияын.

...Зэв бура помнита август төлысса öти рыт. Төдчымөн пем-дыштöма нин вöлі. Печора юсянь öвтис көдзыд ру. Кадыс ка-дö кыліс пароходъяслөн гудöккыс, на бöрын берегö локтісны гыяс. Бипурсянь öвтис жарөн. Би югыдас лöсталис батылөн сьод юриис. Сылөн синмыс вöлі веськөдöма ме вылö. Ки пы-дöсыс гыжъяліс менсьым сыліöс. Синсö читкыртыштöмөн баты сёрнитис мекöд, висьталис, мый войнаыс ваяс помтöм уна сьökыд-лун. «Война вылын усьö уна йöз. Эн эновт чойястö, дружнöя олöй, сэки кокныдджыка венсяс сьökыдлуныс». Тайö вöлі баты-көд медбөръяыс чери кыйöм. Кык лун мысти пароход нуöдіс батыöс война вылö.

Гожöмнас, лоа кө дзоньвидзаөн, нывкөд да пикöд ветлам Ленинград обласьтö, сэтчö, көні вöлі 160 номера госпитальыс, шойна вылас, кытчö дзебисны ранаясыс кулöмаясöс. Улөдз копыртчылам сійö муыслы, коді примитис батыöс.

Пасибö тэныд, батыö. Тэ век кутан овны миян сьолёмын.

Снимок вылын: *Хатанзейский Кондратий Иванович (пукалö) и Хозяинов Павел Васильевич.*

Снимокыс Н.К.Хатанзейскийлөн гортса архивыс.





*Егор Васильевич Рочев чуж-
ліс Большеземельскöй тундра-
ын 1937 вося май 7 лунö, көр
видзысьяс семьяын. Помтöм
тундраас кольöм челядьдырыс
и пунктис морттуй подуvsö,
муніс тувсовъя тундра кодъ
югыд сюрöсөн олöм да творче-
ство пырыс. Усвавом сиктса
школаын 8 класс помалöм
мысти пырис уджавны Ухта-
са механической заводö. Велöд-
чис рытъя школаын. 1956 во-
ын Егор Рочевöс босьтöны ар-
мияö. Служба бöрас бара лок-
тö заводö, водзö босьтö тöдöм-
лунъяс рытъя школаын да бу-
ретш сэки заводитö гижны.*

*1964 воын Егор Васильевич
уджсьяс орöдчывтöг пырис ве-
лöдчыны А.М.Горький нима Москва
Литературнöй институтö да
1971 воын помаліс сійöс. Сэки
«Войвыв кодзув» журнал
тишöкыда йöзöдö сылысь
аслыспöлöс висътъяссö. Бöрын-
джык Станислав Панкратовöн
вуджöдöмöн «Современник»
журнал козьналіс роч лыддысьы-
сылы Егор Рочевлысь «За
каждый свой шаг» повесът. А
«Митрук петö тундраысь»
повесытс петаліс роч,
украинскöй, эстонскöй,
удмурт да молдова кывгяс
вылын.*

*1977 восянь бура дыр уджаліс
«Войвыв кодзув» журналын,
öти кадö — главнöй редакторöн.*

*Егор Васильевич Рочев — 1977
восянь СССР-са гижысь коты-
рын. «Батълöн ордым» (1971),
«Лева» (1972), «Добрая тун-
дра» (1974), «Сьöлöмын
вурыс» (1976), «За каждый
свой шаг» (1979), «Лöз
тундра» (1980), «Менуре-
й» (1983), «Митрук петö
тундраысь» (1987), «Бе-
гут, бегут олени» (1989),
«Морттуй» (1991), «Кузь
вöт» (1998) небöггяслөн
автор. Радейтана тундраыс
став шуднас да тöждгяснас,
став сэтчöс олысьнас —
көр видзысьяснас, көргяснас,
кыньяснас, чериа тыяс-
нас — Егор Васильевичлөн
творчествовын.*

*Кувсьыліс Егор Васильевич 2012
вося октябр 9 лунö.*



Тундраса Ёгор

Гижысьястӧ, кодъяс мунӧмаӧсь нин миян дорысь, мыйлако казтыштлам медсясӧ сӧмын тшупӧда пас дырйиыс. Ёгор Рочевлы со май тӧлысьын эськӧ кӧкъямысдас тырис. Тайӧ визув синъяса, шмонлив мортыс меным и гӧгрӧс пастӧгыс унаысь юрӧ волӧ. Сы йылысь ме тӧдӧ нин гижан уджӧ босьтчытӧдз на. Зэв окотапырысь лыддылі висът-повесьтъяссӧ. Но асьсӧ медводдзаысь аддзи «Войвыв кодзув» журналӧ пыралігӧн. Пукала, варовита сэтчӧс уджалысьяскӧд. Выль гижӧдтор вайи да нимкодъ, мый эз бӧр бергӧдны. Воссис ӧдзӧс, да медводз воськовтис зэв ыджыд пон. Бӧрсяныыс неыджыд тушаа мужичӧй. Пукалысьяс кукань ыжда понсьыд эз повзыны, а менам морӧс улӧй вель ёна топавліс. Мися, татшӧмыд кӧ окыштас... Понкӧд пырысь мортыс и вӧлӧма Ёгор Васильевич Рочевыд. Бӧрас висьталісны, мый олӧ медсясӧ дача вылас да гаж пыдди понсӧ кутӧ. Сэсся пӧ и керкасӧ на понйыс видзӧ. Некодӧс оз лэдз пырнысӧ. Коркӧ пӧ Ёгорыс вежон кезлӧ кытчӧкӧ ветлӧма да дача вылас абу волӧма. Локтӧма, да понйыс весиг сійӧс оз вӧлӧм лэдз. Вунӧдӧма, тыдалӧ, вежоннад.

Та бӧрын ськӧд аддзыси Кӧрткерӧсын. Районса газетын уджалігӧн индылісны веськӧдлыны небӧг радейтысьяслӧн котырӧн. Сэкса кадӧ быдсяма колана и ковтӧм котыръяс вӧліны. Ме тай кызь гӧгӧрӧ вӧлі пыра-а. Он эськӧ ас окотасьыд сэтчӧ суйсьы да. Тшӧктӧны вӧлі. Кыдзи районса небӧг радейтысьясӧн юралысьӧс, менӧ партия райкомсянь тшӧктісны ветлӧдлыны карсянь воӧм гижысьяскӧд. Локтісны Юрий Васютов да Ёгор Рочев. Мӧд асывнас ӧтисӧ ыстісны Лӧкчим вожӧ, а Юрий Константиновичкӧд ми кытшовтім Кӧрткерӧссӧ. Некумын организацияын аддзысьлӧмыс муніс. А рытнас йӧзсӧ корисны волены ӧтувъя аддзысьлӧм вылӧ. Ёгор Васильевич Лӧкчимсьыд та кезлӧ воис жӧ. Аддзысьлӧмсӧ паніс Кӧрткерӧс районса партия райкомысь мӧд секретарыс, Юрий Александрович Лобанов. Сэкса кадӧ гижысьылӧн районад волӧмыд лыддыссис зэв ыджыд лоӧмторйӧн. Ӧні татшӧмыс со абу. Та вӧсна лоӧ неуна кезыштылыны Ёгор Рочев йылысь сӧрниысь.

Бӧръя вояснас ме кытшовті пӧшти дзоньнас Коми мусӧ да казялі тайӧс. Мукӧдлаас весиг быттьӧ корысь моз ветлӧдлан. Сӧмын Изьва районын мекӧд паныдасьлыны кадсӧ аддзис сэтчӧс юралысьыс, Любовь Ивановна Терентьева. А мукӧдлаас, тыдалӧ, весиг эз тӧдны, мый локтӧма гижысь. Ӧткымын школаӧ пыран, да некод весиг оз виччысь. Ковмӧ аслыд вӧзйысьны. Торйӧн нин сӧлӧмӧ парскис Кебра школаӧ волӧмӧй. Пыри сэтчӧ, некод оз паныдав. Шемӧса сулала калидорас. Сэсся воссис кутшӧмкӧ класслӧн ӧдзӧсыс. Мыччысис нывбаба, тыдалӧ, велӧдысьыс, да гораа шуис, дерт, рочӧн:

— Выступающий, закодите!

А сэкся кадö, шуа тай, гижысьясид вöліны зэв дона гöсьть-ясөн весиг районön веськöдлысьяслы. Со чукöртчисны кöрткерöсса олысьяс ыджыд зал тырыс. Юрий Александрович Лобанов паськыда вашмуніс да юасьö, кöні нö пö Ёгор Рочевыс. Локчимсянь пö юöртисны, мый сійö сэтшöм ёна воöма сьölöм выланьс да бöрсö мунны оз вöлөм лэдзны.

Кужис Ёгор Васильевич йöзыдкöд варовитны. И кывйыс сюрліс сэтшöм, мый он кöсйы, да нюмьд петас. Тайö аддзысьлігас сійö бара жö гажöдыштис войтырсö. А мöд асывнас колö вöлі мунны районса сикт-посёлокъясö. Локті на дорö гöстиничас, медым накöд сэсса мунны. Чолöмаси, юаси, кыдзи-мый узисны.

— Бура узьсис,— вочавидзис Ёгор Рочев.— Олöмыс вежсис да.

— Мыйöн нö вежсис?— окота вöлі тöдны меным.

— Вежон сайын алимент мынтöмысь мыні.

Сыктываркö овны вуджöм бöрын Ёгор Васильевичкöд пöшти быд лун паныдасьлывлім. И öні, кор сійö абу нин, унаысь гаж бырлö. Окота бара аддзысьлыны, но кадтö тай он бергöд. Ичöтик мыгöра мужичöйöс кö казяла ывла вылысь, бара на Ёгор Васильевичкöд öткодялышта. Сійö öд эз ыджыд и вöв. Ичöt пон пö тай век куту.

Сылön ичöt мыгөр йылысь со мый юрö воис. Гижысь Елена Васильевна Козлова бур нянь вылад топыд тэчас. Коркö праздник вöлі, гашкö, кодлыськö нимлун сёйим. Йöктыны тай уськöдчисны-а. Синмöс чöвтли джодж шöрын йöктысьяс вылад да шемöс босьтліс. Быдön кыкөн йöктöны, а Елена Васильевна öтнасөн катласьö шылад улас. Мися, сэтшöма гажмöма али мый нö? Сэсса бокöнджык бергöдчис, да сы сайсянь мыччысис Ёгор Рочевлөн мыгöрыс. Ичöтик мортыд, вöлөм, Козлова саяд оз и тыдав. Дзоля улысь, Ёгор Васильевичлы тэчас нывбабаяс сьölöм сертиьсджык вöліны.

Ёгор Рочев дыр кад томнад асьö лыддис. Ар ветымын нин вöлі матысмö и кодкö ывла вылын дядьön шыöдчöма, да быгалöм чужöмön «Войвыв кодзулö» пырис.

— Ачыс öд шуысьыс меысь на пöрысьджык,— ропкöдчис Ёгор Васильевич.

Дерт, сійö вöлі укшалькодь. Оз тэрмась некытчö. Котöртöм тай сылысь эг аддзыв-а. Сэтшöм жö вöлі удж вылас. Быттö дышпырысь вöчö. Но гижас кö мыйкö, то оз лёка. Тэрмасьтöгыд кöть оз öдйö сод, но бура артмö. Сійö пырджык ас пытшкас моз оліс. Та вöсна и йöзсö юр вежöрас кутны эз вермыв. Ме сійöс во вит нин вöлі тöда, а быд паныдасигөн на вылысь юасяс, коді ме сэтшöмыс. Коркö «Югьд туй» газетö уджавны сійö пыралöма. Тöлысь-мöд нин мырсьö, но мыйлакö оз радейт жырийн пукавны. Тундраад быдмөм мортыдлы дзескыд сәні, тыдалö. Со и ветлöдлö калидорöдыс, кор мукöдыс пызан сайын зунясьöны. «Югьд туйын» сэк медся ыджыднас вöлі Александр Васильевич Сажин. Сылы и босьтчöмаöсь няргыны-элясьны мукöд уджалысьыс. Ми пö гижам-ноксям, а Рочев калидор кузя тапкасьö.

— Ёгор Васильевич, миян öд уджалан кадад пырджык пызан сайынöсь войтырыс. А тэ пö калидорын медсясö,— топöдöма Рочевöс Сажиньд.

Модыс синсö читкыралöмөн вель дыр видзöдöма начальник вылас, код веськöдлöм улын тöлысь-мöд нин мырсьö, да юалöма:

— Кытыськö ме тэнö аддзылі, но ог вермы тöд вылö уськöдны, кöні паныдасьлім?

Таысь эськö абу на тодмышкалöмаöсь да. Бöрынджык нин ковмöма «Югыд туйсьыд» муннысö. Гожöм заводитчигөн ыстöмаöсь Рочевöс командировкаö. Изьва районö пö ветлы да вай сэтись гижöдъяс. Тэ пö войвылын чужин-быдмин, сэтчöс районса йöзыслысь олöм-вылöмсö бура тöдан, сямман лыддяна гижöд вöчны. Вежон кымын абу вöлöма карын Ёгор Васильевич. Локтöм бöрас вель дыр виччысьöмаöсь лыддьысяна гижöдтö. Сэсся абу вермöмаöсь вишкыны да топöдöмаöсь Рочевöс. Вай нин пö мыйкö. Та дыра ветлігад миян журналистъяс додь тыр гижöд вайлöны. Лун-мöд мысти Ёгор Васильевич сетас гижöдтö. Лист вылö пасйыштöма: «Мöдлапöлын баксісны мöсьяс. Тыдалö, Изьваö гожöм воöма». Со и став гижöдыс. Та бöрын, тыдалö, и ковмöма муннытö мортыдлы. Бур, мый «Войвыв кодзулö» уджалысь ковмöма да сэтчö инасис. Эз ковмы томдырсяыс моз стрöйтчанінын рöбитны.

Тундраыс сылы нэм чöжыс вöлі сьölöмсö да ловсö шонтысьöн. Весиг маличаөн кар кузя тапикасьліс гежöдика. Оліс сійö бөръя кадсö Моровоса дачаас да öти тöвся луно сёрмöма автобус вылад. Кöдзыд, да малича пасьталöма. Мунö подөн карлань. Некод оз сувт да босът, кöть эськö кисö кыпöдлас жö да. Медбöрын повтöм мортыс сюрöма жö, пуксьöдöма орччөн. Юасьö: кытысь татшöм тешкодъ паськöма мортыс? Ме пö тундраысь. Лэба вöлі самолётөн да уси. Öні пö аэропортö тэрмасы, мед мöдö сöвны да водзö лэбны...

Тундраад Ёгор Васильевич зэв радейтліс ветлыны. Öтчыд бара веськалöма чужанінас. Пуксьöдöмаöсь даддьö öтнассö. Тэрыба мунігад и пöрöма, усьöма лым пытшкас. Сыкöд орччөн туплясьöны водка дозъяс, кодъясöс тшöтш жö даддяд пуктылöмаöсь. Куйла пö и муртала, мый водзö лоö. Мела пö, дерт, оз бергöдчыны, а со водкаысла бытöн локтасны. Казяласны, мый абу да. И збыльысь, недыр мысти бергöдчöмаöсь водзын мунысьясыд. Зэв пö сюся гөгөр видзöдöмөн первой сулеяяссö чукöртісны, малалісны, жугалöмаöсь абу, сэсся пö сöмын ме дорö шыöдчисны, дойми эг усигас.

Уна во чöж гижысьяслөн Лёмъяуса керкаыс вöлі патератöм поэт-прозаикъяслы юр сюянінөн. Öти кадö сэні олісны и Николай Белых гозъя, Пётр Шахов, Удораысь Сыктывкарö овны вуджöм Юрий Васютов. Весиг керка дорас пуктасъяс да картупель быдтылісны. Медсясö Белых гозъя тайөн ноксьылісны. Керка дорас вöчисны градкодъöс да картофель вöдитісны. И воöма татчö гöсьтитны Ёгор Рочев. Пукалöмаöсь, варовитöмаöсь бурпöt. А Рочевыд ывла вылö петöма да мыйкö дыр оз лок. Кодкö мунöма корсьны да казялöма сійöс картофель му вылысь. Водз гожöм вöлöма, неважөн Белых гозъя пуктысьöмаöсь. Рочев копытчöма да картофель кöйдыссö мусьыс лукйö. Сы пыдди семечки кöдзö. Корсьны петысьыд и юалöма, мый нö пö дуран.

— Белых гозъя картофель петöм виччысьöны. А сы пыдди семечки быдмас — шензьöмыд налөн лоас,— челядь моз нимкодьясьö Ёгорыд. Ачыс мудера читкыралö синъяссö. Тыдалö, син

водзас сувтөдөма нин Белых гозъялысь шензьомсö, кор аддзасны, кыдзи картупель кöйдыссь вермис семечки чепöсьыны.

Висьталі нин тай, мый Ёгор Рочев ачыс медсясö оліс Мороса дача вылас. И тшöкыда висьтавлывліс, кутшöм озыр урожай босьтлö град вывсьыс.

— Таво тулыс теплицаö öгурцы пукті,— öтчыд ошйысис сійö.— Зэв бура дöзьориті. Сэсся мыйлакö дыр кад чöж эг вермы дачаö веськавлыны. Вои коркö сэтчö, да ёна и шензи. Менам теплица стеклöясыс жугласьöмаöсь, пöвъясыс чегласьöмаöсь. И мыйкö съода-еджыда визаяс сэнi мыччасьöны. Матыстчи, да вомöй калькмунис. Арбузъяс вöлöмаöсь. Öгурцы кöйдыс пыдидыд вöлöм меным арбузлысь вузалöмаöсь. И со мый ыджда быдмöмаöсь, весиг теплицасö пасьвартöмаöсь.

А лыддысьысяскöд аддзысьлігөн зэв радейтліс висьтавны армияс служитöмсö. Пушкаяс пö видзим. Тöвнас пö лым толаас тулуп суйöмаöсь. Часöвöйяссö вежлалігөн пö сулалысьсö тулупсьыс перъясны да виль мортöс дзумгасны. Сулала пö öти тöвся войö тулуп пыткад. Орччөн пушкалөн сыліыс тыдалö. Служитан пом нин матысмö, а ни öтиысь на эз мойвилы лыйны пушкасьыс. Петі пö тулуп письыд, матыстчи пушка дорад. Кытчö и лыйнысö? Видзöда пö, да енэж шöрас дзик гöгрöс тöлысь сюсьялö. Сэтчö, мися, и лыя. Камöбті-луйи. Весьöпөрöмөн, котөрөн локтісны командиръяс да пакöсьт вöчөмсьыд гаубахта вылö дзумгисны. Быдса дас вит лун пö сэнi видзисны. Мездмöма пемыд дырйи. Петöма дзескыдінсьыд, енэжö видзöдлöма, а сэнi тöлысьыд джынъя нин. Кык вежон öд кольöма. Менам пö нимкодъыд, вашъявтöг висьталö кывзысьяслы Ёгор Рочев, веськавсьöма тöлысяд да... Ставныс сералöны, а Ёгор Васильевич, нюмъявтöг, зэв сьölөмсянныс мöд тешкодътор йылысь нин босьтчö висьтавны...

Ёгор Васильевич чужлöма тундраын. Сэтчöс комиыдлөн сёрниыс абу эжвасалөн кодъ, кодöс босьтöмаöсь литературнöй кыв пыдди. Та вöсна Рочевлы вель дыр кад ковмис велавны гижны сідзи, медым висьтъясыс шогмылісны йöзöдöм вылö. Кор нин лоис нималанаөн, эз кут ёнасö жуглыны юрсö. Öшыбкаясыс гижöдъясас мыччысьлісны. Шуан вöлі та йылысь, да вочавидзас: «Корректорыс нö мый вылö? Мед вежлалö, сылы тшöтш жö колö сейнысö». Ая-пия Рочев век гижліс öтлаын. Тшукöдасны вöлі сылы да бара дöжныштасны, мый чёрточка пыр öд тайö гижсьö. Ёгор Васильевич вензыны босьтчас. Мыйла пö найöс чёрточканас торйöднысö. Ая-пияыс öд зэв матысса рöдвуж. Найöс пö некыдзи оз позь торйöдны.

Со лои неуна казытыштöма тайö мортсö, да сьölөм вылын кокнялыштіс. Быттö бара на аскöдыс варовитыштны сюри.



Висьтъяс

Сöмын милицияö эн сюрöдчы

1

Совхозной кассаыс Федöрлы сетисны витсё шайт. Ставыс кызь вита да снитки выльöсь, нюкыльттöг, карті колода моз и сюйыштис сьöмсö. Посводзын вочаасис нюмъялыс Федöрлы совхозса управляющей да нöшта на содтыштис көр видзысьлыс радлунсö.

— Но, Федöр Михайлович,— топыда кутліс кисö управляющей,— бура шойччы, медым сэсса во чöж эн гажтöмтчы тундраад. Ковмас кө — шыöдчы, сьöмтö бара на ыстыштам.

«Дивъя öні овны,— гортланыс восьлалігөн сьыліс сьöлöмыс Федöрлөн.— Сöмын уджав бура, совхоз деньгасö оз жалит, ачыс управляющей вöйö, эн пö яндысь — кор».

Ас керка дорас воис да эз сразу пыр, дыр пыркöдіс гöна көмсö-тöбөксö, эз лымсьыс — поводдяйс көдзыд, лымйыс косьмöма, ньöти оз лемась. Сійö кыпыдлуныс, кодöс апыштис контроаын, локтігас руалис помöдз. «Лючки пö шойччы»,— тшöктис управляющей.— Но сійö, комын вит арöса мужик, мудзис öмöй мыйыськö? Водз арся хора кодь, көрлөн сюръяс кө быдмисны — керка пельöссö чашнитис. Öти пасö, век жö, веськаліс управляющейд. Гажтöмыд босьтö тундраад, көр видзысьлы овлö шуштöм тöвса кузь войяснас стада дорын дежуритігөн. Татшöм гажтöм здукö и көсйöм чужис Федöрлөн: ветлыны отпуск дырйи ылö-ылö, ыджыд-ыджыд карö, көні олöмыс дзулькйөн варкйöпуö, кыдзи налөн ыджыд сьöд пöртйын чöскыд яя шыдыс.

Веськыда кө шуны, Федöр эз на петавлы паськыд мирас, ас-лас тундраыс водзö. Лым вылын чужліс и со тундраын верстьö кадсö коллялö. Весиг армияö эз босьтны ичöt туша вöснаыс. Сöмын кө ичöt туша вöснаыс, эз на и, гашкö, «еджыд билетавны», виччысьыштисны на. Но öд сьлөн, войнадырся мöритчöма-ыдлөн, и весыс эз судз. Военкоматö мунöм водзвылас бабыс (мед лöня узьö мöдаръягыдас, дзодзöг пук кодь сьöлöма вöлі) тöлысь чöж паччöр вылын куйлöдіс, мөс выйөн паньöдіс. Но Федöрлөн гос эз чöжсьы, мöдарö, шогысла ли мый ли, неуна быттö омöльтчыштис. «Ойя да ойя,— жалитис бабыс.— Кутшöм бур сёян изьведитін, а тöлк эз босьт».

«Ин на бракуйтö,— кевмысис сэки военкоматын дас көкъямыс арöса Федöр.— Войвывса козйыд öд ньöжйö быдмö».

«А-а,— серöктис кодкö комиссияса членъяс пöвстысь.— Тундраса багульникыд пожöмöдз оз нин во». Мурч курччис льöбъяс-сö Федöр да аслас тундраö веськөдчис. А весьшөрö кедзөвтöм-öсь сійös, кызь ар тырöм бöрас Федöр нюжалыштис, ёнмыштис, паськалісны пельомъясыс, ылісянь кө видзöдны, шөркодь тушаа öні лоис мортыс, некутшöма абу и ичöt.

Федөр пырис керкаас, чужом вылас нюм ворсыштö. Кыдзи нö мöд ногыс?.. Кöзйин гортас локтö, жугылавны кö кутас сийö, сэки и мукöдыслы шогавны.

— Мыйкö бара ликмöма,— вочааліс гöтырыс.— То-о, көр сюр моз чошкалöма вомыс.

— Кор да мый меным, Феклукö, эз ликмывлы,— Федөр тшöкмуні маличасö юр пырыс шедöдигөн,— Отпускö лэдзисны!

— Коран кö, дерт, лэдзасны. Код вöрса отпуссö тэныд думыштöма-а,— вежсис чужöмыс Феклалөн.— Горштö тыртны кутан? Али кынясыны мунан?

— Карö лэбзыла, вок ордö,— ыджыда ышловзис верöсыс.

— Тэ?!— каньлөн моз гöгрöсмисны Феклалөн съöд синъясыс.— Самолётас и юсян.

— Самолётас винасö оз вузавны.

— Кольом во Еп Федот карас петавліс да кык пöвса казенной бумага бöрсянныс воис — милицияын узылöма. Тэ öд абу жö сыысь бурджык.

— А коді ме, тöдан?

— Федөр.

— Вот и эн веськав. Верöс ме тэнад. Лöсьöдчы, öтлаын мунам отпусканнысö. Вок тай ёна жö корö век.

— Тэкöдыд?!

А Федөр и ачыс майшасис. Адресыс эськö эм. Но öд сийö сöмын бумага вылын шыпасъяс, шыпасыд абу тöдса мусюр либö шор бок, кыті сийö аслас дадюлөн гывъялö. Шуöны, кывйыд пö медбур ясöвöйыс, сы отсöгөн пö Киевöдз позьö воöдчыны. Но öд кодлөн кыдзи на! Федөрлөн ясöвöйыс — синъясыс, сылы колö кöтö öтчыд аддзавны, сэсся некор нин оз вун. Сэсся бара жö яндзим тöдтöм морт дīнас шыöдчынысö.

— Мунан он?— выльысь юаліс гöтырыслысь Федөр.

— Тэкöдыд?

— Он мекöд. Бускокöд,— скöрмис Федөр.

Сэсся гозъя ланьтісны. Кыкнанныс асланыс думъясö вöйтчисны. Федөр шогпырысь мöвпыштіс: таво, тыдалö, бара на оз артмы вок дорас гөститöмыс. Кымынöд во нин век косö. Фекла ыпмунліс верöсылөн карö корöмсыс, быттьö шонді югөр малыштіс морöс увсö, окота жö петавлыны паськыд мирас. Но верöсылы эз петкöдлы Фекла ыпнитлöм радлунсö, ышловзис сöмын да зільджыка босьтчис дзоньтавны верöсылысь тöбöксö. Сэки Фекла син водзö сувтліс эзв шуштöм серпас. Гожöмнас верöсыс-кöд волісны моребердса ыджыдкодъ посёлокö. Федөр кык лун юис да шöйтіс. Буско понныс моз Фекла бöрсянныс вöтлысис, медем верöсыс дзикöдз эз вош. Федөрöс юысьөн он шу, тундра-ас тöлысьясөн оз босьтлы вомас курыдторсö, а сиктад личöдö, быттьö кабакö локтö. Федөр ногөн, ичöt сикт — дзоля кабак, ыджыд сикт — гажа кабак, а карыд сылы — аддзавлыгтöм на кабак.

— Мунан он?— выльысь юаліс Федөр.

— Ог, Федөр, ог.

Федөр ёна дöзмис гöтырыслөн увтыртöмысь. Бара кынясöс кыйны? Дерт, пастук радейтö капканасынысö. Но öд öти тöлыс-нас кыныс оз на лыс, мöд муö оз вудж!..

Федөр тувсовъя сера байдөг кодъ пукалö, быттьökөн вурöма-öсь сийöс куим торйысь: сылыс и чужöмыс, кыті зэлыда век сибдöма малича юрыс — еджыд, ныр-вом гöгöрыс, кыті тöv и

гожём восьса, кыті помся кеслө чизыр вой төлыс, гөрд руч бөжөн ымралө, рудов юрсиыс төвся хор гөн кодь сук, но кажитчө быгалыштөма нин. Чужём вылас пастуклөн медся тыдаланаыс ён нырыс, кодөс кынтавліс тайө төв.

Батьыслысь майшасьёмсө казялө Настук нылыс. Дзольёник нывка гусьёник сибөдчө батьыс дорө:

— Висьö нырыд өмөй?

Федөр көсйө скөрмыны нывка вылас, но оз вермы.

Федөр гыжъялө баябөжсө да чорыда мөвпалө. Збылысь-ө веськөдчыны карас? Нырыс висьыштө. Но и мед. Карас өмөй абуюсь гөрд ныраясыс? Тырмымөн жө, шуёны. Öтнөгыльтчас на костын, шуам, оз кө аддзы воксө, да на моз жө йирсяс-пөткөдчас столөвөйясын. Век жө Федөр помөдз оз вермы пөдтыны падъя-лөмсө, медбөрын шкапысь кыскө водка доз да лөсыштө стөканөн. Со и став майшасьёмыс быгаліс. Карысь повзёма, тундраыс со мый ыжда, да оз джөмдав. Карыд, буракө, мерайтны кө, өти паськыд нюр кымын лөө, кытысь туруныс өти вой кежлө и тырмө сылөн куим тысяча көр стадалы.

— Муна!— равөстис Федөр да кышаліс маличасө. Сы бөрся вөтчис шөйөвошөмөн гөтырыс.

Харей посёлокысь некор уна мунысь эз вөвлыны, сы вөсна билетяссө вузавлісны, поэь шуны, самолётө пуксигас нин. А аэро-портыс ичөтик пу керкаын, радистыс и кассирыс өти морт — Самолёт Öльөксанөн ыждөдлөны, зэв нин дыр уджалө аэропор-тас да сійөн, буракө.

— Билет,— нюжөдіс Федөр сьём.

— Кытчөдз?— мода вылас юаліс Öльөксан, көть билетсө сі-йө век вузавліс сөмын Печораөдз.

— Помөдзыс.

— Кутшөм помөдз, му шар помөдзыс или матөджык?

— Мый юасян, век өтилаөдз тэнад дадюлыд вайөдө. Джын туяс эн жө коль менө, помөдзыс вай билетсө,— вашъяліс көр видзысь.

— Миян чом дорөдз сет билетсө,— велөдіс аэропортса на-чальникөс Фекла.— Мед кошукөдыс лэзасны чом весьтас, сэки казялас, оз мөд өнія моз диклунсө песны.

— Ог төд ме тиянысь чом местасө,— лөня вочавидзис Öльөк-сан, буракө, повзыштіс Феклалөн скөрысла ыпъялысь чужө-мысь, эз пыр венө.

Самолёт шытөг пуксис сикт горулө, лыжиа АН-2 быттё сывъяссө шевкнитөм дзодзөг лажмыньтчис аслас поз вылө. Федөр медбөрын сюйис юрсө көрт лэбачлы нель рөча гыркас, кодкө нетшыштіс малича бөжөдыс, бергөдчис — мада Фекла, төлысь-лөн кодь гөгрөс чужөма, еджыд малича юра, жалпырысь дзор-гөны сьөд сэтөр синъясыс:

— Эн нин көть милицияс сюрөдчы...

— Давай, давай, йөзсө эн манит,— тэрмөдліс Федөрөс лётчик, клопнитіс ён өдзөссө да крукаліс-игналіс. Буракө, медым пастук бөр эз чеччы. «Татысь он пет»— думыштіс көр видзысь, и ёк-муніс сьөлөмыс. Мыйла и кытчө сійө мөдөдчис? Мыйла эновтө гөтырсө да челядсө? Кутшөм шог сійөс вөтлө? Серамыд петө, гаж корсьны мунө карө. Абу өмөй шудыд да гажыд аслад чужанін-ын, аслад киясөн шонтөм да пелькөдөм поэйын? Ок, Федөр, Федөр... кутшөм на бөб тэ вөлөмыд. Öні сылы сэтшөм жаль

лои гётырыс да Настук нылыс, коть эськөн бөр петас. Но самолёт вёрзис нин, со нетшыштчис лым бердсыс, качис енэжө, вөчө сикт весьтөд кытшов. Колва юлөн векныд нырд вылын шлапвидзө сылөн сиктыс. Кутшөм сійө ичөтикөн кажитчө пом-төм-дортөм лымъя эрд вылас, коді воссис сылөн син водзө самолётсянь, керкаясыс лясмунөмны джуджыд лым толаяс пытшкө, быттьө съод быкъяс суйөмны ныръяснысө, медем апыштны кымөм му бердсыс пыш кодь кос да юмов яласө.

2

Самолётысь петөм бөрын Федөр кыліс став вир-йяыслысь мудзөм. Туйыс вөлі кузь, лэбисны төв паныд, самолётыс матө кык час дорвыв зыркөдіс Печора карөдзис. Торъя нин мотор шы-ыс виис, лыөдзис йиджис, пель вуж дінас швачөдіс, дзик йөй кодь лоис. «Дадювнад медся на лөсьыд войлынытө»,— думыштіс көр видзысь да лэдзчысис самолётсянь неылө лым вылас. Регыд сы дорө веськөдчис съод ыж ку пася кыз нывбаба, киас сійө кутіс кутшөмкө кабалатор. Сы серти, кутшөм зумыда сійө вось-лаліс джуджыд морөссө водзлань чургөдөмөн, веськыда ёсь шы-ла моз бытшкис видзөдласнас — Федөр гөгөрвоис, мыйкө зэв омөльтор сійө вөчис. Вермис кө эськө, Федөр тайө ёсь синъяс-сыс байдөг моз лым пиас репис.

— Гражданин, тані пукавны оз позы!

— Ме шойчышта,— лөня шуис Федөр.

— Сы вылө эм гөстиница. Марш татысь! Шөйтө сэні быд... вина гагыс.

— Тэ аслад мужик вылад командуйт, а ме тэныд лоа бокөвөй морт,— мөдіс пыксыны пастук.

— Хам! Чукөста милицияс, аддзасны тэныд местасө өдйө.

Федөр звирк чеччис, төв ныр моз кучкис гөтырыслөн самолё-тас пуксигөн шуалөм кывъясыс, сөмын пө милицияө эн веськав. Со и шедіс! Из моз топавліс кынөмыс, вежынытчыліс вомыс. Вынийөра нывбаба, буракө, казяліс Федөрлысь шөйөвошөмсө, лөньджыка нин шуис:

— Со гөстиницаыс,— индіс вит судта ыджыд кирпичной здание вылө.

— Охо,— чуймис Федөр.— Сэтчөсө дөза унаөн төрасны.

Федөр эз дзик пыр веськөдчы гөстиницалань, сөмын крепыда вурыштіс вежөрас: со веськыдывлас джуджыд кирпичной труба, мыйкө кизьөр ру кодь сөдзтысьө сысянь, шуйгавылас — көрт труба. Кык труба костас и гөстиницаыс, коть лунвывсянь, коть войвывсянь сы дорө матыстчы,— век нин инман.

Медводз Федөр шуис шөйтыштны карөд, кыйкъяліс быдлаө да ас ногыс донъяліс, медвойдөр сійөс чуймөдіс өтитор: быд паныдасысь сюся видзөдлө сы вылө, мукөдыслөн весиг нюмыс петыштілө. Федөр гөгөрбок лөсьөдіс асьсө, маличаыс выль и съод ной кышөдыс, кодөс павгөма малича эж вылас, абу некыті льякөссьөма. Недыр мысти сійө гөгөрвоис помкасө: сылөн паськө-мыс ёна торъялө карсаясысь. Со ставыслөн туша гөгөрыс лөсьы-да сибалысь пальтояс, лөсталысь көмаөсь, гачьяснысө уютжитө-маөсь пурт дорыш моз. А сійө быттьө байдөг кельөбө веськалөм съод рака. Самолөтас на татшөм мөвпыс вирдыштіс. Но гыр-дзатө тай он курччы. Торъя моднойось нывъясыс. «Эсійө авъя

важенкаыс,— көр видзысь мөвпаліс водзвылас восьлалысь сьод пая томиник нывбаба йылысь,— буди, пружина вылын сулалө-а, пельпомъясыс быттьо кыммомаось, оз небось вөрзыывны. Кытчö бара тюрөдө-а».

Федөр весиг өддзөдіс воськовсö, орччаасис да видзөдіс синъясас, быттьо визув юö вöйтчыліс, ыркмуніс, мыйöнкö сотыштис виччысьтöг, и сэк жö зэв кокни да нимкодь лои лов вылас. Но мыйлакö кисьмөм оз кодь чужöмаыс бергөдчис мөдарö, пöлынгіс вöсньыдик сьылісö, быттьо сійö, Федөр, чизыр вой төв, мыйысь быть колö сайөдчыны. Федөрлы тшöтш лои яндзим, мыйкö бара эз сідзи кер, кольччыштис төкөттьö бөрлань. Асьсö ылөдігмоз заводитіс донъявны мукөдъясöс. Тапиктіс паныд олыштöм нывбаба. «Татшөм важенкаястö ми бракуйтам нин»,— жалпырысь думыштис пастук, кодыр чөвтліс видзөдлассö сьлөн быгалөм чужөм ылө.

А со и гөстиницалөн биа трубкаөн гижөм нимыс — «Печора». Кыз стеклö сайын лөсталис администраторшалөн банйөм ныр-вомыс, сы дорын некод эз гартчы. Федөрлы быдсөн нимкодь лои, сідзкөн, здукөн и местаö индас шонді кодь чужöма тайö нывбабаыс. Көр видзысь перйис питшөгсьыс да нюжөдіс паспортсö.

— Тэ лыддысьнысö кужан али он? — стрöга юалис гөстиницаса көзйяка да зурөдіс чуньнас еджыд пөвійö, кытчö ясыда, гырысь букваьсөн вöлі гижöма: «МЕСТ НЕТ».

— Та ыджад көрөминаас öти мортлы места оз сюр?!— чуймис Федөр.

— Да? Тэ öтнад и ветлысьыс. Ном мында йöзыс — геологъяс, строительяс, нефтяникъяс, газөвикъяс, быд сикас командировочнойыс. У-у-у... Газетъяс колö лыддыны, ключөн пуö оломыс миян крайын. Оломсьыс бөрö кольөм морт...

Көр видзысь сөмын лапйөдліс синъяснас збой көзйякалы. Збыль, этша лыддысьö, век ывла вылын, чомйын пемыд, гожөмнас да тулыснас, стöч югыд пöраас, почтасö вайöны гежөда, кык-ö-куимысь, оз унджыкысь. Сэсся Федөр пуксис паськыд диван ылө да заводитіс ас кежас лөня мөвпавны. Артмö, бөбйөдлө сійöс администраторшаыс, газетъяс пö колö лыддыны, сэсся бокті гөгрөдлыны гөстиницасö, медем не дөзмөдны сылы... «Мудер асланыс, ок мудер»,— лыддьөдіс Федөр лөсьыд чужöма нывбабаос да аслыс чорыда шуис: «Ме татысь некытчö ог мун!»

Регыд Федөрöс бертис мудзыс, төдчис асья юыштöмыс и кузь туйыс, и уна сикас карса ыль серпасьясыс. Кыдзи и век, көр видзысьöс өдйö да чорыда сывъяліс унмыс. Здук мысти Федөр кузяа шкорнитис и эз кывлы, кыдзи сы дорö шыш моз кок чунь йылас матыстчис шонді чужöма нывбабаыс.

— Гражданин, тані абу спальня!

— Тані нö мый?— унзильпырысь юалис пастук да ыльысь кунис синъяссö.

— Кылан?— чорзис гөлөсыс нывбабалөн.— Пукавны позьö, узыны оз. Первойысь предупредита.

Федөр мый вынсьыс чашкөдіс сибалысь синлапгьяссö, жалпырысь мөвпыштис, мыйла сійö туңдраас эз велөдчы узыны восьса синмөн. Сійö öні сюся дзоргис кыз стеклö сайын ас местаас жмотвидзысь гөстиницаса көзйяка ылө, ылөдіс наянитысь унсö. Сэсся Федөрлысь лаймысь мөвпсö пöлялысь төв нырыс бергөдчис мөдарлань. Мыйла нö эськөн сійö шань нывбабаыслы сэтшөм өдйö нем абусыс пuzzyнысö? Сөмын сы вöсна, мый кодкө

узьö пуксöн? Кыдзи нö тани он вугырт, татшöм лöнь да шоныдinas? Та мындасö öд колö жö вежöртны!

Артмис сідзи, кыдзи пастук эз чайт.

Садьмис көр видзысь гораа видчöмысь:

— Мутиясыс тайö вина гагсö ме вылö ыстисны. Чеччы, чучелö! Кылан? Звöнитла öд кытчö колö — сэки садьман.

Кöть Федöр эз на тырвыйö садьмы, но сійö лючки гөгөрвоис, кутшöм «козин» сылы вöзйö тайö ыръянитысь нывбабаыс. Со талун мöдысь нин милицияөн повзьöдлöны, абу прöстаысь Феклаыс такöдöма самолёт дорас. Тадзинад збыльысь кытчöкö йөршитасны. Федöр весиг эз видзöдлы гöстиницаса көзйайка вылö, тэрыба петис ывлаö.

Улича вылас лунся серти (сэки Федöр буракодь кытшлалис, кыдзи ачыс чайтис) йöзыс тöдчымөн сукмöма, быттö кодкö вöльнöя йирсысь стадаос шызьöдöма, чуктöдöма сёянінъяссыныс — шондібана шор пöкатъясысь, кутшöмкö пастук сибöдöма стадасö, дзескөдöма, векныд воргаясті кытчöкö веськөдöма. И визувтö йöзыс югыд биясөн пöртмасысь уличаяс кузя бөрö и водзö, быттö вабергачö шедöмаось. Федöр видзöдліс часі вылас — квайт гөгөр. Ывла вылын сійö палялыштис, эз нин кыв сійö сьöкыдуныс, коді личкыліс гöстиница диван вылö. Көр видзысьлөн тöкөтö сюмалыштис кынöмыс, но сыысь шогыс эз вöв, карад мортыдлы йирсянінъясыд тырмымөн да и зэв пötöсаось. Кымын магазин, столövöй да кафе нин паныдасыліс, весиг öти ресторан аддзыліс. Магазинъясас чериыс и яйыс пуöма нин, көрт банкаясö иналöма, восьты да и паняв. Банкаясыд эськөн абу и ыджыдось, но некымынös кө помся нылыштан, он каитчы, из моз кынöмад шняпкысьö, ды-ыр пötöслунсö кылан. А юмовторйыс! Видзöдлан, да синъясыд шармылöны. Лöсьыда карад олöны, ставсö водзвыв артыштöмөн. Сöмын öтитор эз во сьölöм вылас Федöрлы: узяніныс оз сюр, весиг улич вылас оз лэдзны вугыртлынысö, быттöкөн мортыс көртысь, быттöкөн сылы оз йидж мудзыс, быттöкөн сылы дурпоп моз век колö кок йылас бергавны. Мыйла? Федöр бара видзöдліс часі вылас, юрас вирдыштіс виль мөвп: став тайö пötöса йирсянінъясыс вой кежлас пöдласьöны. Тулыснас тадзи жö чорыд чарöмыс томнавлö көръяслы сёянсö. Көр видзысь, коді вунöдлö сійö пöра йывсысь — коньөрö пöрлö. Ёна нюжмасьöм вылö кадыс эз нин коль. Федöр збоя воськовтіс дзирдалысь гастрономö. Медводз кык «Экстра» пинжак зептас пуктіс, позис и унджык, запасыд мустö оз зырт, но сэсся некытчö, малича сосъясас консерв банкаяс тэчис, гираяс моз увлань личкöны. Но кöні и кодкөд ректыны дозъяссö? Öтнаслы? Федöрлы сійö медся зывöктана уджыс.

Но пастуклөн майшасьöмыс вölöма весышөрö. Магазинысь петöм мысти пыр жö сійös сувтöдіс паськыд бушлата дядьö.

— Куритöд, друг, верман кө.

— Сійөнсö ог балуйтчы,— чатöртчöмөн видзöдліс Федöр кузь дядьöлы гырöмөн синъясас.— А юрыд кө висьö, верма веськөдны.

— Верман?! Но кыдзи нö оз вись, век сійö менам висьö, асывсянныс и заводитö поткөдны,— вашгяліс дядьö.

— Помсыыс гулькнитан?— Федöр мыччис дозсö.

— Помсыыс? Ме öд абу кутшöмкö коньөр, буракö, стöкан на аддза.— Дядьö ветліс кытчöкö да регыд бөр локтіс.

— Эз сюр.

Недыр мысти бушлата дядьö да Федөр восьлалісны орччөн важ тöдсаяс моз варовитігтыр.

— Сійö менам сэтшöм друг,— ошйысис дядьö,— көть кор ог пыр, абусö и эмсö пызан вылас лэптас. Вот ачыд аддзылан.

Дядьö туй чöжыс шмонитіс, торъя нин тешкодьöн кажитчис Федөрлы сылөн нимыс — Кузя. Туй кузя пö или лым кузя, чиктыліс Федөр. Сэсся сувтісны öти судта лашмунöм зэв кузь керка дорö, татчö пö и пыравлам.

— Тöдмась, Ёша!— лемыд коридорысь öти жырйö пырöм бöрын кыпыда юöртис Кузя.— Со! Тундраса öти кутшöс вайöді, Федөр нима.

Кöрласьöм да сера чужöма Ёша зэв жутыля видзöдіс гөстъяс вылö.

— Бар-р-ра сёр-рр-мис,— чолөмасьöм пыдди ёрис кодöскö Ёша.

— Коді?

— Кур-р р... кур-рр...

— А-а,— нюжöдіс Кузя.— Гөтырыд эз лок. Оз вош. Некод на некытчö абу вошлöма. Кылан, Ёша, пызан вывтö лöсьöд,— тшöктіс Кузя.— Со кутшöм гөстьöс вайöді, позьö шуны, тундра-сьыс медглавной кöинсö,— водзö шмонитіс сійö.

Ёша чöла вевтис пызансö газетөн, перйис мешöкторйысь сукаръяс:— Кö-öин кö, пиньыс ён — ги-и-рскöдас.

Федөрлы вöлі зэв деливö, мый сійöс тадзи уважайтöны, но и бөр петны эз вöв лöсьыд. Сэки эськö дзикöдз скöрмöдас выль другъяссö. Коліс мыйкö вöчны, а сійö сöмын вашъялö, быттö сылы, Кузялы моз жö, нимкодь татшöм кимöститчöмыс.

— Ешшö мый эм? — кыпыда юаліс Кузя.

— Сэсся сöмын абуыс ко-о-льыштіс.

— Ладнö,— вежыньтліс чужöмсö Кузя.— Көть нин сійöс ичöтика личöдышт.

— Да, нинöм оз ков, менам ставыс эм,— тэрыба шуис Федөр, быттö сійö повзис, мый зэв зывöктанатор öні лэптас пызан вылас кöзяиныс. Көр видзысь малича соссьыс заводитіс гылöдны консерв банкаяс. Медбöрын пуктіс пызан вылö водка дозъяссö. Сылөн вöрöм бöрся зэв сюся видзöдісны ёртъясыс, налөн синъясысь позис лыддыны шензьöм и нимкодьлун, татшöмыдкöд пö дивъя на другасыньтö.

— Но-о!— шлопнитіс кияснас Кузя.— Татшöм мотивыс меным любö. Пöрччысь, Федөр. Кыдзи отчествоыд?

— Михайлович.

— Менам дедлөн тай. Пуксьы, Михайлович! Ло кыдзи гортад. Эн пов ни эн яндысь. Медбур другыс, кыдзи шуласны, эмнас и абунас юксяс. Дерт, медсясö абунас, но öд кодлөн кутшöм мода, нинöм он кер.

Первой стöкан кымыньтöм бöрын бур здук кежлö ставөн шöйöвошлісны. Көр видзысьлөн личалісны жö тöждъясыс, весиг думыштіс: «Со тай кытчö и колöма пырнысö...» Но Кузя водзö нуöдіс ассьыс мойдсö:

— Тöдан, Михайлович, кутшöм менам олöмыс? Быттö сермö-давтöм вöв вылын пукала, ог тöд кодарö сійö и рöдтöдас... Геологөн вöвлі, кочегаркаын шонтысьлі, стройкаяс вылын тірзбылі. Ог соссьы: профсоюз чырыштлывліс, а мукöд сьölöмаджык начальникыс и ачыс вöлі справитчас, корас кабинетас да лабутнöя кисö нюжöдас, прöщайтлы пö, Кузя, мед менам син водзысь весасин сэсся!

— Сермөдавны, сідзкө, колө вөвтө...— ньөжйөнник шуис Федөр. Кузя мудера видзөдліс пастуклы синъясас.

— А ме некытчө на эг йөрмывлы. А төдан, мыйла? Сы вөсна, мый менам эмось бур другъяс, Михайлович.

Лябмис көр видзысьлөн быдтор жалитысь сьолөмыс:

— А тэ ме дорө лок, тундраө.

— Мый сәні кута вөчны? Кодзувъяссө лыддыны.

Көр видзысьлы вөлі тешкодьөн татшөм юалөмыс. Со өд, сылы кутшөмкө торъя удж колө? Оз лөсяв налөн пастукалөмыс. Кузялөн ыкшалуныс парснитіс Федөрөс, и сылы окота лоис шмонитыштны тшапитчысь морт вылас.

— Ме тэнө сувтөда медся джуджыд мыльк вылас,— шуис Федөр.— Тэ кутан омлявны, көинъясөс чуксавны.

— Мыйла?

— Ме неылө дзебся да мөда лыйлыны найөс.

— Быд вой колө омлявнысө?

— Быд вой.

— Узынысө кор тшөктан?

— Кор и көинъясыс — луннас.

— Оклад?

— Окладыс көинлөн кодь жө.

— Нельсө, витсө...

— Сөй көть поттөдзыд. И ставыс.

— И ставыс?!

Өтпырйө куимнанныс гөрөктісны. Недыр мысти Кузя жутыля видзөдліс рекмөм дозъяс вылө да нюжөдіс:

— Ваймыны тай мөдіс бипурным, коді лөдсалыштас?

Федөр кыскис зепсыс кызь витаөс, өвтыштіс сынөдас, ме пө гаж пестысьыс, здукөн пө войөдла.

— Пуксы, Михайлович,— небыда шуис Кузя.— Тэ гөсть. Ёша ветлас. Ёша, гөгөрвоан обстановкасө?

— Ассыд челядөтө велөд, а менам иин пи-и-ньясыс киссьө-маось, кур-р-р...

Регыд гажыс выльысь ыпнитіс. Федөр казяліс, мый кыськө пызан сайын лоисны выль йөз, но эз мөд юасыны, кодъяс да кытысьсө, юоны да ызгөны тай-а. Первойөн ладсө торкис Ёша, заводитіс видчыны, колө пө мунны гөтырсө корсьны да лөк нуждаыс кутө, сьомыс абу. Федөр мездіс пикө воөм мортөс. Сы бөрын «удждысис» Кузя, пинжак соскыс сырзьөма пө, да быгтьө сылыштіс. Сэсся өта-мөд бөрся дзайгыны мөдісны мукөдъяс. Федөр скөрмис, кыскис став сьөмсө да шыбитіс пызан вылө:

— На, пурсьөй.

— Нецензурной кывъясөн вөдитчан!— горөдіс паныдөн пукалысьыс да лөсыштіс Федөрлы щөкалыас.

Та бөрын гажыс дзикөдз кусі, быгтьө эз и вөвлы.

3

Федөр садьмис да чөскыда очсыштіс, сэсся тыр вежөрас воис да быгтьө войтөв кыскыштіс став тушасө, турдыліс здук кежлө. Мыйла сійө узыө шоньд шебрас улын да еджыд прөстыняяс костын? Водліс жө сійө, кызди помнитө, лым вылө, стөчдыка кө, туй вылас, кыті ветлөны йөзыс. Коді нө сы вөсна тадзи төждысис? И бур водзын-ө татшөмыс? Вөрөдыштіс Федөр

пыктыштӧм щӧкасӧ да ойӧстӧс, эз сэтшӧма дойсьыс, кызди тӧрытъя мисьтӧм серпассьыс, кодӧ өнӧ бара син водзас сувтӧс. Тӧрыт, щӧкалыас сӧтыштӧм бӧрын, кыкӧн кодъяскӧ тӧрмӧддӧмӧн йӧткисны комнатасьыс, ӧдва и слӧймис маличасӧ юрас суйны. Колльӧдыштӧсны да сьыліас сеталӧсны, тшӧктӧсны вунӧдны бӧр туйсӧ. Федӧр некор на сэтшӧма эз пузьывлы, паськыд малича пытшкас лой дзескыд варкыйсь лӧглуныслы.

Петӧс туй былӧ, ылыстчис зывӧктана керка дорысь, довгис кытчӧ нуӧ кокыс. Ӧнтая ярлуныс ваймис, кызди лӧдсавны вунӧдӧм, энӧвтӧм нӧддӧ, сы пыдди самасис сьӧлӧмас сьӧд шом кодъ гажтӧмлун. Татшӧм шогыс ӧдвакӧ коркӧ сійӧс личкыліс, весиг турӧба войясӧ, кодыр стада дорысь кывліс тшыг кӧинъяслысь омлялӧмсӧ, кодъяс вермисны ныр увсьыс нетшыштны кӧр стадасӧ. Пастуклы вӧлі сӧ пӧв кокниджык сӧки, эм нӧмӧвӧйся гижтӧм закон: эмӧсь кӧръяс, бергалӧны на гӧгӧр и кӧинъяс. Федӧр эз жалит воштӧм сьӧмсӧ, весиг эз думайт «другъяс» йывсьыс, сьӧлыштӧс найӧс вир сорӧн, кызди вом пытшкӧссьыс чегӧм пиньсӧ. Шогыс писькӧдчис мӧдласянь, укшаль ты пыдӧссянь ляскысис кӧзӧдан няйтӧн. Окота вӧлі сылы горӧдны тайӧ здукас: «Мыйла нӧ татшӧм уна йӧза карас ме ӧтнам? Мыйла нӧ сьлӧн уличаяс былӧ сивалӧма сэтшӧм мудер лӧчъяссӧ да капканъяссӧ?»

Федӧр сунгысис лымйӧ. Буракӧ, регыд унмовсис. Водзӧ нимӧм эз помнит. И со кодкӧ вайӧдӧма, пӧрчӧдӧма и водтӧдӧма крӧвать былӧ. Сійӧ некыз эз вермы вежӧртны, кӧні, кодъяс ордын ӧнӧ гӧститӧ. Видзӧдліс гӧгӧрыс: койка вит-ӧ-квайт тыдалӧ, быдлаын узьӧны-стынитӧны, кодсюрӧяс весиг ымзышталӧны, буракӧ, мыйкӧ оз лючки вӧтавы. Сӧмын ӧти койка вӧрзӧддлытӧм, шӧрас перинасӧ вештыштӧмӧн, медым не нокны, полӧгтыр пукалӧ косӧник сьӧд дядьӧ. Сійӧ вӧлі Федӧрсянь ӧти койка сайын, и Федӧр лючки аддзис сылысь шог чужӧмсӧ. Садьмис коркӧ и орчча койка вылын узысь, кыз гӧлӧсӧн шыасис пукалысь дядьӧ дорӧ.

— Семӧн, тэ нӧ мый тӧрзян куш майка кежсьыд. Эшкын улас мый он пыр?

— Шмонит,— жугыля вочавидзис сьӧд дядьӧ.— Видзӧдлам, кодӧ бӧрас мӧдас серавнысӧ.

— Мый нӧ? Тэ войбыд эн и водлы?

— Зэв дона сувтӧ тайӧ койка вылас узьӧмыс,— курыда нюмдіс майкаа дядьӧ.

— Гашкӧ, чайтан, штрапсӧ тэнсьыд милицияыс оз босьт? Ошкасны, мый койкаыд вӧрзӧддлытӧм?

— А тэ кызди чайтан! Алкогольной рожанад дзик вель юрлӧссӧ... ог нин висьтав. И прӧстыняыд някралӧм нямӧд кодъ. Тэнсьыд... ӧти таысь колӧ сӧ шайт перйыны!

— Йӧй тэ, Семӧн! И татшӧмыскӧд ме тӧрыт сырмытӧдз бучки-юи.

— Видзӧдлам на, кодным йӧйыс. Тэ мынтысян, а ме — ог. Меным мыйысь, висьтав, мыйысь! Ставыс сӧстӧм, весиг тэнад койка рӧчын коллялі войсӧ.

— Мынтам, Семӧн! Закон серти мынтысян. Сійӧ быдӧнлы ӧтмоза инмӧ.

— Ог! Меным дзик нинӧмысь... Сійӧ тэныд инмӧ.

Кык друглӧн зычитӧмысь Федӧр гӧгӧрвоис, мый веськалӧма сійӧ вытрезвительӧ. Сюрис стӧч сэтчӧ, кытысь медьӧна тшӧктӧсны виччысьны Фекла гӧтырыс да ӧртъясыс. Буракӧ, збыль, не-

минучаыд оз өткөн морт вылас сөв. Медыджыд төждыс Федөр-лөн өні вөлі, мыйон мынтыяс войсө узьтөдөмысь, өд сылөн көпейка сьом абу. Телеграмма кө швачкас, дерт, пырысь-пыр жө ыстасны. Но өд и телеграмматө уджйөзөн оз мөдөдны.

Кык друглөн вензьомысь садьмисны мукөд войтыр, корисны ланьтны, но Семён өні нин ставыслы мый вынсьыс тувъяліс асьыс мудер мөвпсө, мый сійө эз весьшөрө коль унтөм войсө, сійө төждысис семья вөснаыс. Өтияс бергөдчылісны мышкөн, мөдьяс ваксисны, коймөдьяс дакайтисны, ошкисны сылысь водзмөстчөмсө. Сөмын Семёнлөн ёртыс, кыз кынөма мужичөй, заводитіс ку письыс петны, майкаөдыс асланьыс кыскис ёртсө:

— Ещө өти кыв! И ме тэ вөсна мөд штраф кута мынтыны.

Асывнас Федөрөс милицияса дежурной дорө корисны медводзөн.

Милицияса капитан Иван Сямтомов сюся видлаліс Канев Фёдорлысь паспортсө, көр видзысьлысь көм-пасьсө. Кутшөм могөн сійө кыссис татчө? Сямтомов ачыс чужліс да быдмыліс войвывса коми сиктын, төдө, прөстаысь тундраса морт оз кут шөйтны карөд. Гөститны локтіс төдсаяс ордө? Вермас лоны. Но мыйла, сідзкөн, узьлө туй вылын? Сьомыс сьорас ньөти абу. Тані мыйкө неладно. Быть кодъяслөнкө кабыр улө веськавлөма. Капитан эз тэрмась садьмөдны туй выв мортөс, медем пөттөдз шойччө, мыйлакө жаль лои тайө тундраса мырсьысьыс, весиг кыліс асьсө быттө мыйөнкө мыжаөн сы водзын. Сійө тырвыйө вежөртіс, кутшөм налькйө веськавлөма төрыт.

Капитан пыравліс жырйө, көні узис Федөр; петыштөм бандизбьяса, төв йылын гожьялөм чужөма щөкаыс пыктыштөма да кажитчө өні сійө нель рөчаөн. Гашкө, пиньыс вись? Но нырыс! Кыдзи видзөдліс сы вылө Сямтомов, төкөтьө эз горөд — ыджыд да гөрд. Став мича думъясыс, кодъяс заводитлісны ырзыны капитанлөн сьөлөмын, өти здукөн вежсисны. Дерт, юөмысь бурдөдчыны, көнкө, локтіс карас. Но мыйла некод оз колльөд сійөс? Некутшөм кывкутөм абу сельсөветса юралысьыслөн. Өні вөлі яндзим сыысь, мый сорсис, сьөдсө чайтіс еджыдөн. Оз позь сылөн удж вылын лоны нямөдөн. Сідзикөн сійө некодлы оз отсав, сөмын делөсө дзугас. Сямтомовлөн ки пырыс быдсяма йөзыс прөйдитліс, но сійө век сяммыліс лючки торйөдны збыль уджалысь мортөс прөстө лытайтысьысь. Ачыс рабочөй коллективысь петіс, токараліс армия бөрын Ухтаса өти заводын. Казялісны йөз дорө сибалысь том мортөс, ёртъясөс пыдди пуктысьсө, корисны өтчыд парткомө, вөзйисны водзө велөдчыны, дасьтыны асьсө милицияын уджалөм могысь. Думыштіс да довкнитіс юр-нас, сөглас пө.

Федөр пырис дежурной дорө пасьтасьомөн нин, лэдзчысис индөм улөс вылө, водзас кутіс лөсьыда тубыртыштөм малічасө.

Первойсяныс, кыдзи Федөрлы кажитчис, начальник букуша видзөдліс сы вылө:

— Лечитчыны, шуан, мөдөдісны. Бур делө. Направлениеыд көні?

Федөр чөв оліс, сөмын мырдысьөн нюмдывліс, сійө эз гөгөрво, мый йылысь сёрнитө капитан.

— Көні направлениеыд? Справка, кодөс тэныд сетісны сельсөветад, гөгөрвоан, бурдөдчыны?— выльысь юаліс Сямтомов.

— Менам некыті оз вись...

— Төда, меным оз ков кытшлөдлыны. Нырыд любөй справка серти бурджыка висьталө, коді тэ. Типичной алкоголиклөн сійө.

Федөр заводитіс вежөртны, мыйын делöйс:

— Менсьым нырсö пургаөн сотіс.

— Турöбыс öд абу шонді. Кыдзи сотіс?

— Миян сійö и шондіыс төвнас, сідз лыдды, сэсса и гөгөрвоан.

— Но кыдзи вермис сотны? Кодöс тэ бөбйөдлан.

— Лачкис, сідзкö. Емөн моз бытшйөдлö йиа турöбыс, лун и вой пöвсалö, төлысь чөж.

— Оз-ö мөй позь кыдзкö сайöдыштны...

— Нырыд абу табак көшель, зептад он суй.

Сямтомов нёровтчис улöс бөр вылö, Федөр эз казяв, кыдзи вежсис сылөн чужöмыс.

Тадзи жö Федөр здук кежлö чöv усьлывліс аслас чумын кузь туйö петігөн. Но тайö пöрийö мөд сикас майшасьöм йирис. Таган вылö öшөдөм пöрт моз мулань нетшкысис көр видзысьлөн сьöкыд думъясөн сөвтöм юрыс. Сійö сэтшöм мыжаөн кыліс асьсö төрытъя лоөмторсьыс, дась вöлі кувны, тшөктіс кө эськөн тайö ыджыд начальникыс. Но сійö та йылысь эз на гарав, и Федөр кутчысис.

Буракö, не адзывны сэсса сылы гөтырсö ни тундрасö. Со тай кутшöм тэрыба перöнас шаркөдö, дерт нин, чорыдинö да дзескыдинö йөртас. Но пастук тані сорсьыштіс, капитан видзөдліс сы вылö меліа, весиг вильшасигмоз, быттьö зэв тешкодьтор төдіс Федөр йылысь, но яндысис веськыда шунысö.

— Кутшöма узин? Юрыд оз вись?— небыда юаліс Сямтомов.

Федөр видзчысьтöмысла тшөкмуніс, сэсса кызöктіс, весалыштіс сімöм гөлөссö, нёровтчыліс öтарö-мөдарö, нинöм эз шу. Друг кыліс асьсö зэв мудзөмөн, быттьö кузь лун чөж лызь вылын пушкыр лымйöд собаліс, тіралісны пидзöсьясыс, тэрыба вевттысис малича пöланас. А капитан юасис, кытчö мунö и кутшöм могөн. Федөр вочавидзліс дөзмöм велөдчысь моз öти-кык кывйөн.

— Сьöмтö кытчö воштін?— быттьö кысянькö ылісянь чунгис Федөрлы виччысьтöм юалöм. «Со төдмалöма нин»,— вирдыштіс аслас юрын. Шуны, мый сійöс бөбйөдлісны, стөчджыка, мырдисны сьöмсö, Федөр эз вермы. Öти-кö, эз көсйы коньөрö уськөдчыны тайö ыджыд начальник водзас, мөд-кö, ачыс тырвыйö эз эскы, мый сійöс збыльысь ректісны.

— Уджді төдсаяслы,— вашнитіс пастук.

— Щökатö малыштісны удждысиганыс?— нюмьөвтіс Сямтомов.

— Уси.

— Мый вылö?

— Тöрыт ме видзышти — и уси. Сійö öд позьö?

— Позьö.— Веськодя шуис капитан, сылы эз кажитчы, мый көр видзысь оз веськыда сёрнит сыкөд.

Ас ногыс гөгөрвоис сылысь зумыштчöмсö Федөр:

— Меным ыстасны деньгасö, кора кө, мөд сы мында мөдөдасны. Мынтыся.

— Телеграмма вылад эм?

Федөр чöv оліс, капитан мыччис сьöм:

— Переводыд воас да мынтысян. Сэсса көні талун думайтан узьмөдчыны?

— Ме бөр татчö локта, меным кажитчис вольпасыс, шоныд и сөстөм. Некод эз мешайт,— кыпыда вочавидзис Федөр.

Капитан гораа серөктіс:

— Казённõй койка вылõ азымыд воõ, та вылõ, другõ, мыж колõ вõчны. Ладнõ,— серам сорõн шуис капитан.— Гõстиницаõ видла овмõдны. Час дасын кымын ме прõстма. Тэ ветлы почта вылас да бõр лок сэк кешлõ.

Сямтомов олõс гõстиницасянъ неылын, сылы вõлõ кивыв кол-льõдны Федõрõс. Прõст местаыс эз вõв, шуисны, рытнас пõ, гашкõ, лоас да сэкõи овмõдасны вõзъян клиентсõ.

— Кыдзи нõ, Канев ёрт, тэнõ чомъяд величайтõны?— гõстиницаыс ывла вылõ петõм мысти юалõс Сямтомов.

— Федõрõн, корсюрõ и Федэръянõн, сідзисõ син сайын сõмын. Шуам, Федэръянлõн тайõ дадюлыс либõ кõрыс.

Капитанлõн бара гылыда серõктыссис, зэв нин тешкодъõн кажитчис кõр видзысьяс ног бергõдõм коми нимыс. Сэсся сідзи и колис нюмдõм пасыс чужõм вылас, эз тэрмась эновтны кõзяинсõ. Сямтомовлы лов вылас вõлõ кыпыд, непõштõ лючки коллялõм дежурствосыс либõ сыыс, мый водзын сійõс виччысис кык шойччан лун. Ещõ, эз вõв окота Сямтомовлы торийõдчыны Федõркõд. Оти-кõ, колõс лючки тõдмавны, кодъяскõд тõрыт сійõ коллялõма рытсõ, мõд-кõ, мыйся олõм сылõн сэнõ тундраас, мый сійõс сэнõ кутõ.

— Менõ тэ, Федэръян, Григорьевичõн шу, сідзисõ ладнõджык лоас,— бара вашмунõс капитан.— Кора ме тэнõ ас ордõ чай юны. Гõтыр, кõнкõ, пõсь блинъяс воигкежлõ пõжалõс. Кыдз та вылõ видзõдан?

— Сяа бур делõ. Блиныс, выйыштан кõ, кокниа кылалõ, сõмын нылав.— Федõрлõн пыксõм мода эз вõвлы, кõtь кодõ эз чукõстлы гõститны, петитчыны эз радейтлы.

— Выялам,— шпыннялõс Сямтомов.

Капитан олõс куим вежõса патераын. Гõтырыс удж вылын, челядьыс, шуис, õти — школаын, мõд — яслиын. «Абу менам мында»,— думыштõс Федõр. Сылõн кõдзыд чомйын вит челядь, а талõн и шоныдõнас оз паськав рõдыс, но кõзяиныслы та йылысь немтор эз шу. Збылысь, найõс виччысьõма ыджыд еджыд тарелкаын чукойõн пõсь блинъяс. Тэрмасьтõг юисны чай. Федõр мõдõдчис да южмõм воргаõд моз рõдтõс, быдторсõ сяркõдõс-висьталõс. Корсюрõ капитан кõрлывлõс плешсõ, сылы унатор эз вõв гõгõрвоана кõр видзысьлõн олõмысь. Федõр и сійõ здукъясас эз пикõ во, немтор пõ, воы пõ ачыд коркõ тундраас да места вылас петкõдла. Сэсся коркõ-некоркõ, Федõр эз дзик пыр казаяв, кыдзи капитан веськõдõс сылысь вõжживыв кõрсõ мõд туйõ. Пастук õдвывсьыс и сэтõ войõдõс-висьталõс, немтор дзебтõг, тõрытъя лытайтõмсõ. Сійõ звукас Федõр вунõдлõс сы йылысь, кодõ сы водзын пукалõ. Сõмын кодыр Сямтомов юалõс, тõдас-õ õнõ найõс, паныдасяс кõ туй вылын, Федõр тшõкмунõс, ылõсас вочавидзис, гажа пõ ёна вõлõ, õдвакõ. Федõрлы кажитчис, мый сійõ вузалõс кодõскõ, вõчис зэв мисьтõмтор. Ѓд думыштны кõ, Кузя и Ёша сьõмсõ збылысь сылысь удждõсны, эз мырддыны, кыдзи первойсõ чайтõс скõрийвсьыс, кõtь эськõн эновтны другтõ, кыдзи найõ вõчисны, абу жõ мичатор. Эз полõм, а ёртъяс вõсна ас ногыс гõгõрвоом тõжд кутõс Федõрõс, тшõктõс кутшõмакõ ылõдчыны капитанлы, мый сылы зэв жõ эз кокни вõв вõчнысõ. Веськыда кõ шуны, Федõр эськõн некодкõд эз сорав Кузяõс ни Ёшаõс, кõtь помланыс ёнакодъ нин коддзис. Федõр аддзылõмторъяссõ вежõрас крeпыда кõртавлõ, мед кузь туйяс вылас

эз вунӧд. Сідзи велалӧма челядьдырсянныс, кӧр видзысьлы мӧд ногсӧ некызди оз позь. Шуам, кык тысяча стадасьыс некымын кӧр пышйис мӧд бригадаӧ. Он кӧ ачыл найӧс сэтись аддзы, кодӧ тэ пыдди корсяс. Дерт, кодсюрӧяс и юӧртасны, волӧмтӧ оз виччысьны, но оз быдӧн. А Федӧрысь он дзеб, быд кӧрӧс стадасьыс вежӧрас кутӧ. И кызди нӧ сійӧ вермис вунӧдны мортӧс, кодкӧд ӧти пызан сайын пукаліс? Йӧзыд ӧд абу на кӧрӧяс, налӧн торъялӧмыс ӧта-мӧдсьыс, кызди Федӧр ӧні казяліс, зэв ӧна синмад шыбитчӧ. «Буракӧ, ӧна мыждас менсьым другъясӧс, веськаласны кӧ капитанлы ки улас»,— мӧвпаліс Федӧр. Артасис кӧр видзысь и эз кӧсйы налы вӧчны омӧльторсӧ.

— Кылан, тэнад другъясыд кодӧскӧ ещӧ на «кӧмӧдасны», он кӧ тэ миянлы отсав,— пӧся сёрнитіс Сямтомов, быттӧ лыддӧма пастуклысь мӧвпъяссӧ.

«Таысь он дзеб»,— пӧсь вирыс кучкис Федӧрлы чужӧмас, жугыля вочавидзис:

— Вочаеся кӧ, сэки тӧда жӧ да.

Капитан водзӧ эз мӧд юасьны, мыйкӧ думайтис ас кежас. Федӧр чӧв жӧ оліс, майшасис, мый Григорьевичлы кӧвъяліс ковтӧм тӧждун, и аслыс тшӧтш.

Сэсся ӧбед вылӧ воис Григорьевичлӧн гӧтырыс. Зинаӧн висьтасис, кодыр небыд кисӧ чургӧдліс Федӧрлы. «Мичаник Зинаыс»,— шуис аслыс кӧр видзысь. Да и нимыс быттӧ сьыланкыв, выя бордйӧн мавтыштӧ сӧлӧм дортӧ. Гашкӧ, сы вӧсна, мый коркӧ Федӧрлы кажитчыліс Зина нима ныв.

Ӗбедайтӧм бӧрын шӧр комнатаын Федӧр шлапвидзис-шойччис паськыд диван вылын. Паныда жырьӧ сайӧдчисны гозъя. Федӧр ясыда кыліс налысь сёрнисӧ. Найӧ, карса войтыр, вунӧдісны ӧтитор, мый Федӧрлӧн, кызди вӧр-ваӧд ветлысьлӧн, вӧліны зэв сюсь пельяс. Кӧр видзысьӧс век чуймӧдіс, мыйла карса йӧзыс сэтшӧм гораа сёрнитӧны, быттӧ дзик пельтӧмӧсь, ӧта-мӧдныслы горзӧны.

— Тэ нӧ кытысь татшӧм бубулясӧ корсин?— верӧсыслысь юаліс Зина.

— Мэ тэныд шулі нин, кӧр видзысь сійӧ.

— Ваня, тэ он думайт ас йывсьыд. Тэ жӧ капитан! Ёртасян кодкӧд... Кодӧ сійӧ?

— Зина, кӧсьян кӧ тӧдны, тэнад капитаныд сы водзын сӧмын... помощник. Государствоыс ӧна вылӧджык донъялӧ сылысь уджсӧ — сылӧн удждоныс министрысь ыджыдджык.

— Хи! Выйсӧ нянь вылас чуньнас пескыляліс-мавтис. Диван вылас тырыс гӧн чирйӧма.

Федӧр водзӧ эз кывзы, мый сы йылысь сёрнитісны, ки пӧлас босьтис маличасӧ да кок чунь йылас петіс, сы мында и аддзылісны. Ывлаын дыр эз вермы воны ас садяс, быттӧ дадь вывсьыс усис да юкмӧсӧ дзумгысьліс.

Шӧйтис кар кузя и песіс юрас кывлӧмторсӧ. Первойсӧ ставыс гудрасис турӧб дырйи моз, нӧйтчысь вежӧрас дзенгисны ыкша нывбабалӧн кывъясыс, кытысь пӧ татшӧм бубулясӧ шедӧдін. Но мӧвпъясыс вуджисны капитанладорӧ. Сійӧс пӧ, Федӧрӧс, министрысь на вылӧджык донъялӧны! Сідзкӧ, сійӧ медколана мортыс государствоас. Пастуклӧн некор на эз вӧвлы татшӧм здукыс. Кызкӧ зэв ясыда и шоныда мӧвпавсис, мый эм сылӧн чужанінын шылыд тундра и гулыд ягъяс, кӧні поэӧ рӧдмӧдны

да видзны гырысь көр стадаяс. Медся любö сыысь, мый сылөн уджыс эрд вылын, синмö шыбитчана, ставлы колана. Федөр видзöдлiс тротуар кузя шывгысь ныв вылö, и выль гыөн койыштiс раддуныс: муныслөн пельпом вылын узис тундраса еджыд кынь, кокъяссö шонтö көр кысысь вурöм пими. Федөрлы весиг окота вöлi ышнясыштны тайö ныв водзас, окота сувтöдны да чуткыны пельпомас, ме пö эсйö кыньсö кыйи, көръяссö пö дöзöрита и.

Нылыс ылö нин тюрöдiс, мед, ассыс көсйöмъяссö суöдö. А көр видзыслөн жалыс петö. Кыдзи нö эськөн, не кө Федөр код-дöмъяс, татшöм кодзыд төвсö оліс сйö, гöна көм-пасытöгыс?

Эз, эз весышөрö, сідзкö, и шу Григорьевичыс, мый Федөр министр моз жö колана морт. Управляющöй ошкывліс жö Федөрöс собраниеяс вылын, но мыйлакö сылөн шуалöмъясыс эз сэтшöма мörчывлыны. Буракö, дубавтöдз нин велалöмаöсь сэтшöм нога «гöститöдчöмъясас», кодыр öтиясöс век гөн ныв шыльöдöны, мöдъяссö паныда чажöдöны. Видзöдан да, öтиыслы и мöдыслы — веськодь. Григорьевичлөн кывъясыс сотыштiсны, быттö выль лов пöлыштiсны морöс пыткас, быттö воддза серти винёвджыкөн да ёнджыкөн мöдiс кывны асьсö. Федөрлы кыдзи некор кыпыд, мыйкö зэв мичатор овмöдчис сёлöмас, кодöс тырвыйö гөгөрвоны да донъявны эз на вермы.

Рытъявылыс Федөр пыравліс почта вылö. Кыдзи и чайтiс, сьöмыс виччысьöма нин сйöс. Зептас бөр төрытъя мында лоис, управляющöй гөгөрвома пастуклысь корöмсö.

Федөр тэрыба восьлалiс гөстиницалань. Сйö лючки төдiс, мый колö вöчны сылы тайö здукас, сйö эз вöв төрытъя моз шöйöвошöма. Сйöс виччысис Григорьевич, кодкöд пастук кылiс асьсö зумыджыкөн да вынаджыкөн. Григорьевичкöд öтлаын сылы вöлi гөгөрвоанаджык карыс и уна рөмөн пöртмасис ыджыд олöмыс.

4

Со и бара колис отпуск. Федөр бара самолётын, öнi нин лэ-бö мöдарö, гортас. Первойсö ыджыд көрт лэбачөн сынöдсö поткöдiс, а медбöрын ичöтикö сөлöдiсны, кодi стöч нин Харей дорöдзыс вайöдас. Федөр мöдiс нин гажтöмтчыны гöтырсьыс, челядсьыс, көр видзысь ёртъяссьыс. Дерт, найö кутасны юасыны, көнi да мый вöліс? Ставсö кө помся висътавны, зэв дыр лоö, кывзысьяс-ыс дöзмасны, быть бөрйысь. Эз кө веськав милицияс да другась сэнi капитан Сямтомовкöд, код төдас на кыдзи отпусксö коляліс. Гашкö, эз веськавлы Сыктивкарас, эз паныдасьлы вокыскöд. Корис ёна, да Григорьевичыд шойччан лунъясö кольöдiс Сыктивкарöдз, вокыс дорöдз пыртiс. Көсйис эськөн Федөр сувтлыны öнi Печораас, видыны Григорьевичöс, но кадыс эз нин вичмы, гортас виччысьöны. Сыктивкарас лэбзытöдз уна рыт помся ветлöдлiсны Григорьевичкöд войся уличаясöд. Кыкнанныс вöлi карсаяс ног пасытасьöмаöсь, Федөр почта пыр ыстiс маличасö да төбөксö гортас, магазинысь костюм да пальто ньöбис, Григорьевич сідзи тшöктiс. Но весышөрö шöйтiсны, эз паныдасьны сылөн воддза «тöдсаясыс». Кывсис, мöд посёлोकын пакöститчöмаöсь да сюрöмаöсь. «Мый корсян, сйö и ликмö», — ышловзö Федөр да вежö думъяссö.

Воыскöд кыкысь драмтеатрö ветліс. Кыкнанысьсö комиён ворсісны, зэв гөгөрвоана вöлі. Отиас тошка дедö лöсьыда сьыліс да йöктіс, абу öти изки песлöма, война вылас и гортас на дзес-кавлöма, а серамбана олан визьсö абу воштöма, дзор тошка нин, но помся корасьö. Тундраад сэтшöм дедъясыд эмöсь жö. Мöд спектаклын ыджыд да ён нывбаба ассьыс жöниксö моздорас новлöдлö, гөг ортöдзыс кöть сералан налөн кимöститчöм вылö.

Тані Федöрлөн думъясыс орисны, ланьтöм пассажиръяс шызисны, сумкаясныссö кватлалісны, самолёт жбыр пуксис посёлоч горулö. Федөрöс виччысисны гöтырыс да челядьыс, öта-мöд бöрся кытчöкö сійöс нетшкисны-кыскисны, тэрмöдлісны. Федөр нюмъяліс да дакайтіс. Сійö гөгөрвоис: öні оз артмы дасьтöм сёрниис, коркö тундраын прöст кадö оз öти пöв «мойд».

Век жö чай юöм бöрын, кодыр Феклакöд колисны кыкөн, эз вермы кутчысьны:

- Тöдан, Фекла, медся бур мортыс карас коді?
- Шоперъясыс.
- Абу.
- Лавошничаясыс либö, көнкö, öчередьтөг винатö сетісны да.
- Абу.
- Парикмахершаясыс, көнкö, баялбöжтö гильöдісны шыригмозыс.
- Абу.
- А-а, тöді, мыйла водзджык юрö эз во. Нывъясыс!
- Абу!
- Но! Сідзкөн, бабаясыс, гөрд паръяöсь тай зэв.
- Абу!
- Но либö эн ворс мекöд... Карысь воöма сэні.
- Вот и эн тöд. Милиционеръясыс!
- Сюрлің öмöй сэтчö?!
- Кыдзи нö сытөг...
- И бөр лэдзисны?
- Мыжтöгыс нö коді менö сэні видзас. Ме дружитчи öти милиционеркöд, кöсйис коркö тундраö воыны.
- Федөр, тайö тэ-э, эз-э кодкö веж?
- Коді менö вежас, ме öд абу тöбöк.
- Гашкö, пöдруга лöсьöдін? Зэв тай варов лоöмыд.
- Путътöм ме сы вылö.
- Висьтав, висьтав!
- Кöсйылі, но нинöм оз артмы,— сöрыштіс Федөр, медым эсканаджык вöлі, медым збыльысь öмöльтор эз думышт гöтырыс.
- Мыйла эз артмы?
- Дуракөн менö шуис, кор матыстчи.
- Правильнö вöчис.
- И тэ тшöтш сы дор?!
- А мый? Ме эськö бан боктö шонті, вöлі кö сэтөн...

* * *

Чорыд лым эж вывті тюрöдіс дадюла, дадь вылын пукалісны кыкөн: мужичöй да нывбаба. Тайö вöліны Федөр да Фекла. Ылісянь кажитчис, быттьö найö сунöны море моз дзирдалысь да төвся шондiөн ойдöм тундралөн ыркыд питшөгö, коді вöлі налы мелі гортөн.

Пернапас чөвтөг...

Медся дженъыдик төвся лунъяс пиысь өтиө Яр Микуллөн стада кульмөм нельма моз лунбыд быгыльтчис паськыд ворга кодъ ю воропөд. Тадзикөн кык тысячаа стада уськөдчис Печора вылө, көні, пастукъяслөн чайтөм серти, көръясөс виччысисны пөтөса да лөнъ төвъянінъяс — еджыд нитшка пожөма ягъяс. Коліс ёна нин важөн, векныд лым вылас да кузьджык лунъяс дырйиыс, сибөдчыны төвъянінъясө, но манитчисны тундра шөрын, начкысянінын, өчередъыс воис сөрөн. Мыйла сөрөн? Мыжаөсь асьныс жө, «гөститыштисны» тундраса өти посёлокын. Со мыйла өні коліс собны джуджыд лым пиөд, чомъясьны да разъсыны пемыдөн. Пошкигтыр уйисны лөнъ парма питшөгө...

Со и талун йөв кодъ рөмыд өдйө паськаліс Колва ю вылө. Йизьөм да быгалөм тошка старик дышпырысь сувтөдіс дадювсө — местаыс эз сьолөм серти вөв,— шорлы моз потшис туйсө бөрсяныыс нюжөдчөм көръяслы. Гез моз зэлөдчөм стада өтнөгыльтчис, ньөжйө сьөдөбасис, ылісянь кө видзөдны, вель ыджыд ді чужис ю шөрас.

Пастук, йиа тошсө пыркөдыштөм-прөстмөдыштөм бөрын, хоо-кайтис-чуксаліс көръясөс ичөтик шор паныд, нырйөдіс стадасө кыр йылө. Ю вылысь кайөм бөрын көръяс төкөтбө падмыштіс-ны, век налөн сіdzi овлө выль местаас, поводнөя таялісны коз дінъяссө да пу костъяссө, сэсся коркө казялісны да мөдісны йиджтысьны васөд навөлөк пыр гежөд пожөмъяса ягланьө.

Стадаөн дасьтөм туй кузя кыр вылө кыпөдчисны и аргышгъяс — көр додъяс, кытчө тэчөма көр видзысьяслөн разьөм чомйыс да кутшөмсюрө эмбурныс. Аргышгъяснас веськөдісны кыкөн: шөр арлыда нывбаба Парасся да Микул стариклөн, кыдзи ачыс шуө, юсь-пөдругаыс, чырыштөм гөлөса да ас кодыс жө Марья нима дзор старука.

Куимөн заводитисны сувтөдны чом. Том пастукъяс Митрей да Васьө лөсьөдісны стадасө вой кежлө, тшукөдісны колана йирсянінө, эз лэдзны разөдчыны сук навөлөкө. Налөн кыліс сөмын асныра көръяс вылө горөдлөмныс да пон увтчөмыс.

Чомтө сувтөдны найө ёна нин велалөмны, кыдзи, шуам, пөсь чай юны, ыджыда думайтны оз ков. Перйисны доддысь сьөкыд көрт пач да веськыда пушыд лым вылө шлопкисны, мыйлакө өти коз дінті көръясыс зэв омөля таялөмаөсь, пөшти вөрзьөдтөм лымйыс, ладнө, небыдджык лоас узынысө, сэтчө и бөрийисны чом местасө. Отар-мөдарас латаяс-пөвъяс вольсалісны — со и джодж. Сэсся вольяс да вольпась иналісны лата бокъясас, сёян дозмук да дженъыд кока пуклөсьяс пыртлісны. Ёні сөмын коліс вылыссө вөчны, ывъяскузь бедъяс сувтөдісны, на вылө и өшйөдісны-кыпөдісны көр куясысь вурөм кышөдсө, көр видзысьяс ногөн, нюксө. Со и чом дась, пыр да чай пузьөд. Ставыс эськөн ладнө, не кө өтитор — чом местаыс омөль веськаліс: көр кокъяс-өн таялөм лым писыс кос увъяс чурвидзөны.

— Мед өти местаө аслыд войнас веськаліс,— ёрччыштис Парасся Микул вылө, кор крукасис роскө, да өдвывсьыс нюжмуніс лым вылө.— Кутшөм местаө вайөдіс, некрещённөй старикуыс.

— Ме абу сюзь, войнас ог аддзы,— дорйысис пөрысь морт.— Этшаджык коліс Харей посёлокас «Чорнөй воронсө» лывкйөдлы-

ны инька пӧдругаясыдкӧд,— старик казътіс Парассялы, мый ӧні том войтырыс не пӧраӧн лишнӧй балуйтчӧны курыдторнас, асьныд пӧ мыжаӧсь таись. Парасся ланьтіс, водзӧ эз нин норась.

Веськыда кӧ шуны, Микул стариклы зэв жӧ абу сьӧлӧм серти татшӧм местаыс, кытчӧ налы ликмис сувтӧдны чомсӧ, пашкыр козъяс шувгӧны. Шуштӧм мыйкӧ сьӧлӧм вылас. Старик пӧрласис жӧ, и эз ӧтчыдысь, весиг чукая ув тош пиас йӧрмис, чегъялӧмӧн торпыригъяссӧ ковмис перъявны, бур, пемыд да некод эз казаяв, а то эськӧн ёсь кывъя Парасся кутшӧмкӧ ним кӧвъяліс, «пу тошка» дедӧ ли мый ли. Старик шы эз жӧ сетлы, кӧть кызди эз усяв. «Пемыдыд абу удж бертӧм вылӧ»,— не то асьсӧ жалитӧмӧн, не то войсӧ кедзовтӧмӧн, жугыля мӧвпаліс вирӧдз парсасьӧм чужӧма дед. Век жӧ пӧрысь кӧр видзысьлы помӧдз дзебсьыны эз удайтчы, шыр моз шарӧдчысь Марья быдтор аддзис да казаяліс:

— Мый сэнӧ, старик, сунласьны мӧдін? Чом местасӧ урӧсмӧдан. Кутшӧмкӧ пыр лӧк места тӧянлы ставыс енлӧн ликтӧма да сетӧма,— ичӧтик Марья гӧгыль моз тюрӧдіс бӧрӧ-водзӧ и некытчӧ эз джӧмдывлы.

— Кытчӧ нӧ тэ усян, кор му дінас пу вуж моз ляскысьӧмыд,— скӧрмис Микул дядь.

— Уджыс тай, майбыр, муын...— Та бӧрын пӧрысь гозъя ланьтісны, буракӧ, лыддисны, ӧтиыс и мӧдыс эз лоны уджйӧзаӧн.

Со коркӧ и эштӧс чом вӧчӧмыс, пӧрӧдісны кос конда, пилитӧсны пес. Ломтісны чунь кызта чугунысь дорӧм кӧрт пач. Сійӧ апалӧ-сывдӧ увсьыс лымсӧ, ачыс век лэччӧ увлань. Ымралӧ шоныд чомйын. Бригада ӧтчукӧрӧн шойччӧ. Кӧрт пачланьӧ кокъяснысӧ нӧжӧдӧмӧн небыд кӧр вольяс вылын куйлӧны мужичӧйяс. Нывбабаяс дасьтӧны ужын. Ыджыд пӧртийын варкйӧ-пуӧ яй — ставлы тырмас, понъяслы весиг колясыс лишалас. Чайник пӧданъяс чеччыштаӧны жӧ нин, регыд еджыд ру чушнитас нырӧдыс. Медся лӧсьыд татшӧм здукъясас чомйын, куйлан и кылан, кызди визувтӧ лунся мудзыд. Пушыд лым пиӧ моз сунгысьӧма Микул дядь, быгалӧм юрыс ыджыд пукӧвӧй юрлӧс вылын ӧдва и тыдыштӧ. Дзодзӧг пукысь пӧдушкаыс, небыд нин эськӧ да, весиг грелка моз пымӧдӧ ыркалысь сьылісӧ. Стариклӧн волялыштӧ тошкыс, сылісны йинӧньясыс, да быттӧ мыссьӧм бӧрын, ӧні — югыд да сӧстӧм чужӧмбаныс. Но пӧрысь кӧр видзысьлӧн мӧвпъясыс нӧжмыдӧсь да сьӧкыдӧсь, кызди и аслас мудзӧм вир-яйыс, мӧвпалӧ, быттӧ ыджыд тӧня зэвтӧ, кыскӧ-кыскӧ и помыс абу, быттӧ сісь вужляӧ самасьӧма тывйыс. Делӧыс со мыйын. Чум мӧдарас, сы моз жӧ вольяс вылын, куйлӧны пияныс — Митрей да Васьӧ. Найӧ стадасӧ вой кежлӧ иналісны, сӧмын на пырисны, мудзӧсь, ловнысӧ вежӧны. Кӧть найӧ томӧсь, дзоньвидзӧсь и статьясь, весиг арся кӧр кодъ винӧлӧсь, бать жалитӧ пиянсӧ; кызди висьысь кагаӧс либӧ кутшӧмкӧ ыджыд притча сӧм мортӧс. Медсясӧ Митрей вӧсна тӧждыс, куим во нин армия бӧрын, а пӧвтӧм дзодзӧг моз майшасьӧ-шенасьӧ няр борд-нас да век ӧти местаын. Мамыс вылӧ гӧлӧссӧ абусьыс лэптылӧ, весиг рӧднӧй батылӧн пӧрысьлун вылын пиньсӧ кеслывлӧ. Кодкӧ лун сэтшӧма сизьдӧма-чужйӧма Лыско понныслы бокас, ӧдва и ас выяс воис. Эз нин ӧтчыдысь казаявлы старик: дадьювса пелейясылӧн мышкусъыс сӧдзтысьӧ вир — кӧрт пома харейнас кучиксӧ чашнитӧма. Колӧ жӧ сіdzi дурсӧ песны! «Гӧтрасяс кӧ эськӧн,

и усыпаньвыв пуксяс», — татшом здукъясас джуджыда ышловзё Яр Микул. Но сын и делёйс — оз вермы. Сиктсьыс, кытчö найö тöv кeжлö волöны, лысöмaöсь энö пöткaясыс, карса батареяс бокын пöжöны бекъяснысö. Он шу, сиктас ньöти абу нылыс, кык-ö-куим жбыръялöны жö, томöсь да зэв на вöйöсь, сибöдчынытö ок кужöмön колö. Сэсся öд магазинсьыс костюмтö ньöбигön на дыр муртасян: а мыйла нö сылön сöкöляслы ас серти не бöрйыны гöтырпусö? «Гашкö, карö мöдöдлыны, — мукöд-дырйиыс артасö бат. — Юыштасны да бөр куш киön воасны. Коді нö карсьыс окотитас тшына чомйö овмöдчыны». Васё йылысь батлы нораа жö мövпавсё, чöv олысь сйö, ас улас шогсö песö. Думайтас, думайтас да мыйкö омöльтор вылö вермас ыштыны, юрсö воштас либö тундрасö эновтас. Татшом со Микуллön сибöдм тöняыс, кöть кодар помсянныс зэвт, некодарö эз вөрзьи.

Кöзйакаяс заводитісны лöсьöдны пызан. Парасся нюжöдчис көрт пач вылын варкйысь чайниклань, но эз удит шамырtnы вугйöдыс, быттьö кодкö нетшыштіс кок увсьыс латасö, гатшаліс бөрвыв.

— Бласлö кристос! — горöдіс Марья.

— Дур Митрукö, мый мекöд ворсöдчан. Ме абу тэныд невеста, лёк вирыд юрад катіс, — видчыны көртасис Парасся.

— Ме? Тэкöд? Бырган Параськöд. Менö акань кодь невеста виччысьö сиктын.

— Тундраад ветлігкості, гашкөн, чужис?

— Чайтан, эз!

— Виччысь рака вомысь мыльöс.

Тайö здукö шыасис пызан лöсьöдысь Марья:

— Пöрысь, мый нö нин тэ балуйтчан, грек он тöд. Латасö тай пöлыньтлін. Кутшöм бур чашка бара жугöдін...

— Менам балуйтчан пöраыс ылö бөрö кольöма. Выжив висьом тэныд, старука, кöласьö, — лöня вочавидзö кöзйин.

— Бласлö кристос, — пернапас чöвтö Марья. — Быд лёкыс тэнад вомсьыд киссьö...

Но Марья эз удит помавны сёрнисö, кыдзи пызаныс катовтчис да шыд тасьтйасыс тювкнитісны көрт пач улö.

— Со и вердін, старука. Спасибо, — шуис Яр Микул. Марья тэрыба бергöдчис чом пельöсö, кöні öшаліс сальзьом öтка öбраз, да мöдöдчис тэрыба юрбитны. Тайö жö здукö Парассялön пöри чайникыс, лёк ногön вежыньтчис ыджыд көрт пачныс да. Көр видзсыяс чуймöмön видзöдлісны öта-мöд вылö. Öні быдön гөгөрвоис, кытікö мыйкö торксис. Мыйлакö заводитіс вөрны чумныс, быттьö муыс муткылясьö, вальялö кок уланыс. Тайöс öні ясыда кылісны не сöмын кок йыланыс бергалысь кöзйакаяс, но и көр вольяс вылын куйлысь пастукъяс. «Мый нö татшом дивöйс?» — быдön юасисны синъяснаныс öта-мöдлысь. Некод эз вермы вочавидзны. Ставön олісны чöv и некод эз думайт вөрзьины местасьыс, быттьö виччысисны мыйкö ещö страшнöйджыктор. Сöмын дыр мысти кыпöдчис местасьыс Митрук, матыстчис пач дорö, лöсьöдчис öзтыны каллянсö, спокойнöя шуис:

— Землетрасенньö тайö заводитчö. — Митрук помавлöма коркö көкъямыс класс, неважön на газетысь лыддис землетрясение йылысь. Зэв страшнö вöлі, быдöнлön кынöмыс гудыртчыліс. Дерт жö, öні сылы быдön эскис. Ставön кокниа лолыштісны, кöть

гөгөрвоисны помкасö. Весиг Марья дугдiс юрбитöмысь, льöбсö вежыньтöмөн курыда шуис:

— Но... трасенньö кыськö...

— Мед эськö тэнсьыд дурлунтö тшöтш пыркöдас,— шуис Митруклы Парасся. Сийö чайтiс, Митрук шмонитö, эз лысьт помöдз эскыны. Митрук некыдзи эз путьмы öзтыны каллянсö, збыльысь повзис, вежöртны он вермы, кутшöм притча суис найöс, тiрзис ки-кокыс, пидзöс вылас муткырасис пач вом дорын. Коркö эськөн и öзтiс, весиг некымынысь чöскыда кыскыштiс, но кодкö сэтшöма тувкис пидзöс улас, нюжмунi пач боктi, нырнас гижыштiс доналöм көртсö.

— Не кө кузь нырыд, рожатö сотiн,— серöктiс Парасся.

— Мый нö нин тэ öнi сералан!— вомалис Марья.— Свят, свят... Ой, коскам лыйис!

— Буракö, крепыда заводитö пыркöдны,— шога шуис Митрук.

— Пиö, кытысь нö локтö трясенньöйс?— шöпкөм сорөн юалис Марья, көть эськөн эз нин öтчыдысь сы йылысь дöжनावлы пиис.

— Муыс письтö!— горöдiс Митрук.— Висьтавлi тай нин, Ташкентын вöлi. Японечьястö сийö зэв тшöкыда пыркöдö... Камчаткаын, миян кодъ жö тундраын, век пуркйö-петö пöсь руыс...

— Господи, миянтö нö мыйла сiдзи,— шöпкөдiс Марья, сэсся лэптiс гөлөссö.— Некод öд пернапас он чöвтлö! Ой, некрещён-нöйяс...

— Марья! Эн жöдз сэнi, усян пач вылас да сотчан,— вомалис Микул.

— Но, инö, оз ков,— пыр жö лөнис Марья, маличаасис, жмитчис чом пельöсö, кутчисис ывйö, нёровтчöм беддö.

— Мый бара лоас!— ышловзис Парасся.

— Гöра артмас!— вочавидзис Митрук.

— Гöра? Иштö!

— Дзонь гöра?

— Сiдзкөн, гöра вылын кутас дöлавны чумным? Ёна и кынмам.

— Пескыс көть лоас-ö, Митрукö?!— дэльöдчис на Парасся, сылөн век на пычиктыссис серамыс, Митрук сотiс нырсö да.

— Кутшöм пес! Кутшöм тiянлы колö пес, сэнi сытöг жаритчанныд!— Митрук друг джöмдiс, гөгөрвоис, торъя чорыда, буракö, нöшкыштiс, Марья да Парасся кельдöдiсны. Парасся ойöстiс да кышалiс маличасö, пуксис ыв дiнö жö, кыкнан кинас кутчисис нёров зоръяс бердö, быттьö збыльысь лöсьöдчис кыпöдчыны енэжö.

— Гашкö, эг на и стöч кратер вылас веськалö,— лөньюдыштны чайтiс чомсаясöс Митрей.— Оз веськыда кок пыдöсаным лый мупытшса зарядыс.

— Ой, кыдзи оз лый! Дзик улысаным гыпъялö да...— шуис Марья.

— Сöмын биа рокыс петас да виччысьны ковмас, медым кокъяснымöс эз палит. Веськыда кө шуны, усйысьны колö,— велöдiс Митрук.

— Тэ, пиö, он-ö миянöс пöрйöдлы, некор тай нö сэтшöмыс эз вöвлы,— сэсся звук мысти горöдiс ачыс:— Гашкö, адыс воссьö! Адыс тай, буракö, воссьö. Сыа тай!— Сэсся Марья мöдiс тiралысь кинас кызсюрö лöдавны пернапасъяс. Митрук мурч курччис сярвидзысь ён пиньяссö. Быдтор йывсьыс чомйын сёрнитлывлiс, кыдзи йöз странаясын олöны войтырыс, кытысь и

кыдзи мортыс чужома му вылас, политинформацияс нуодаліс, а мамсö енлы эскöмысь дутöдны эз вермы. Онi татшöм здукас кыдзи тöлкуйтан повзöм мортыс, мый абу енмын делöйс, а природаын. Митрук вешйис жö ыв дiнö, быттьö тшöтш лöсьöдчис лыбны енэжö.

Сöмын Микул дядь некодарö эз вешйы, куйліс аслас дзодзöг пука пöдушка вылын да донъяліс лоöмторсö. Буракö, збыль Митрук ног, газетъясыд весьшöрö оз гижны. Но öдвакö муыс потас чом пыдöстіс, öд кын сэтi, дерт, письгас медводз сэтi, кытi кокниджык, шуам, ты пыдöстi либö ю воропöдыс. Эмöсь тундраын кынмывлытöм нюръяс, весиг пöсь ваа тыяс. Сiдзкөн, ковмас усьысьны пöсь лавасьыс. Жаль, дадöвъяссö лэдзлісны, öнi кöнкö пемыд ягын сёйсьöны кöръясыс. Чом дорын сöмын дадöлыс Митруклөн да Васьölөн. Уна вылö сійөн вермасны мунны нельөн, öд сёян да вежöс вылö кöм-пась на сёрсыныс ковмас босьтны. А найö витөн. Шуис старик аслыс не вöрзыны татысь. Олöмыс сылөн овсьöма нин. Важөн пенсия вылын, ас окотаысь пиян дорас баландайтчö. Абу öмöй öткодь, воөн водзджык либö сёрджык эновтас таладор югыдсö? Дерт, жаль, ставыс жальөн кольö, но мый вöчан. Бур эськөн вöлі, сы дор кö сувтiс старукаыс. Нинöмла сылы дзескöдны томъяссö. Но öдвакö, асныра зэв.

— Митрей, Васьö, лöсьöдöй дадöвъясныдтö туйö,— нор гölöсөн шыасис Микул старик.— Гашкö, збыльысь кодарöкö усьысьны ковмас да. Сёянторныдтö да вежöс кöм-пась энö вунöдöй. Ме вöсна мед нинöм эз вöв... Овсьöма менам, кольчча татчö.

Здук кежлö пуксис чöвлун. Тыдалö, эз дзик пыр тырвуйö вежöртны чомсаяс Микул дядьлысь прöстöй кывъяссö, стöчджыка кö, индöдсö. И збыль öд, нинöм кö не керны да шöйöвошны, сэки быдöнлы помыс воас öдйöджык. Тайö мöвпыс вына тöv ныр моз öтмоза кучкис. Медводз чеччис местасьыс Митрук:

— Прöстит, айко... Мыйкö коркö, гашкөн, не сiдзи шусьыліс. Тэ вöчан, кыдзи герой...

— Тэрмась, Митрей! Сэсся водзö вылö морт ног ов... гöтрась,— старик шылькнитiс пашкыр тошсö,— водзö нуöd миянлысь рöдсö... Öти пищаль меным коль, патронсö эн важöс суй, мед осечка оз жö сет.

— Ассьыд важ курковкатö... мушкаыс усьöма жö-а. Лöсялас?— кыдзи век, делöвöя сёрнитiс Митрук.

— Меным ылö метитчыны оз ков!— виччысьтöг скöрмис старик.— Дадьтö тэч, сійöс тöд!

— Ош пуляөн патронсö коля!— Лыйыштiс-петiс чомйысь Митрук.

— Аттьö, дона пи,— аслысмоз шуис бать.

— Айко!— звирк чеччис местасьыс Васьö,— колöкö, тэ татшöм лёкасö эн балуйтчы. Ыръянитны кö кутан, дадь вылас көртавлам да нуöдам аскöдным. Ог кольö!

— Васьö, тэ абу нин дзöля,— велöдiс бать.— Челядь рутö бокö вешты. Ставным кö пуксялам кык даддяс — некытчö ог воö. Ставным воштам юрнымöс. Менö черкнит ведомостьсьыс.

— Айко!.. Эн дур!— ывлаö уськöдчис Васьö.

— Микул дядьö, код вылö нö миянöс колян, сирötаясöс,— гораа бöрддзис Парасся.— Кутшöм сьölöмөн нö ассьыд дона мича чуньястö керыштан...

— Парась, ланът! Йөзсө төлк вивсьыс эн дзуг. Туйө петан көлуйтө чукөрт!

— Прощайт, Микул дядь,— Парасся бөрдигтыр петіс чомйысь. Сы бөрся уйкнитны лөсьөдчис и Марья.

— Тэ кытчө?— косөдіс сійөс старик.— Яндысь енсьыд. Сет том йөзыслы лючки мынтөдчыны тайө лэчсьыс.

— Лешак старик, ме тэкөд ог кольчы. Ловъя юрөн адас ог на пыр. Ме көть подөн дадь бөрсяныс вөтча,— ичөт Марья шыр моз уйкнитіс чомйысь.

Здук мысти чомйө пырис Васьо:

— Айко, петны колө тась. Ывлаас шы ни төв, муыс ньөти оз вөр.— Сэсся недыр мысти содтіс:— Мыйлакө Лыско отарни чом пыдөсас дзоргө да эрыштлывлө?

— Забыль?!

— Эралө и парсалө, быттьө чом пыдөсас көсийө пырны. Кодыр стадасьыс воим, сэки нин вөлі чомланьө уськөдчө, но Митрук зэв ёна чужийс сылы кынөм улас, никсігтыр дадь улө дзевсис сэки.

— Но вөрсаыд! Васьо, пиө,— кыпөдчис местасьыс старик,— тайө мян чомным слөйыс серти зверь гу вылө веськалөма. Некутшөм трасенньө и абу!— старик видзөдіс көрт пач улө, лөня шуис:— Стөч гу вомас шлапкөмаось көрт пачсө, эськөн важөн нин, пиө, сійө татчө петіс. Личкы мыйөнкө көрт пачсө.

Тайө здук чомйө пырис Митрей:

— Со пищальыд, ош пуляөн зарядитөма.

— Митрейө, ассьыд двустволкатө пуляав жө.

— Эг на тэ моз выживмы,— Митрук шөйөвошөмөн видзөдіс батъыс вылө.

— Бөлбан! Ош гу вылын сулалан. Оз позь сійөс татысь ловйөн лэдзны, мунас стадаас да разөдас көръяснымөс.

Тэрмасьөмөн разисны чомсө, медым кокниджык вөлі бергөдчыны ош гу вылын. Микул старик көрт пома харейөн пескыльтіс бокыв көрт пачсө. Джынвийө на мыччысис съөд ош, сэтчө и чергөдісны сійөс Митрей да Васьо. Мужичөйяс пөрчисны ыджыд ай ошлысь пасьсө, Марья да Парасся бөр сійө местаас лөсьөдісны джынвийө разьөм чомнысө.

Бара ломтісны көрт пач, өні нин съөд пөртиын пусис ош яй. Кор пуксялісны пызан сайө, старик шуис:

— Татшөм дивөсө аслам нэм чөжөн эг на аддзывлы. Йөзсяньыс кывлі, но эг веритлы.

— Лешак старикө, пернапас некор он чөвтлы-а. Сёрнитан ещө сәні!— норасис Марья.

— Буракө, Митрейө, тэнад ыджыд грамотаыд абу жө на,— веськодъпырысь шуис Парасся.— Кутшөмкө трясенньө бара думыштін... Эг өд нин көсий, да бара на ылали.

Ставөн гажаа варовитісны, сөмын Митрук чөла някляліс госа яй кусөкъяс да жалитіс, мый эз сы ног ло. Сійө вөлі шөйөвошөма, быттьө зэв донатор уськөдіс дадь вивсьыс да колис туйбөр.

Гыча юква

Көть гычъясыс вөліны нин керөмаось, но мыскалігас төкөтьө на бөр эз уөвтны ваө. Буракө, сэтшөм муса налы вөлі сім пыдөса тыыс, кытысь неважөн найөс кыпөдісны. Но Иван Семёно-

вичлөн крука чуңьясысь абу кокни мынтөдчынытө, гычьяс өта-мөд бөрсяыс пырисны сьод пөрт пытшкө, кодос көзяиныс нюж-масьтөг өшөдіс бипур весьтө.

Пемдіс ньөжйө. Но Иван Семёнович тэрмасис, вой кежлө дасьтіс пес. Вөчис ставсө скөрысь, буракө, та вөсна и өдйө мұдзис. Пөсяліс быдсөн, а пес чукөрыс век на ичөт, войбыднас ок уна сөяс сйөс восьса биыс. Медбөрын лөкысь кос увйө чашнитіс вьль сьод фуфайкасө, матькыштіс вөр пасьтала. Майбыр, тані некод оз кыв, скөрлунтө нинөмла ас пытшкад пөдтыны. Муткыльтіс пөрөм сісь вужляөс, мыш вылас вожгөдіс, гоз-мөд воськов вөчис да и вужляыс личкис, кокыс кутшөмкө гуранө веськаліс да. Вужляыс шыш моз шашаритчис вылысас, увьясыс быттө вугырьяс самасисны фуфайкаас да оз лэдзны увсьыс петнысө.

— Волы!— чукөстіс Иван Семёнович ёртсө, коді өні мошкоритчис бипур дорын, воөма нин уткаасянінсьыс да, час джын и ветліс.

— Мый нө вужля улас керан?— нюмъялігтыр матыстчис Демьян Петрович.

«Ещё өд тешитчө»,— думыштіс Иван Семёнович да скөрысь шуис:

— Ньөжйөджык лэпты! Решитан фуфайкасө.

— Код тэн тшөктіс шебрасьны сісь конданас,— бара на шутитіс Демьян Петрович. Сэсся кыкөн чөла кыскисны кондасө бипур дорөдз. Демьян Петрович лэдзчысис коз улө да заводитіс весавны пищальсө. Иван Семёнович здук сулалыштіс да бара на веськөдчис песла.

Ёртыс воөм бөрын Иван Семёновичлы ещё на немкөджык лои сьөлөм вылас. Угоддьөяс видлалөм бөрын сйө көсийс жө уткаяс бөрся вөтлысьыштны, но Демьян Петрович косөдіс. Эз немтор шу, но видзөдліс стөч сідзи, кыдзи видзөддывлө аслас кабинетын. Сэки главнөй инженерлы паныд кыв эн шу. Гашкө, удж вылад сідзи и колө, главнөй инженерыд бурджыка төдө ассьыс овмөс,— сідзкө, сылы и веськөддынысө, крепыда вөжжисө кийн кутны. Но мыйла тані абу өткодьөс? Оз өмөй өти коз улө лөсьөдчыны поздысьны вой кежлас?

Лөгыс петө таысь Иван Семёновичлөн. И немтор лючкисө оз артмы. Весиг ньөтчыдысь на эз гудрыштлы юквасө, быттө оз аслыс пу, мый артмис, сйөс и паняласны. Öні нарошнө манитчис пес дорас, ньөти эз кыскы би дінө.

Век жө, сэсся коркө ковмис матыстчыны бипур дорас, но воис да эз и видзөдлы ёрт вылас, юква пөртгьяс чөвтис пань тыр вуй, солаліс, сэсся кымыныськө гудыртіс, зэв кокниа бергөдчис паньыс, мөдысь, коймөдысь... немтор пань улас эз сюр, быттө куш васө гудраліс. Кыйкнитліс коз улын куйлысь Демьян Петрович вылө, чайтіс, мый сйө öні гораа серөктас, черисө көнкө водзвыв нин кыскаліс көдзавны да, но сылөн чужөмыс вөлі сэтшөм жө лөнь, кыдзи узьмөдчысь вөр-ваыс, весиг видзөдіс кытчөкө бокө. Но кытчө нө, сідзкө, гычьясыс вошисны?

Иван Семёнович лэдзис пөртсө мөтыр вылысь — нинөмла абусө дыр пуны. Лөсьөдчисны панясьны, восьтісны кыкнанныс нопъяснысө.

— Чөскыд,— помся кайтіс Демьян Петрович. Сйө первойя

паньыштігас дубавтөдз сотіс вом пытшкөссө и öні пöсьсьыс öтар некутшöм көр эз вермы казавны.

Иван Семёнович панясис мөвпалігтыр, некыдзи эз вермы воөдчыны юква көрөдзис, чайтіс, мөс выйыс веніс чери көрсө. Ас думнас дузъяліс Демьян Петрович вылө, зэв водз гычъяссө ыркөдны кыскалөмысь, сэсся дзик көдзыд лоө сөйигас.

Бипур дорын пукалысьяс лыддисны асьнысö ёртъясөн, öтлаын уджалöны да.

Неважөн контораын быттö кодкө гильөдіс Иван Семёнович-лысь кыв вужсö. Висьтасис нимкодпырысь, кыдзи колян шойчан лунъясö кыйсис, велалі пö да гортын моз шкорга бипур дорас.

— А бокад оз кынмы?— юаліс сэки Демьян Петрович, ачыс видзөдіс сідзи, быттö шоныд руөн öвтыштіс — со пö тэ кутшöм молодеч, Иван Семёнович. А кодлы ошкыштöмьд абу любö? Йöй ёкыш моз и шедіс самтор вылас.

— А мый вылө лыскыс, бипурыс?— сёрнитіс кыпыда Иван Семёнович.

Пекнича бöрын Демьян Петрович пыравліс диспетчерскöйö:

— Ме артышті ставсö, гöтырлысь юалі. Ветлам. Кытчöдз вермам, машинаөн писькөдчам, а сэсся подөн,— висьталіс Демьян Петрович ассьыс көсйöмсö сідзи, быттöкөн зэв ыджыд честь вöчис диспетчерлы, весиг эз юав, окотитö али оз мöдыс вöравнысö, видзөдіс кытчөкө ылөсас, микрофонö моз лөдіс кывъяссö.

Öні, панясигмозыс, ставыс тайö дум вылас уси Иван Семёновичлы. И ёртыс пондіс кажитчыны сылы нöшта нин тшапитчысьөн да ыкшаөн. Мыйла и нуөдсьöма татшöмсö!..

Но со Демьян Петровичös дышөдіс панясьнысö, виччысис, кор ныр улас пуктас гычъяссö Иван Семёнович, но мыйлакө мöдыс эз тэрмась чöсмöдны черинас.

— Мый нюжөдчан, вай нин сэсся черисö,— корис медбöрын Демьян Петрович.

— Чери? Кутшöм чери?— кыпөдіс юрсö ёртыс.

— Гычъяссö пöртсьыс.

Иван Семёнович гудралыштіс паньнас пöртсö, со пö тыртöм, ачыс думыштіс: «Сюсь тай зэв, чайтö, ог гөгөрво». Демьян Петрович ас ногыс жö гөгөрвоис: «Кодакості эштöма нин öтнас сөйны!» Вирдыштіс и бытшкис ёсь мөвпыс, быттö ва ветöкөн шляпкисны Демьян Петровичлы чужöмас, зэв öбиднö лои, гөрдзасис голяас, вошис кыв-ворыс, эновтіс эбöсыс, сöмын пуис-пессис йöрмöм скөрлуныс.

Кыкнанныс дугдісны панясьöмысь. Көнкө матын чуксасисны узьмөдчöм уткаяс. Мыш саяныс, козъяинас, мисьтöма шыясис войся варыш, чуйдаліс узьысь лэбачьясöс, медым шы вылас уськөдчыны. Бипур заводитіс ваймыны. Иван Семёнович кыпөдчис, öтнöгыльтіс öгыр помъяссö. Ки улас сюри сотчöм черилөн бөж, сэсся лукйысьыштіс би гөгöрыс да чери юрьяс аддзис. Öні сылы вöлі гөгөрвоана, кытчö пöртсьыс гычъясыс вошисны — ва шоналігас найö чеччалöмаöсь пöртсьыс да сотчöмаöсь.

— Бипурас веськалöмаöсь гычъясыс,— торкис чöвлунсö Иван Семёнович.

Демьян Петрович тэрыба чеччис да заводитіс виддавны чери колясьяссö. Здук мысти гораа серөктіс. Иван Семёновичлы дум вылас уси, кыдзи ёртыс ошкис да чöсмасис черитöм вана, эз

вермы кутчысьны, вак-вак серöктіс. Кыкнанныс бур здук синва петтöдзныс сералісны.

— А öд ме тэ йылысь омöльтор думышті,— читкыртліс сэс-ся синъяссö Демьян Петрович.

— Да?— ырсмуніс Иван Семёнович.— Көнкө, чайтін, ме öт-нам черисö жöриті?.. Абу дивö... ме тöда, Демьян Петрович: йöз йылысь тэ некор бурасö он думайт...

Демьян Петрович шатовмуніс коз бокö, но сійö жö здукас звирк чеччис, горöдіс:

— Да кыз тэ лысьтан?! Тэ!.. Тэ...

Иван Семёновичлөн горöдöмсьыс муткыртчыліс лолыс, кажит-чис, мый сійö сулалö зэв тöдса кабинетын, синъяснас корсьö шпалер вывсьыс сійö öтка чутсö, кытчö тшöкыда, мыжа пон моз, зутшöддывліс видзöдлассö. Но ставыс тайö котöртіс син водзтыс öти здукöн. Збыльвылас ставыс вöлі ас местаас: бикур весьтын дыша шенасисны лямбöм коз лапъяс, съöд кыз нойөн шымыртöма чусалысь биторнысö кодзувтöм, кымöра вой. Окота лои Иван Семёновичлы чашнитны тайö укшаль эшкынсö, тэрма-сьöмөн заводитіс лöдны биö пес, сöвтіс дзоньнас ыджыккодь чукöрсö, кодöс заптыліс вой кежлö. Ньöжйö, но азыма нылаліс-ны кос вужляссö би кывъясыс. И öтарö ярмис бипурыс, ыльö-бөн пуркйис енжö тшын сора би кольта, ылöдз йöткаліс ас гөгöрсьыс пемыдсö.

Мыйкö татшöмтор жö вöчсис Иван Семёновичлөн съölöмас, потіс öнтая пöдтысь дойыс, пыр жö кокныдджык лоис, быттö лёк пöрöсысь мыніс.



ПЫДДИ ПУКТАНА АВТОРЪЯС!

Редакцияö гижöдъяснытö ыстігөн быть колö юöртны:

1. Ассыныд ним, вич, ов; кор да көні чужломныд (лун, төлысь, во).
2. Паспорт юöрьяс: номер, серия, кор да көні сетісны, гортса адрес (прописка серти).
3. Индивидуальной налогöвöй номер — ИНН (кодлөн эм).
4. Страховöй свидетельство номер.
5. Банкын счёт реквизитъяс.

Тайöс юöрттöг редакция гонорар оз вешты.

*Журналын йöзöдтöм гижöдъяс
редакция оз рецензируют и авторислы найöс оз мöдöд.
Редакция оз век во öти кывйö авторъяскöд.*

Компьютерный набор — **Н.Кузнецова.**

Учредители: Администрация Главы Республики Коми,
«Союз писателей Республики Коми» — региональное отделение общероссийской
общественной организации «Союз писателей России».

Издатель: АУ РК «Издательский дом Коми». Директор Плетцер Е.В.
Адрес издателя: 167982, ГСП-2, г. Сыктывкар, ул. Карла Маркса, д. 229, Дом печати.

Адрес редакции: 167982, ГСП-2, г. Сыктывкар, ул. Карла Маркса, д. 229, Дом печати.
Телефоны редакции: 24-47-52 (гл. редактор), 24-51-52 (общ. отд./факс), 24-46-36 (бухгалтерия).

E-mail: kodzuv@mail.ru; Сайт: www.komimu.com

Подписано к печати 16.05.2017. Дата выхода в свет 26.05.2017. Формат 70х108^{1/16}. Печать офсетная. Усл. печ. л. 7; усл. кр.-отт. 8,4; учётно-изд. л. 7,54. Тираж 488. Заказ № 3529. Регистр. ПИ № ТУ11 - 00347 от 24.03.2017 г. выдано Управлением Федеральной службы по надзору в сфере связи, информационных технологий и массовых коммуникаций по Республике Коми. Публикация материалов на социально значимые темы осуществляется за счет субсидии, предоставленной Администрацией Главы Республики Коми из республиканского бюджета Республики Коми. Отпечатано в ООО «Коми республиканская типография», 167610, г. Сыктывкар, ул. В.Савина, д. 81. Цена свободная.